

常昭合志

卷八

人物

地 220183

3411

部 2

8

先賢傳

大聖大賢千古曾無幾人寰內其之不可以方隅之人相
頡頏也邑中巫氏父子顯於商仲雍繼太伯而君吳言子
崛起北學開全吳之文物皆安得儕之於鄉里諸人前志
獨標先賢為一門誠重之也先賢中惟言子之後世襲博
士彷彿漢傳體例世系亦附列焉

殷

巫咸太戊時相史記太戊立伊陟為相伊陟贊言於巫咸巫咸
治王家有成作咸艾殷復興諸侯歸之故稱中宗

巫賢咸之子史記祖乙立殷復興巫賢任職周書君奭篇巫咸

常昭合志

卷之八

人物

一

又王家在祖乙時則有若巫賢父子為賢相與伊尹伊陟皆

為周公所稱云

按巫咸之名不始於商曰知錄援引纂詳商
相巫氏父子鄭樵通志明一統志俱稱夏縣

人山西省縣志詳載宅里祠墓司業陳祖范修志餘語巫氏
為邑人本越絕書書云虞山者巫咸所出虞故神出奇怪等
語似非定指父子又王家者自古
名賢兩地爭重仍遵舊志集錄

仲雍亦曰虞仲周本紀古公有長子曰太伯次日虞仲論語謂

虞仲隱居放言朱子集注即仲雍是也吳世家太王欲立季

厯以及昌於是太伯仲雍二人乃奔荆蠻支身斷髮示不可

用以避季厯太伯之奔荆蠻自號句吳荆蠻義而歸之千餘

家立為吳太伯太伯卒無子弟仲雍立是為吳仲雍前志云

虞仲隱於吳北山故山以虞名周章仲雍曾孫史記周武王



克殷求太伯仲雍之後得周章周章已君吳因而封之按吳世家

武王封周章弟虞仲於周之北故夏虛是為虞仲此則左傳所云太伯虞仲太王之昭吳郡志云仲雍又稱虞仲者當是

周章弟封於虞仲雍是其始祖後代人以國配仲故又號始祖為虞仲琴川志省郡志俱未載鄧曾陳各志列入寓人今

從錢志

周

言偃字子游說文偃作𠄎象旌旗之游故字子游又稱叔氏見禮記漢潛夫論桓叔之後有言氏因稱

叔氏生於周敬王十四年少孔子四十五歲北學孔子列於四

科以文學稱為魯武城宰歿於貞定王二十六年唐開元中

追封吳侯宋大中祥符間封丹陽公咸封中改封吳公元大

德中封吳國公明嘉靖中議稱先賢言子

常昭合志 卷之八 人物 二

國朝因之康熙五十一年

恩准設五經博士一人世襲罔替言氏大宗世系自先賢至七十世知縣耿

橋纂刻虞山書院志二世思字永祥禮記檀弓篇申詳之哭言思也亦

然漢鄭元注思為子游子申詳妻之昆弟虞山書院志思亦

賢人也卒於魯三世豐字郁周四世昊字太元五世球字端

方六世宜字宜之七世楷字魯林八世休字子烈九世以憲

十世惟精十一世芑十二世謙字公謹十三世慶字文衍十

四世罕字希卿十五世敏字明勉十六世成大字德宏始創

宗譜見譜序十七世富玉十八世績字公紀十九世豪字懷英

二十世繼祖字孝冲二十一世崇武二十二世定國字世安

二十三世琳字子通二十四世明問二十五世黼二十六世
既孝字子親重輯舊譜見譜序二十七世一乘字敬山二十八
世惠字君恩二十九世學顏字志學三十世正字孝直三十
一世之行三十二世英字文華三十三世拱極三十四世庚
三十五世寅恭修宗譜見譜序三十六世真儒字明道三十七
世庭規字以正三十八世大章三十九世省字惟察四十世
恢字宏之四十一世端操字維持四十二世諗四十三世思
本字正道修宗譜見譜序四十四世戮四十五世克常字永夫
四十六世旭字永延四十七世若虛字公實四十八世瓌字
伯秋四十九世希聖字士賢五十世碩字德大五十一世元

常昭合志

卷之八

人物

三

字康成五十二世道民字行之五十三世公怡字友文五十
四世斌字子慎續修宗譜見譜序五十五世彥緒字修之五十
六世仁溫字德厚五十七世義字宜齋五十八世禮字敬夫
五十九世文蔚字伯茂六十世時學字習之見元趙孟頫書
盧侯生祠碑
六十一世順孫字尚賢象賢齋弟子員釐訂宗譜見干文
傳譜序支
子福孫字尚德元至正間任常熟州訓導學者稱養正先生
見元陳基修學
記明張洪譜序六十二世煜字仲輝明初給戶帖列儒籍支
子信字以實由象賢齋弟子員擢居上舍尋遷近侍授給事

中直諫得罪忠鯁之名著聞朝野龔立本云玉乳閒談載言
信以偽服得罪文皇帝而
信已於太祖時犯罪事見大
誥則閒諫之不足據明矣崇祀忠孝祠見張洪譜
序昭文志六十三

世墉字永堅六十四世銘字景彝正統中戶部頒勘合給銘

收執見嘉靖間郡祠恩澤碑支子欽同銘兄協修專祠見天順間李賢撰祠碑記六

十五世江字維澣庠生明正德間提學御史張鰲山疏請蔭

襲博士未行令甘澤莅任江陳說先賢之道乃捐俸為建家

廟後令楊子器禮請鄉飲置上賓位又助財以修廟給田以

供祭見桑悅撰家廟碑記并邑志六十六世世恩字承慶支子宏業字墨

池建山塘涇文學書院見錢仁夫碑記六十七世祐字吉甫嘉靖間

重修宗譜見趙承謙譜序郡祠碑給事中沈漢復請蔭襲不行六十八

世諫字明善支子愚字心里齒德兼高令楊鼎熙嘉獎給冠

帶有兩子長曰福庠生型仁講義教人不倦門弟子多顯者

常昭合志

卷之八

人物

四

壯年喪偶不再娶御史路振飛旌為義夫魏璫矯旨毀書院

百方拮据買復舊址次日禧庠生與兄福抗顏為人師著詩

經解天文說為邑令耿橘器重福之子曰恂如字恭模庠生

苦志讀書著禹貢圖說詩經集解俱見郡邑書院各志六十九世序庠

生支子仲文字墨泉隆慶間始遷郡城恢復祠宇見正世貞撰祠碑記

七十世紹慶字仍衢庠生萬厯間耿令訓定言族六禮以紹

慶品行端方令子姓就範見虞山書院志七十一世森字君確

國朝順治時重建家廟邑令周敏捐俸助之見廟碑記康熙二十三

年巡撫湯斌題請予博士格於部議後以孫德堅襲職贈五

經博士七十二世煌字宗文贈博士支子易文廩生學行兼

優士林推重七十三世德堅字侶白廩生巡撫王度昭學政張元臣合題准授五經博士世世承襲修賢墓復賢宅並復祭田與修邑乘見省府縣各志支子春榮恩拔貢七十四世興字於詩早卒無子以支子鈞子如洙嗣鈞字馭平性孝友課子方嚴大宗請世職盡力襄贊誼敦族親好行其德以品望推重鄉里累膺封典卒贈知州又鐸恩貢廷鑽舉人七十五世如洙字魯源雍正十一年赴部考准襲職乾隆三年

聖上臨雍行取陪祀隨衍聖公

召見賞賚優渥十三年恭遇

幸魯盛典頒賜袍緞書籍請增祭田整理祠墓支子士紳字張

常昭合志

卷之八

人物

五

書雍正庚戌進士鳳陽知縣如泗字遯原由恩貢教習保舉卽用垣曲知縣擢至襄陽知府治行載入垣聞絳解刻志回籍修復祠墓并學宮書院載刻邑乘著有文學錄家乘解州全志常昭志初仕一覽還初筆記等書七十六世朝樞字縉雲府庠生考准襲職旋卒支子朝栻廩生朝楫舉人歷任安徽浙江知縣晉封奉直大夫刑部主事朝標

召試舉人已酉進士由內閣中書歷陞刑部總理秋審員外郎乙卯典試廣東朝樾恩貢歷署江陰溧陽教職七十七世尙燮字理羹庠生四十七年考准襲五經博士

臨雍

幸魯叠邀筵宴賞賜支子恩鴻舉人榮昌知縣尙煥廩貢尙煒
舉人五河教諭尙焜舉人教習尙烈尙鏞尙燭尙照恩貢

常昭合志

卷之八

人物

六

列傳

邑自三代後歷兩漢迄唐舊傳晉宣城太守郗臻居崇禎山梁范冀兄弟隱范山齊郴州牧倪德光梁侍御史陸孝本捨宅爲寺院生平事行畧無可考似難列之於傳也有宋之世名人踵起見於史傳者歷歷可數由元至明益不乏人

國朝百數十年來其人之卓然可傳者且大書特書不一書焉其間或祖孫父子累葉承休或伯叔弟昆一門濟美類而敘之非徒誌世胄之華著氏族之別也將使肇跡者自篤燕詒繼武者毋忘駿烈記載昭然庶幾鑒勸之一助

常昭合志

卷之八

人物

七

至若古稱三立聖列四科不朽之傳類分其目然史家首推遷固循吏一傳猶譏疏畧古今人表難免失倫茲不敢意爲區別妄有品題惟治行文苑篤行武畧藝學猶仍其舊分列於後云

唐

龔景才字敦禮邑之小山人五世同居以孝義稱麟德元年旌

表門闕

戶部奏請敕用廳事夾欄正門闕闊烏頭二柱端具瓦桶衛以緯楔左右各建臺高一丈二尺坊以白堊

赤其四角廣狹方正稱焉

至宋其子孫多居小山景祐四年有龔沂者登

進士第景才之裔也知瓊州瓊山縣終奉議郎

琴川志

宋

許式字叔矜祖延祚爲常熟令遂家焉式舉進士有高行歷通判博州尚書祠部郎中知洪筠二州官至轉運使卒贈禮部

尚書曾志

陸綰慶安鎮人本名絳字伯厚見前史同姓名者不祥更今名

字權叔

按南史陸開子絳開爲徐世標所害絳以身艾蔽俱被殺

寶元初登進士提舉江

淮茶稅蘇洵贈之以詩美其篤學好文充淮南路制置發運

司運鹽公事終尚書職方郎中贈中散大夫綰讀書務道理

必本經術昆弟分產推先疇付之捐俸賑族教孤姪如其子

著春秋新解三十卷工詩有聽琴歌等作祖無擇誌其墓琴川志

志

常昭合志

卷之八

人物

八

張僑字安道登進士第以言事謫官終尚書都官員外郎與同

年趙清獻抃善抃有贈僑赴闕詩及召還復有詩餞行刻石

於山陽郡庠觀其友足以知其人矣子顏字正甫孫敏功字

守道俱進士顏官秘書省校書贈中奉大夫敏功終朝請大

夫四世孫攀琴川志

張攀字從龍由太學登進士第起家鄞縣尉累遷秘書丞詮次

中興館閣書目萬四千九百四十三卷上之拜殿中侍御史

兼侍講在憲府凡兩年除起居郎兼崇政殿說書年七十卒

贈通議大夫集英殿修撰攀寬厚易直遇事開誠無一毫假

飾幼年郡試不肯隨眾減年爲欺家世清白持之益堅仕州

縣以循吏稱在朝廷以靖其著有益齋文集奏議漢唐論若

干卷

琴川志

陸徽之字彥猷祖景字伯通景祐初及第官至太常博士徽之由大學上舍生免殿試賜同進士出身終濮陽主簿高才博學眾推爲鄉先生同邑陳起宗張柟錢觀復皆師事之徽宗卽位詔求直言徽之與雍孝開輩力陳時政缺失唱名曰有旨駁放孝開立殿下叩頭曰陛下求直言奈何以直言罪人衛士怒以柱斧撞齒俱落徽之亦被摔出大觀末彗星見始復收錄會卒孫端成字天錫就特奏恩

琴川志

陳起宗字興祖少入上庠連冠多士一日歸省屬同舍生爲投

常昭合志

卷之八

人物

九

試卷起宗業禮記同舍嫉之易以周禮迫試乃告起宗遂用周禮試復第一登進士第四以徽猷閣待制知并州卒起宗善談辨詩篇灑落有陶謝風韻

盧志

錢觀復字知原年十七當赴舉會祖母李將葬觀復不就曰祖母恩我厚今失不與執事後悔何及由太學登進士除温州教授道經遂安值方臘猖獗觀復贊邑令王公濟備禦時流民載道或議驅出境觀復曰驅之適資寇耳徙之海州俾目獻其能鍛治兵械一新募鎗杖手之趨捷果悍者用之賊沮敗不敢犯境觀復不自言功以次調湖州戶曹同郡朱勔勢方赫欲妻以女或勸之就當得美仕爲親榮觀復曰假託匪

類以進豈吾親意哉適取辱何榮之有卒辭之久之調衢州判官北兵犯江浙衢當要衝觀復白郡守縱老弱畢出戶擇精壯者留一丁其後兵欲乘時爲變顧城中子女無所獲乃止累遷戶部員外郎以言罷知宮觀起知廣德軍地居高陸民苦供輸回遠復加歛水脚觀復請於朝寄廩湖之四安循運河至國門纔五日費減大半歲饑議發常平倉部使者不可觀復諭屬邑曰民命在朝夕敢不獨任擅發之責乎復請於朝盡捐歲租嘗持六十萬錢爲父衍償債於郡人朱氏以不聞父祖遺言拒弗受觀復曰若不聞如吾知之何生平嗜學不衰自號正靜居士有文集十五卷論語解二十卷

邑人土著

常昭合志

卷之八

人物

十一

登科自子侯佃

劉一止誌

觀復始

參琴川志

錢侯字廷碩一字惟大弱冠舉於鄉考官徐良能見其文有本原意必宿儒以爲選首及進見大驚異之繼補太學生登進士第授泰州教授除太學正從容靜晦人莫窺其際累遷秘書丞終朝請郎侯寡嗜欲惟藏書數千卷朱墨精謹皆所親校尤邃於易有文集五卷諸經講解十卷易說三卷

琴川志

錢佃字仲耕弱冠入太學擢進士第授分水尉真池二州教授歷太宗正丞通判太平州乾道七年詔皇太子領臨安尹慎擇僚案佃自外任選爲推官擢吏部郎中對便殿言三事上稱善累遷權吏兵工三部侍郎出爲江西路轉運副使時盜

賴文正起武陵朝廷調兵討之佃餽餉不乏繼使福建再使
江西奏蠲諸路逋賦淳熙八年婺州饑且缺守上曰錢佃可
既至勸分移粟所活口七十餘萬政甲一路朱文公時爲倉
使與陳亮書云婺人得錢守比之他郡事體殊不同及作江
西漕司養濟院記謂佃嘗奏免贛吉麻租二千四百五十九
斛兩州之人尤歌舞之佃忠信篤厚根於天性臨政不求赫
赫聲恆以字民爲先務捐橐裝買田贍族名曰義莊官至中
奉大夫秘閣修撰有易解十卷詞科類要二十卷文集二十

卷 琴川志

張柟字材仲父敦字祖仁治平四年進士終宣德郎贈左大中

常昭合志 卷之八 人物

大夫柟由三舍法貢京師入太學治書有聲登進士第初仕
臨江軍司刑曹事知嚴州遂安縣方臘叛擁兵入邑丞簿皆
遇害柟與力戰不敵及中脇被擁去柟曉以禍福逆卒順不
敢加害臘既伏誅改知歸安縣臨安府通判知泰潤衢三州
皆以惠愛稱性純孝在衢時母年九十九卒柟亦七十矣執
喪甚哀初得郊恩捨子子姪族有喪不能舉者哀而葬之官
至左朝散大夫卒年七十八贈正議大夫 琴川志

翟汝文字公巽其先自丹陽來徙祖濤通三傳知長州縣父思
秘書監知應天府汝文登第以親老不調者十年擢議禮局
編修官召對徽宗嘉之除秘書郎三館士建議東封汝文曰

治道貴清淨今不啟上述三代禮樂而師秦漢之侈心非所願也責監宿州稅久之召除著作郎遷起居郎皇太子就傅命汝文勸講除中書舍人言者謂汝文從蘇軾黃庭堅遊不可留贊書之任出知襄濟唐三州以謝章自辨罷起知陳州召拜中書舍人外制典雅一時稱之同修國史遷給事中內侍梁師成強市百姓墓田廣其囿汝文言於上師成諷宰相黜守宣州召爲吏部侍郎出知廬州徙密州密負海產鹽蔡京屢變鹽法盜販者眾汝文曰祖宗法獲私商不詰所由欲靖民也今繫而虐之將爲厲矣悉縱之密歲貢牛黃汝文曰牛失黃輒死非所以惠農宜輸財市之則害不私於密欽宗

常昭合志

卷之八

人物

主

卽位召爲翰林學士改顯謨閣學士知越州兼浙東安撫使建炎中楊應誠請使高麗圖迎二帝汝文奏應誠欺罔君父若高麗假吾道以至燕雲則金人亦可問津高麗以窺吳越後高麗拒使者果如汝文言紹興元年召爲翰林學士叅知政事與秦檜同在政府嘗請治堂吏受賂檜怒面劾汝文遂罷歸汝文在密檜爲文學汝文薦其才故檜引用之然性剛不爲檜屈對案相詬至曰檜爲濁氣汝文與葉夢得汪藻孫覲俱以文名政宣間有文集行世

府縣各志

邱礪字師說本海州朐山人建炎初仕於吳因家常熟少讀書有志事功登進士第歷濰蔡二州教授知吳江縣入爲國子

監丞御史臺檢法大理寺丞權戶部郎官知筠秦建三州除
福建提舉兼提刑改轉運判官礪天資純實自律甚嚴秦檜
當國以勵同年生每示意嚮且欲以孫締勵女勵實不願欲
遠之乃以兄姊未葬力請祠而歸屏跡杜門以詩自適壽七
十六累贈光祿大夫著有易說超然類稿子璪應稿學宏詞
科璋琛璠見仕籍孫耒

琴川志

邱耒字少潛璋子以蔭補於潛簿慶元錄事叅軍淮東轉運幹
官所至有聲知海鹽縣興起學宮築捍海隄二十里代民輸
逋租郡有疑獄率委覆按民立碑頌德薦者凡十八人監三
省樞密院門遷將作監丞出知台憲撫三州皆不赴終朝奉

常昭合志

卷之八

人物

三

大夫耒生平尚義加厚族黨捐田以予姪王忠惠萬狀其行
謂天資素高才足以運慮足以謀明足以察云子烈字希文
以父澤授蕪湖簿通州司理知丹徒縣真縣通判咸淳十年
爲江東安撫司叅議官北兵至使者委印而去城失守烈護
印匿民間將赴行在至吳遇疾知平江府陳謙亨提舉常平
戴覺民爲上邱於朝方擬進秩而卒

琴川志叅
姑蘇志

邱岳字山甫祖琚紹興間從魏勝恢復海州有功後朝議棄海
州琚與子松歸朝琚除廸功郎松下州文學琚爲招撫司在
備差遣卒葬吳縣松遂來徙岳松之子也登進士第授太湖
尉辟蘄州推官從淮東安撫副使趙范平李全有功通判黃

州知眞州北兵大至岳以孤城抗之襲其軍殲其渠魁改兵部郎中淮東提刑提舉常平倉改知太平州兼江東轉運徙知江州兼沿江制置副使移鎮淮東丐祠淳祐十年以工部尚書召尋謝歸寶祐初授華文閣直學士沿江制置使兼安撫和州無爲安慶三郡屯田使舟發京口北兵闖廬和岳遣新知和州邱應雷禦之應雷奮入卒保和州以龍圖閣學士致仕歸岳自典郡至開闢凡四禦大敵未嘗挫敗爲人簡重寡言遇事則洞開肺腑理宗書忠實二字賜之官至正議大夫封東海郡公卒贈特進光祿大夫

曾志

富元衡字公權文忠公裔其先自青田來徙曾祖嚴咸平詞科

常昭合志

卷之八

人物

十四

元衡登第授隨縣簿建炎初爲襄陽招撫司機宜張魏公薦其材改諸王宮教授太宗正丞知江陰軍出盜之不應死者數十人知興國軍改袁州遷湖南常平使者改利路提刑却監司例餽數千緡又改湖北提刑多所平反隆興中召還中途被盜劫掠帥李師顏餽以金不啟緘而還之除工部郎中上疏乞骸骨詔以內閣奉祠制詞有知止不殆之語因以知止榜其堂卒年八十六平生以清節爲時論所重書學蘇文忠尤精柳葉篆

琴川志

富嘉謀字君美以祖廕爲歸安尉無爲軍判官知上猶縣監行

在省倉上界特旨覈處州慶元縣以才選知縣事仕至兩淮

運判知和州奉祠家居年七十七卒嘉正謀才具素優臨政不

苟居鄉尤急於義云

琴川志

鄭時字是翁樞密文肅公馘之孫登第知當塗縣律身廉介撫民以寬聽訟得情訓諭不悛而後加罰民多化之秩滿通判建康留守晁謙之資其贄畫以疾奉祠歸終朝奉大夫性嗜書至老不倦自左氏史記東西漢二國志西北史以至韓柳

樊川東坡諸文集皆手鈔編錄焉

琴川志

曾懷字欽道丞相宣靖公公亮曾孫世爲晉江人其後由京師來徙以父任調金壇簿南渡初授烏江令歷知江州改真州訓練民兵有紀隆興中爲浙西提舉除度支員外郎以懷有

常昭合志

卷之八

人物

五

綜覈才別置拘催錢物所令專主之以豐裕聞超除權戶部侍郎兼提領贍軍諸庫除戶部侍郎再歲除尚書比錢穀之數州郡所積與夫出納之多寡纖悉必記上倚其才足軍國用以蕭何劉宴目之丐閒除龍圖閣學士知婺州甫三月趣召賜御書松賦復爲戶部尚書乾道八年賜同進士出身除叅知政事旋拜右丞相封魯國公淳熙元年除觀文殿大學士奉祠復拜右丞相兼樞密使以疾特免朝叅唯入堂治事遇大政則宣引製輕小金帶以賜復力上印綬仍除觀文殿大學士宮觀歸卽於是年薨年六十九贈少保懷由世家登宰輔以清約自持常言事之大者視之以小事之小者視之

以無則天下無復事矣有文集三十卷

琴川志

鍾璇字振遠一字叔齊六歲而孤育於繼祖龍圖學士休適家林氏多書與其孫瓊瓌瓌同肄業課率先成後瓊兄弟並登第璇遂棄舉子業取所藏書盡閱之一日遊巖谷間遇異人衣僧服手列禦寇書揖而語坐磐石指一泓定水曰此水滔滔乃皇極大中之道語久別去自是有悟放浪漁釣閒築室梅李多蒔香草自號藥圃隱居二十年家貧殊不戚戚有求者解衣分粟無靳色唐瑑自留守歸寓梅李遂爲忘年交提舉徐誼吳守沈揆皆造其廬以奇人目之范成大等嘗薦於朝不報有藥圃稿山中錄續孔白帖奉漢以來鍾鼎奇字藏

常昭合志

卷之八

人物

六

於家

琴川志

姚嘉言字亨甫思廉五世孫父景熙爲杭州助教六年掇兩魁擢太學教授弗就職歸嘉言以文學知於朝趙鼎招延於家教育子弟嘉言端坐終日衣冠偉如講解未嘗怠如是者五年德學愈進往來求文者比肩接踵筆翰如流畧無少滯紹興中鼎表聞於朝授邕州司戶叅軍以德孚民不罰而化請告歸事母甚孝寢食不離左右母歿廬墓三年尋卒

胡嶧字仲連父稷言字正思卓有文行嶧能繼其父澹泊自守言動皆有尺度賓嘉喪祭悉遵古禮所居五柳園松窻蓬戶父子兄弟終日講與學方子通林德祖爲忘年友建炎初以

年格推調安遠尉非其志也乃取少陵宅舍如荒村之句自號如村老人有文集二十卷號如村冗稿子伯能

中吳紀聞按琴川

志憚世居永康因祖葬吳下遂家縣之塗菘塗菘時屬常熟今隸太倉

胡伯能字少明登進士知江山縣有惠愛乾道初選教諸王宮

嚮進用矣以年至力請老朝廷嘉之乃以左奉議郎賜緋衣

銀魚致其事歸築堂曰宜休相羊里巷卒年七十四

吳郡志

王伯廣字師德梅李人登進士第授德清尉既有官祿家產遜

諸弟一毫不取授温州教授再調常州未赴卒伯廣少工文

從中書舍人楊邦弼學嘗過臨安謁張倅柙張曰試教官乎

曰某素不習經張爲指蹊轍閱月以程文示張張大驚曰天

常昭合志

卷之八

人物

七

才也卽魁教官精於詩四六亦爲人膾炙與張孝祥游詩筒

往復有聽雨集

琴川志

嚴煥字子文進士君鄰從子工書善屬文嘗與同里錢南試聖

人以人占天賦出場問冒題押何字南曰押占字煥曰余奪

魁君第二果以首選登進士第調徽州臨安教官通判建康

府知江陰軍遷太常丞出爲福建市舶司終朝奉大夫

琴川志

冷世光字賓王與弟世修世南同入太學詩稱三冷與世修同

榜進士調歸安簿知歷陽盩國二縣廣德軍教授改知龍游

縣朱子爲倉使旁邑令見訴於民命世光往體實得其情兩

省交薦幹辦行在諸軍審計司除監察御史殿中侍御史周

必大專相初除吏世光卽論之施聖與以元樞出知泉州亦
遭劾罷人稱冷面御史尋知嚴州致仕作閒適堂以見志年
八十終朝奉大夫世光事親孝居喪哀與諸弟和於子孫盡
其教自其父力賑施邑里世光兄弟率行不替有奏議二卷

東堂類稿二十卷刀筆五卷

琴川志

冷世修字良器登第調崇德縣簿移攝理篆獄屢空知興化縣
監行在激賞庫改秩乞回一階以封母阜陵特命詞寵之知
上元縣民有骨肉互訟者諭之曰今以律繩汝汝終身不可
復聚矣民感泣願息爭通判和州守尙嚴峻世修濟以寬秩
滿吏民詣臺乞留得知南康軍未上卽丐祠歸作留耕堂以

常昭合志

卷之八

人物

六

示子孫有雜文三十卷詞科類要十卷

盧熊府志
參琴川志

趙公豫字仲謙父左朝散大夫贈少師詵之始家常熟公豫幼
聰警記左氏傳不錯一字登第調無爲縣尉歷知仁和餘姚
二縣真常二州遷大理少卿差充接送伴金國賀正旦使遷
大府卿除祕閣修撰進集英殿修撰開禧初抗章引年以寶
謨閣待制致仕宸音褒賞有察辭避之真情全始終之大節
蓋誦其實也卒年七十八公豫沈厚清苦平居以清坐爲適
居官廉正常言吾求爲循吏不求爲健吏有奏稿一卷燕堂

類稿五卷弟公升公頤皆仕至麾節

琴川志 謹按四庫全
書簡明目錄云燕堂詩

彙一卷宋趙公豫撰原本十六卷此本爲蔣維所刪
定詩不甚工而公豫當時爲循吏以其人而存之

趙公升字叔明以遺恩補官歷信州司戶叅軍改知金華縣除知漢陽軍提舉福建常平茶鹽事終朝請大夫其宰金華也募鄉民爲義役條畫甚備邑人便之祠於寶婺觀刻石紀焉漢陽據江漢會每漲流侵齧城隄隨潰公升念土功之難官給衣糧稍增其庸民踴躍聽命廣表堅壯遂爲經久之利閩舊有舉子倉凡僧舍之不能嗣續者聽民佃業歲收其入以給窮乏產育之家旣而倉實不足民鮮被惠公升請仍以僧主之自是民間生子蔑不舉者公升臨事精敏又能委任官僚故政罔不舉卒葬吳山頂阜袁燹志其墓子彥許彥詞彥禾俱見仕籍孫枏夫見恩蔭

常昭合志

卷之八

人物

五

趙思字再可生三歲從諸父孝孫由洛來徙及長通春秩登第調鍾離簿以虞允文薦孝宗賜對便殿問恢復大計稱旨除大府寺簿太常丞兼度支郎官出守台州治聲翕然上親書姓名於屏除淮南路轉運判官過關辭上曰知卿忠實故畀邊節除直秘閣遷戶部郎官淮東總領以起居舍人充金國賀生辰使不肯稱御名金以爲慢不得已罷之有使北者言人問趙運使安否不絕起廣西提刑改知湖州直龍圖閣除起居郎權吏部侍郎奉祠起知靜江府廣西經畧職事修舉除秘閣修撰集英殿修撰累轉中大夫

琴川志

趙伸夫字信道祖忠翊郎公義始居常熟父贈中奉大夫彥軾

好施與貧乏不能自活者暮夜攜錢寘其戶內壽止三十三人咸謂報當在子仲夫初以恩蔭補承信郎監南嶽廟擢紹熙元年進士主松陽簿調紹興觀察推官時帥以能吏自名健於裁決嘗以休日至都廳他幕僚無入者獨仲夫審問如常時帥喜其匪懈與之語大奇其才亟表薦之知揚州江都縣敵游騎逼揚大帥郭倪皇遽無策仲夫與推官應謙之堅壁以待敵始引去既差知楚州楚與敵隣羣盜猖獗青齊間論者以爲宜結楊劉之黨爲夾攻計仲夫不然俄有劉顯昌者求納款亟調兵爲備一夕而遁或獻議於朝謂縣北甘羅城爲淮陰門戶亟宜修築命仲夫相視詢諸故老卽條上以

常昭合志

卷之八

人物

三

爲此六朝駐兵之地形勢要害過於淮陰故城從之以職事修舉累遷直秘閣陞寶謨閣知廬州首建城西柵後議包築故城邊敵至浮光或勸盡發城中屯兵往援仲夫曰廬距浮光五百里而遠距濠豐二百里而近敵必由濠豐渡淮今道浮光安知不爲聲西擊東之舉若悉師於西敵乘虛奄至合肥失守直趨歷陽窺我江滸可若何乃令郡兵鈐王辛集騎卒數百擇帳前之勇敢者各數十人與俱以陳剛爲之繼會安豐報金欲以舟師渡淮合肥父老乞留陳剛翼日謀知金兵不果渡卽遣剛如初王辛果以捷聞陳剛繼至廬載復捷敵由是遁制府以緩遣陳剛奏仲夫畏怯遂罷歸逾年天子

知其忠復職召對伸夫具言制敵之策莫若以守爲主俟其可戰而戰則是以守爲戰俟其可和而和則是以守爲和和不可恃則戰戰或未勝則守合和戰守爲一則操縱在我矣除金部郎未越月除直敷文閣兩浙路轉運判官知州縣催科重爲民病揭三大弊嚴行約束鏤榜著明觀者稱慶既得疾進職二等陞副使力請奉祠詔以直龍圖閣知監國府閏月遂卒贈秘閣修撰袁燮志其墓子時懷時思俱見仕籍

崔敦詩字大雅世家靜海晚居常熟登進士第授揚州高郵簿兩浙運幹除秘書省正字兼翰林權直早有文名所爲制詞溫潤詳雅兼崇政殿說書權給事中時學士周必大乞補外

常昭合志

卷之八

人物

三

壽皇中批問吏部尙書韓元吉曰崔某今安在召見除樞密院編修官復爲權直既拜命卽言翰林權直爲名未正更爲學士院權直遷著作郎兼權吏部郎官又兼崇政殿說書進國子司業改權直學士院拜中書舍人加侍講直學士院敦詩賦性端厚議論疏通知大體自直宿進講遇引對所陳必剴切造膝密啟有家人不得覘其稿者上深器許卒贈中大夫有文集三十卷內外制稿二十三卷奏議總要五卷通鑑要覽六十卷制海十編監韻五編兄敦禮同登進士俱爲文

宗

葵川志

陳字字伯夔古靈先生襄諸孫自吳興來徙以父瑩蔭爲莆田

尉得劇賊格當賞愀然曰吾其可藉人命爲自進之階卒辭之調紹興府司法改知富陽縣差行在權貨務知房州歸卒字孝友廉潔居母喪鬚髮盡白撫愛諸弟食必同席俸祿不入私室家無金銀之器嘗自謂先世以清白遺子孫豈惟富不可求亦所不願也陳紫微峴誌其墓

琴川志

周甫字次山五歲誦論語每舉一字輒引類言之淳熙癸卯秋試已取解魁以失書塗注移副榜首遂棄舉子業研精經史操履不苟號無礙老人叅政宇文紹節館之累以邊功授官不就令孫應時尤愛重焉精於漢史所著韓生傳章華臺記石頭城歌皆爲時所稱

琴川志 按廬府志嘗見甫有印文曰臨淮周甫疑卽虎之族也

常昭合志

卷之八

人物

三

周容早失怙事母朱至孝爲縣從事嘗有事於頂山得數粟附歸以奉母妻匿之以他粟進他日母出粟以食容心疑焉遂詬譴其妻尤好爲義舉旣卒邑人相與祀之

鄧志 按孝子生於乾道間歿

爲神今最著詳見祠廟及冢墓門

陶窠字任道通直郎知舒坡縣事理宗時嘗捐貲濬治支川民賴其利程公許爲之記高祖節仕至朝請大夫子二擴振皆

登科

支川記

周虎字叔子世家臨淮靖康中來徙爲人僮輕財尙氣慶元二年擢武科第一授殿司步軍同正將除武學諭閣門舍人充金國賀生辰接伴副使知光州楚州繼知和州開禧二年

十一月戊戌金人合數道兵盡銳攻圍城中兵不滿二千或議撤兵退保江面虎不爲動設太祖神位於靈會門上鳩諸將誓以死守士卒益感奮一日賊用火箭射樓櫓飛燼所及城中火四起乘勢急攻左右請少避其鋒虎怒揮所佩刀名紫荏者語眾曰城卽破吾用此自刎城上汝輩脫歸報朝廷吾九十老母尙得溫飽終餘年若此足一動忠孝兩虧矣拒守匝月合戰三十有四殺其騎將以十數射殪其右帥石矫礎金人大創十二月癸丑引去於是和議始決而江淮奠枕矣虎以平時介特多忤用事者故不沾賞移守合淝實奪其兵柄也軍士有刎頸以留者旋復被謫母歿不復出再除和

常昭合志

卷之八

人物

三

州辭官表八九上得請乃已紹定二年卒諡忠惠先是和人立生祠祀其母子淳祐中賜廟號忠烈虎忠孝出天性而文辭贍敏作大字尤工其製清源廟記敘神趙昱助已克敵事

甚靈異

宋史參
劉宰志

王萬字處一號抑齋世本婺人徙常熟少嘗居濠梁學舍九年慨然有求道之志每書事天二字自警登進士第授和州教授吏部架閣國子錄添差鎮江府倅除樞密院編修官兼屯田員外郎知台州復入爲屯田員外郎兼編修改尙書右司仍兼編修崇政殿說書擢監察御史首論史宅之故相之子弄權壞政命宰相諭旨不奉詔乃出宅之史嵩之自江上董

師入相人心傾搖萬抗疏劾之且引歐陽修之論趙括謂天下皆知其不可獨其主不悟者最爲莫大之患疏入除大理少卿卽日謝歸自是累除官不拜再令赴行在奏事復除直煥章閣四川宣諭使司叅謀官太常少卿並辭不受家居凝塵滿榻淡如也淳祐三年卒史嵩之敗上思萬先見奉御筆前太常少卿王萬立朝蹇諤古之遺直爲郡廉平古之遺愛可特贈集英殿修撰予錢五千緡田五百畝贍其家初諡節惠改忠惠萬負節慷慨論邊防要害如指掌嘗致書大臣其畧謂兩淮當并惟一制閩之命是聽又當建置制司合淝而以濠梁安豐光州爲臂以黃岡爲肘後緩急之助又令荆襄

常昭合志

卷之八

人物

七

每候西兵東來輒尾之使淮襄之勢亦合而後規模可立又論用兵屯田守戍之法敷陳反覆金之初亡也鄭清之欲謀乘勝取河洛萬曰今朝廷勇於復境而怯於備邊莫若移勇於怯爲自治之規北兵壓境帝悔用兵命學士吳詠草罪己之詔萬謂詠曰用兵固失矣亦豈可遽示怯乎邊民生意如髮宜振厲奮發以興感人心其通曉時務皆此類有文集時習編書志編并奏議共如干卷子庭字德揚官至大理寺丞

琴川志

錢仁老嘉定間爲蒲圻令登河北凌雲山有詩云遠岫青千疊寒流碧一灣此情多汨沒却羨白雲閒可想見其襟抱廖道

南楚記稱爲良吏焉

南楚記

葛觀字利用嘉定間嘗倡爲義役糾同志十七人得田四百三十八畝歲收三百斛以其入供役費里無缺征家無失業張

攀爲之記

張攀歸政鄉義役記

季逢昌字子明其先開封人南渡家許浦父世亨登仕郎逢昌以麟郎懿屬補授廸功郎調通州支鹽倉兼沿江淮東制料官所至以廉勤稱宋季海隅經北兵殘毀井邑荒寂無行迹逢昌至弊端如絲悉與剗解暨秩滿贏十五萬斤魏了翁時制江淮闢議復通城以軍券爲慮檄逢昌糴百萬緡旬月事集魏舉以練達科邱岳爲江淮制置副使辟爲桐城守至則

常昭合志

卷之八

人物

五

邑之吏民僑居池之李王河縣庭猥爲墟學校鞠爲圃逢昌爲爬梳之五閱月而縣廨學宮皆成民以窳居魏愛其才復辟清流宰有疾辭歸立義莊以贖族稱爲長者

鄧志

印應雷字德豫父武子招信軍判官自靜海來居常熟應雷登進士第知和州寶祐二年北兵侵和應雷新之任以制司命率兵突入士氣咸奮卒保其城咸淳間權兵部侍郎兩淮安撫制置使兼知揚州封靜海縣開國伯食邑七百戶卒贈端

明殿學士子德博見仕籍

姑蘇志
參桑志

印應飛字德遠應雷之弟淳祐初登第授朝奉郎權知鎮江軍調承嘉尉爲太社令擢監察御史差判鎮江府知鄂州兼湖

北運判開慶元年元兵圍鄂都統張勝誘以約降元兵信之
盡焚城外民居獨一壘存應飛自外督兵來援圍遂解除戶
部侍郎淮東總領知鎮江府卒贈朝議大夫龍圖閣學士子
正傳直傳俱見仕籍

姑蘇志
參桑志

陳元大字孔碩嘉熙二年進士仕温州教授遊常熟愛其風士
遂自侯官來徙元大爲樞密直學士襄裔孫去海濱四先生
倡道未遠又一時理學大儒皆萃於閩師承切而體驗明著
四書講義行世學者稱北山先生子某克紹家學人稱后山
先生以別其父仲子仲昇慷慨著節概厥後世業儒術有德

門之目

府縣志
合參

常昭合志

卷之八

人物

美

張士元字允甫世爲橫涇望族開慶中自外舍試中優等升內
舍爲太學詞賦第一聲譽陡起累試奏名自內舍升行上舍
事旦夕解褐而太學廢士元恬然而已初陳方叔在太學與
士元善後自合淝趨杭州以妻孥託士元家士元優廩之方
叔病且死醫藥殯殮如私喪事母至孝間關跋涉扶持風雪
中得筋寒疾足不良於行有火警急掖母行而股膝如初人
以爲孝感

錢志

周材字仲美其先道州人曾祖興裔字克振爲濂溪四世孫以
和州觀察使扈蹕南渡建炎初授武功大夫權兩浙淮東南
路制置司開闢平江鎮守沿海死難于福山賜葬虞山北麓

戰歿失右臂鑄銀代之俗呼銀手墳子曷以蔭爲常熟尉遂家縣之吳塘里材曷之孫也嘗爲沿江制機以疾在告度宗咸淳甲戌元至元十一年征南帥府檄材與諸武弁分部撫民武弁所至括銀於大姓不得則置之死材勸解多縱去兵有虜居民鬻於市者詢其鄉里贖歸其父母同里蘇氏朱氏有世讐朱賂武弁期一夕燕蘇而屠之材潛語蘇俾啖武弁朱計不行因召二氏令結婚以釋怨有謀以兵掠富室吳氏者材曰兵入境豈但吳氏無噍類將及於吾民亟持帥府招諭符文迎勞兵遂不入境來歸者皆廩食之事平置縣設官共事者上其功材曰吾前朝賤士也所以周旋患難者誠不

常昭合志

卷之八

人物

七

忍生民塗炭耳其可復希名位哉遂歸老於耕桑幅巾杖履與前朝諸老以詩酒自娛終其身焉嘗著宋史畧十六卷吳

塘集六卷子文英有澤物親民二稿及庭芳集

桑志 按盧熊府志列吳

縣

元

王珪字君璋

吳寬集作均章

其先汴人珪天稟靈悟博覽載籍尤深於

凝神養氣之術嘗以材異辟同知辰州隱居養親辭不起中歲築室虞山其居曰中陽丹房澄心觀道益有所得注道德經撰泰定養生主論還原奧旨原道集四書道統山居幽興集善鼓琴又工畫布置繁密意趣閒雅趙文敏器重之尤選

於醫晚辟穀號中陽老人年九十餘而卒其弟子高敬齋亦

知名

桑志參吳文恪集吳文定集

趙良濂字順卿祖崇驥宋嘉定間進士以雲安軍使仕吳遂家常熟良濂性純孝父必鑛爲海州節推歿於官值宋季道梗良濂奉母備經患難卒以柩歸元大德間東土大饑良濂以米二千二百石助賑延祐間又饑復賑米四百三十餘石有司上其事都省旌其門

鄧志

趙同麟字季文博學明經由儒士起家官富州知州公勤廉幹撫馭有方民感其德化

桑志

季淵字宗源逢昌子大德間授登仕郎博雅好古凡器物書畫

常昭合志

卷之八

人物

五

一經品藻真贋莫逃趙文敏孟頫愛敬之遂與締姻簡札往來子孫世藏之官至蘄州路總管子希宰爲大醫學錄居文

村

吳志

曹南金天姿剛勁動必由禮以孝謹稱聞人有善如出於己鄉人有不能制其子者南金喻以人心天理其子感悟卒爲善由敦武校尉海道運糧千戶遷嘉定等處運糧副千戶律已以廉處事有法所部咸畏而愛之嘗開洋遇大風舟人震駭南金喻之曰委質爲臣當忘身殉國進思盡忠天必祐之至大三年授武畧將軍海道漕運都萬戶府副萬戶南金數以漕事往來南北深察利害凡所興除公私皆以爲便至元皇

慶間嘗修葺學宮至治二年遷平江等處海運香糯所千戶

卒

黃潛詩陳基修學記

朱良吉芝塘人延祐乙卯母錢病將死良吉沐浴禱天剖胷割
心肉糞粥與母食之而愈良吉心痛不可起邑人俞浩齋觀
其創幾五寸氣騰出不能言俞為納其心以桑白皮線縫合
之未及期月而愈郡城宋翠巖有詩紀之

輟耕集卷參翠巖集

繆貞字仲素隱居不仕善八分小篆致道觀虞山福地四篆字
李烈士碑隸書其蹟也不生嗜古器物所寶用者有宋內府
故藏紹興丁巳邵諤所述古圖圓硯因以述古名其堂黃
文獻潛為之紀著有書學明辨

龔誌參黃文獻集

子侃字叔正詩工

常昭合志

卷之八

人物

五

玉臺小體書工楷隸佚字叔明亦能詩善畫

東維子集

曹善誠居福山其富不訾曾獻糧萬石遙投浙東宣慰副使至
順二年建文學書院於醋庫橋東祀子游範銅為祭器百須
皆具割田二千六百畝給師生廩費有司上聞除山長主之
黃潛楊剛中為之記其族人貞字元度與善誠俱以義俠稱
元季散其家資去遊湖海寄意詩酒終身不娶有十洲三島

詩傳於時

張志參鄧志黃文獻集

黃錫孫字禹疇幼聰慧讀書即知求義理長勵行檢居窮守約
不易其介善造就後學為文尚理氣詩尤清粹有穀山集子
進德明德修德皆以學行為本州教職

龔志

黃公望字子久號一峯又號大癡道人本陸氏子少喪父母邑
小山永嘉黃氏老無子見公望姿秀異愛之乞以爲嗣因用
其姓畫史會要云其父年九十始得之性稟敏異藻思日發

應神童科長乃博極羣書其學無所不通浙西憲使辟爲掾
史極禮重之然非其好也一日著道士服持文書白事憲使
怪而問之公望即引去放浪湖海所交皆當世名士開三教
堂於吳門高僧方士多執子弟禮遊錢塘愛杭之南山簪箕
泉結廬其上將爲終老計已而倦於酬應歸富春年八十六
而終善畫山水師董源晚年變其法自成一家其峯巒多礬
石筆墨高雅人莫能及公望居小山日以酒發其高曠恒卧

常昭合志 卷之八 人物

於石梁面山飲畢投嬰於水而去卒悟山水神觀後村人發
其嬰殆盈舟焉鄧志

褚不華字君實世居邑之福山自幼沈默有器局篤好經史以
名節自矢母病嘗割股以療至治元年游學隰州之石樓居
五載因附其籍以薦補中瑞司譯史授海道副千戶轉嘉興
路治中歷御史僉河西廉訪事移淮東未幾改副使紅巾賊
蔓延兩淮勢張甚不華行部至淮安極力爲守禦計賊至多
所斬獲且請判官劉甲守韓信城相犄角復上章劾總兵逗
撓狀朝廷嘉其功擢廉訪使總兵恚之乃檄甲別將兵擊賊
以困不華賊陷韓信城遂掘塹圍淮安既復挾天長青等叛

軍來攻時城三面皆賊惟北門通沭陽倚其芻餉而赤鯉湖
又爲賊據進柵南瑣橋不華出大西門會僉事兵突賊柵殊
死戰賊敗走會元帥吳德琇運糧萬斛爲賊所掠城中食且
盡攻圍益急總兵屯下邳遣使十九輩告急皆不應餓者仆
道上人爭取啖甚至父子夫婦老稚更相食力盡城陷猶據
西門力鬪中傷見執賊轡之至正十六年十月乙丑也不華
守淮安五年大小數十百戰精忠大節人比之張巡云事聞
贈翰林學士承旨榮祿大夫柱國里人建廟於福山歿之明
年追封衛國公諡忠肅其長子鳴珂元亡不仕

褚伴哥不華次子少承父教通天官遁甲諸家兵法既長武藝

常昭合志

卷之八

人物

三

絕倫隨父守淮安以沭陽路絕芻餉不繼建議海運分設船
艘購糧於平江嘉興由劉家河福山港出口達淮三四年間
兵賴以濟後僞周起海上糧不能達與父力守孤城城陷父
爲賊所執伴哥冒刃護奪同日見殺年三十六英靈不沫時
顯神於濱海里人建褚太尉廟祀焉

元史

國朝康熙中父子並列祀鄉賢

邱廸字彥啟岳四世孫幼孤養於外家孟氏成童侍舅瀆遊匡
廬白鹿洞讀書得謁熊天慵天慵異之留講席勉之以義理
之學及歸教授鄉里湯彌昌龔璠黃潛李鳴鳳輩皆推譽焉
應舉再不利遂不復求仕退讓自持人亦不敢狎侮著尙書

辨疑玉淵襍著雲麓齋文稿若干卷

姑蘇志 按盧熊府志 列吳縣然岳自鎮江徙

居常熟迪又 何時徙吳耶

虞子賢字似平世居支塘家藏書史及古今法書名畫甲於三

吳後又得朱子城南襍詠真蹟構堂貯之顏曰城南佳趣崑

山秦約爲之記宋文憲濂謂子賢博雅好古絕出流俗之上

楊維禎極稱之謂篤於士行尤孝其親云

宋金華文集參 楊鐵崖文集

瞿孝禎字逢祥性閒曠善吟詠每得佳句輒撫琴一弄闢樂隱

園於團溪上植梧竹花卉畜魚鶴與楊維禎張伯雨顧阿瑛

輩遊著有月蕉稿

錢志

廬彥昭元季嘗從楊鐵崖游詞翰皆清雅可觀自號清筒老人

常昭合志

卷之八

人物

三

吳苑 菴集

盛彧字季文世爲南沙人篤志力學工詩文元季兵亂徙家崑

山與會稽楊維禎淮海秦約永嘉鄭東吳門張遜雁門文質

河南陸仁武陵趙銓清河張恕仲輩爲友多倡和之作後以

田役謫戍道遘疾至金山泊舟強起賦詩投筆而逝有歸胡

岡集

明詩 綜

朱桓字仲威力學負志張氏掾吳桓航海上市於朝授編修官

復朝服啟儲宮辭極懇切不報以憂憤卒江陰王逢有寄朱

仲威詩張宣亦有寄朱編修詩其著述散佚所傳青暘集序

一篇殆淹博忼爽士也

龔志

錢昌宗字通寶曾祖元孫自台州徙居奚浦爲邑錢氏之始祖
至正中盜起江淮所在榛莽昌宗聚其鄉之子弟演習兵伏
守望有期防禦有策賊戒犯錢公界歲凶鄉人皆仰給焉錢志
時太初字大本博學能文詩尤俊逸與楊仲宏子壽道爲文字
交嘗仕海昌某官其賦白燕詩有珠簾十二中間捲玉翦一
雙高下飛之句楊鉞崖極稱之龔志

陸景元字子善行義端方博學有文其詩高古有思致隱居城
市以薦授清河教諭鄧士瑛字伯琚其文行與景元相上下
遭亂不仕與錢甦輩以學相砥礪吳文恪訥推爲前輩龔志

朱鏗字子新世有豐產折節讀書善行草至正末家燬於兵挈

常昭合志

卷之八

人物

三

妻子居城市飲酒賦詩視覆敗若不經心既而飄然去里僑

居長洲自號笠澤漁者隔遠人事不知所終

桑志 按張泉吳中人物志作

郡人當指居長洲時言之

徐洪字彥宏家殷富裕號徐半州尙禮好士以博雅稱元季吳
中豪右多踰侈洪一日論其幹人潘珪曰家之廢興厥有常
理吾家業盛矣必有代謝爾宜承吾業遂將田宅立虛券授
珪挈妻子築室宣化門外先隴之側布衣蔬食謝遠交游自
號桃源小隱年九十而終鄧志

明

張著字則明其先永嘉人元季游學來虞道梗弗克歸遂家焉

學者爭師之舉爲州學訓導遷淮安教授棄官歸洪武初領鄉薦卽家授膚施令膚施頻年被兵氏多竄匿著招諭拊循修廢舉隆推誠待物民得復業陞臨江同知俗尙尪許每召耆老至府廷教以禮讓訟簡刑清居家尤溫厚和謹詩文清婉純雅有永嘉集易經精義子規字運生學行能世其家錢志林大同字逢吉其先長樂人祖父相繼爲邑教職因家焉大同幼孤苦力學六經子史手自鈔讀不間寒暑洪武中以耆德薦授開封訓導罷歸永樂初敘用舊臣入覲以疾辭賜救遣還大同當明初譽望甚尊爲文閱肆衍迤徐有貞論其學在張止庵吳思庵之間著有易經奧義思範軒集子衍字裕叔

常昭合志

卷之八

人物

詩

衍字和季衍博學多才與連魯質璞張運生規同修邑志衍天性孝友從父大鼎老病無子迎養於家孫宗字思孝完字思勉俱隱居事學工詞翰尤長於禮邑之治禮者多質之稱二林先生宗子儒字應良傳字應祖亦通家禮與修邑志善篆楷同時有袁惠字宏濟亦和謹習禮容熟於鄉射儀以壽得章服府志

鄭思先字甌仲父采號曲全與兄東號杲齋由平陽來徙兄弟並學優才富著有聯璧集宋濂序之思先克承家學有文譽洪武六年以賢良方正薦授國子助教累遷監察御史爲部使者奸壬斂跡官至福建布政使兄思本字甌伯弟思宗字

甌叔俱有文行

桑志系錢志宋文憲集按錢志邑人傳云思先曲全先生子流寓傳又云東子按桑志亦稱曲全先生子是游寓傳誤也今併東人思先傳故附辨于此

陸子高原名冠孝以字行長洲人贅邑之孫氏遂占籍生而穎

悟神解師事宋文憲濂洪武初詔求遺書子高以家所藏表

進十六年甲戌賜一甲第三名進士以對策忤權要誣奏冒

籍欲置重典同榜九十八人拜疏願同寵辱太祖義之僅除

名永樂靖難堅卧不起居峨眉亭感懷詩云薊北長虹起中

原白日歆孤臣有竄地故主無歸期論者謂其懷忠植節身

名俱晦遜國遺忠與黃忠節鉞並垂不朽年七十八卒臨終

戒子孫以貢士名其墓著天文會象虹霓書事小學習成梅

常昭合志

卷之八

人物

三

菊詩評子麟鳳俱以貢官中書後邑令耿橘景具高行私謚

忠隱楊鼎熙表其墓

魚侃墓誌按魚誌云葬虞山祖塋蓋其先世已家常熟登第後遂占籍爾邑

舊志皆軼會志載之寓人傳陶貞一先民傳表出

瞿莊字敬孚孝子與嗣子以儒士薦授翰林典簿與修洪武正

韻時宋濂為學士稱為蘇之良士甚敬憚之比應制諸作多

出其手上皆稱善遷禮部員外郎陞福建叅政嘗刑一老吏

上手詔嘉獎謂吏詐則政蠹政蠹則民病朕嘗著令吏卒違

法繩之以死奈何貪官動為下人所持今叅政實姦吏於極

刑民庶有賴矣性至孝念父在遠一語及之輒流涕被面

蘇始

志六世孫依京年十八讓貲與兄入國學身代父應徭役閭

左有大議邑宰及鄉老並採其說又傾身爲人先不辭勞費
依京孫純仁字元初少穎悟依京奇其才構精舍數楹直拂
水巖下資以薪水膏火俾讀書其中一時名士瞿汝說顧雲
鴻邵濂輩皆樂與游處拂水文社遂甲吳下純仁狀貌豐偉
如河朔儉父而所爲文鮮妍妙麗如時花美女生平擺脫俗
慮不治生產不得志以死純仁孫有仲少游陳瑚之門與人
交常啞啞不出一語對知己則辨論泉湧驚其座人其詩亦
多鬱勃感激之概著焚餘集

鄧彥章字朝用父太五元時爲縣尉洪武中彥章以賢良方正
薦授監察御史爲人清介好直言嘗遇太祖微行叩頭切諫

常昭合志

卷之八

人物

美

上怒賜死以衣冠歸葬後廕一子入國學列祀鄉賢忠孝祠
孫洪字宗海有義行能詩瞿文懿景淳嘗稱之洪嗣孫韞

龔志

參錢志

鄧韞字文度本姓蔡父暄精二戴之學韞少育於外家鄧因氏
焉鄧氏多藏書盡發讀之未弱冠名籍籍起邑令楊子器深
器之有巨室坐事俾出貲葺韞所居力謝之領鄉薦再上公
車會母病遂不出關一室於母寢之右以圖史自娛尤好濂
洛關閩之學部使邑大夫就訪以公事則對欲召見之則辭
新昌呂光洵按吳延訪水利時有郡倅坐事求援韞峻却之
且深以不爲取信自咎嘗仿呂成公大事記論次古今得失

類成卷帙曰如有用我執此以往邑令馮汝弼請修邑志韋
乃稽故實嚴義例芟蕪穢補遺逸人物列傳尤注意焉聞有
嫉之者毅然不顧曰志亦史也天下是非在焉吾何敢私年
八十八卒所著有詩文集易纂要泉坊議事錄泉坊目錄常
熟志濮州志子廷直惇篤有文季子廷薦字臺山佐父修邑
志詩宗王孟畫亦精蜜母徐年老素知文嘗與談文以順適
母意母死以哀卒薦子光晟端方博雅顧端文憲成嘗延爲
館師後死於燕京其子正言年甫十三哭奔至京負骨歸葬

府志參

錢志 大臨字起西號丹邱韋曾孫幼孤稍長學於江陰黃

毓祺明亡毓祺起兵竹塘以應城守事敗入金陵獄大臨職

常昭合志

卷之八

人物

三

納橐餽毓祺坐法死大臨號泣守喪鋒刃之中贖其首聯之

於頸棺斂送歸爲黃冠以終

黃宗羲墓誌

施顯字孟微邗會試皆第一選入翰林爲庶吉士授前軍都督

府斷事又署北平按察司事坐累謫遠州

州傳應制賦詩有日出光華應四方

之句以疑似得罪或云公與張洪善洪被誣公適在廷欲言洪目止之以此坐謫踰年乞留中自效

拜江西道監察御史卒顯篤志於學晝夜讀書帳中爲文詞

甚典麗子緒哀其文名兩魁遺稿緒字功永精軒岐業授方

投劑多所全濟

錢志

鈕衍字公裕洪武中由邑庠考取入胄監擢知常德府招集流
亡時有妖人挾左道爲民害衍論誅之郡人稱快任滿當遷

父老伏闕請留特陞雲南叅政調廣東政尙清簡以廉白稱

金亮字伯熙洪武末貢入太學有詔國子監拔學行俱優者十

人授以要職亮與焉擢工部主事時干戈未息亮同刑部郎中袁淮督餉五十萬赴邊還朝遷員外郎再被命督餉江浙採木四川取官材四萬餘株督造承天門鹵簿金輅事奏免誣援爲匠者萬計市筏龍江灣却絕餽遺晉郎中以勞卒官張修撰洪稱其公忠廉介通達國體云從子璿字公獻母歿哀毀三年未嘗對客笑語曾孫鶚寬鶚字世英以太學生謁選居上考授肇慶推官民獠雜居地號難治鶚莅以清謹治

常昭合志

卷之八

人物

三

獄不苛遂著聲譽德慶州猺獞作亂鶚以恩威宣撫之不煩兵而下厯署陽江新興高明恩平事四邑皆殘破之餘綏輯

周至民賴更生

管子

子甸字允治由吏仕湖廣河泊大使治河

江夏著有勞績扶艾櫬南還江有反風之異人稱孝感

陳甸

子諫字汝忠性孝友爲蒙師以倫行勗其徒晚與賓筵甸孫

逢嘉亦抗直有義聲寬字維裕歲貢生性坦直每與當事爭

民間利病當事敬禮之子萃號小澗孫和號夢澗曾孫率祖

逢揚俱能世其家學和行尤高壯失偶不再娶

舊志

黃鉞字叔揚少好學父令督耕鉞從友人家借書竊讀縣舉賢

良以庠生授宜章典史建文元年舉湖廣鄉試明年第進士

授刑科給事中三年丁父憂方孝孺弔之屏人問曰燕兵日南蘇常鎮江京師左輔也君今雖去宜有以教我鉞曰三府惟鎮最要害守非其人是撤垣而納盜也指揮童俊奏事上前視遠而言浮心叵測不可任蘇州知府姚善忠義激烈有國士風然仁有餘而禦下寬恐不足定亂且國家大勢當守上游兵至江南禦之無及也鉞至家依父殯以居燕兵至工上善受詔統兵勤王以書招鉞鉞知事不濟辭以營葬畢乃赴既而童俊果以鎮江降燕善爲麾下縛去鉞聞國變杜門不出明年以戶科左給事中召自投於水以溺死聞故其家得不坐

明史原傳

列祀鄉賢明季諡文獻

蔭案原書明史原傳下有志錄頂格四字當衍

常昭合志

卷之八

人物

堯

國朝乾隆四十一年追諡忠節

姚伯善字德全建文初舉於鄉永樂中擢兵科都給事中被命與尚書夏原吉治水蘇松復請粟三十萬石賑饑後命採木廣西涉險冒瘴卒於全州逾五十年孫榛字叔用隱居務學

後徒得資與弟鶴偕往迎柩歸葬沈周有詩紀之

錢志參石田集

衛浩字季洪永樂初以才行貢入監與修太祖實錄擢監察御史奉敕照刷幽薊諸郡文卷宿弊一清時仁宗在東宮守北平浩入見應對稱旨賜經書食物丁外艱歸起巡遼陽風裁凜然在朝屢進讜論上識之曰長而御史直臣也於冤獄多所平反邊將繫送從征後期者至京法當辟浩請使立功自

贖出爲江西刺史轉福建時有侍郎某巡視閩中得專刺舉
藩郡皆入賄以冀免浩持其不法將奏之會浩遣家屬回某
使人潛伺於途括其裝無所得以舟有小鉦爲浩擅用軍器
鍛成浩罪遂勒停其官子楫字宗濟端介有父風淹貫經史
以學行教授於鄉

桑志參
鄧志

張洪字宗海號止庵木侯姓張炯養以爲子炯字鑑翁元末與
友避兵崑山友載聲樂自隨炯曰方避患不知斂戢禍將及
矣不聽至巴城湖遇盜罄其資炯惟載米百石聽盜自取人
不過一石以餘米濟友既歸將酬之炯堅拒不受其他絮凍
舖飢樁死靡所不爲洪十歲能默誦詩書十一補諸生十六

常昭合志

卷之八

人物

卑

去學賈家以饒二十一歲坐隣人累戍雲南請於帥臣免孕
婦田作時麓川亂事下三司議洪言於都司曰麓川昔擁三
十六甸之眾入我郊保走都督馮誠憫然有輕中國心屺於
定邊之役羈縻至今其下畔亂天贊我也然旣襲冠帶我有
急不拯不仁有亂不匡不義盍輔順討逆納故酋使復其所
及其未定裂宣慰司爲二彼無國而有國德我必甚瓜分則
勢弱不敢復與中國爲難矣西平侯沐春奏從其策事遂平
以通經薦爲靖江王府教授永樂初授行人奉使日本卻其
餽金二年使吐蕃飭修茶馬舊政四年使遼東其年秋緬甸
宣慰那羅塔殺孟養宣慰刁木旦而併其地詔洪往諭返侵

地立孟養後緬人謾言刁木旦子孫已盡洪曰中國之法罰弗及嗣刁干孟逐思倫發誅止其身其子爵位自如蠻夷所具聞也爾奈何孥戮鄰境宜慰天子可不問乎他境尤而效之戕汝家滅汝種亦聽之邪今日之封殖孟養亦爲爾子係計也比六往始聽命已慮洪入朝發其悖逆狀謀賂之不可則鴆殺之洪知其情諭之曰爾毋以賄汗我我具以爾善意歸報天子天子必悅幸得赦爾罪若納爾賂我且先得罪敢言事乎緬人媿服乃發使獻方物謝罪以薦入文淵閣修永樂大典充副總裁官洪熙改元進翰林院修撰宣德初修太宗仁宗實錄旋乞歸楊士奇重其行業欲進秩勉留之不可

常昭合志 卷之八

人物

聖

遂致仕年八十四卒洪謫戍十五年登朝三十年使車往返四五萬里所至不辱命以其暇作爲文章數牋典則不事藻飾而理自勝在翰林時詔誥多出其手既歸益務根柢之學會粹折衷羽翼諸儒所未及著有四書解義周易會通尚書補傳詩經正義春秋說約禮記總類歷代詩選史記要語續文章軌範琴川新志攬轡集南夸書日本補遺志清溪集翰林類稿學選詩和陶詩小學翼贊使緬緣歸田稿共若干卷列祀鄉賢與吳文恪訥耐祀子游祠

明史參姑蘇志錢志思庵集止庵自序

張信字孟孚少負奇氣通經學舉於鄉授建寧府教授學矩修飭士遵其教時不次用人擢國子司業信謂國學師長必以

才望豈容躡處辭不拜乃投助教久之陞翰林檢討著作爲同列所推名能舉職宅心誠懇人信服之

吳訥字敏德號思庵父遵道任沅陵簿坐事繫京師訥上書乞身代事未白而父歿益感奮力學永樂中以醫薦至京仁宗監國聞其名命教功臣子弟成祖召對稱旨俾日侍禁廷備顧問洪熙元年侍講學士沈度薦訥經明行修授監察御史敬慎廉直不務矯飾宣德初出按浙江以振風紀植綱常爲務時軍犯逃者往往令家人妄懇逮繫至千人訥請嚴禁卽寃不得越告從之繼按貴州恩威并行蠻人畏服將代還部民詣闕乞留不許五年進南京右僉都御史尋進左副都御

常昭合志

卷之八

人物

聖

史正統初光祿丞董正等盜官物訥發之右通政李畛者奉使蘇松行事多不謹訥微誠之畛不悅誣訥稽延詔書等事訥疏辨互爲臺省所劾俱逮下獄旣而釋之英宗初御經筵錄所輯小學集解上之正統四年以老致仕訥博覽議論有根柢於性理之奧多所發明所著皆可垂於後歸家布衣蔬食環堵蕭然周忱撫江南欲新其居不可家居十六年而卒年八十六謚文恪鄉人祀之言偃祠明史訥弟諤字正德性簡重不妄交訥孫涓字原伯少稟家教性度溫粹動止有儀檢登進士時訥尙無恙時遺書訓以莅官之方淳奉行不敢失墜擢御史出理鹽法於淮揚以清謹振職聞卒於官淳子堂

字子升登進士知蠡縣擢監察御史清戎江西時宸濠結納劉瑾請復天順中所革護衛軍屯田及乞自造兵器堂抗言危論濠爲氣奪劉七之亂命監陸完軍有節制得賜麒麟服遷大理寺少卿時江彬被寵欲誘上開邊釁上將再榆林宣府百官泣諫堂大聲隨之上怒調知鶴慶府俗尙佛鎔金爲象堂銷其金立學宮一郡向風嘉靖初召故諫廵幸者還中朝而堂上章乞歸得以原職致仕

姑蘇志參錢志按會倬邑志引馮復京先賢事畧

日訥爲言子游苗裔其先坐事亡匿以子游封吳公改姓吳氏名日訥藏言於內也王峻府志以龔志據訥自序辨其本姓非言今考訥自序初未辨其本姓非言覆查龔志訥傳後補敘訥之諱其本姓繼引訥家譜自著疑詞初未駁復京事畧之說爲不然馮氏文獻距訥不遠事畧自確王峻所述龔志殊無根據

常昭合志

卷之八

人物

壘

章珪字孟端父煥文字耀卿嘗教授他所經年歸積白金十二兩見有雉經於厠者悉出金代其稅徒手至家婦子相向歎咤煥文欣然而已珪舉賢良方正授廣東按察司知事擢監察御史泣殺重四十七人廉知其寃三上疏請之俱減死按真定四郡歲旱奏蠲逋賦三十萬石正統八年以疏論大臣罷歸時予其直著有全名集子儀表格律楷儀字來鳳以鄉薦任荊州府教授陞國子助教連典山西河南試事澹於世味年八十餘卒儀子洗字明之舉人江夏知縣表字翔鳳舉南京解元聯捷進士選庶吉士出爲行人遷刑部員外郎晉郎中遷廣西左參議時韓襄毅雍討平藤峽猺築亭紀功屬

表爲文將登薦劾而表恃才傲睨韓不憚遂罷歸爲人志銳氣剛崖岸壁立文撫樊宗師工於鍛鍊有集若干卷

鄧志參先賢事

署格字韶鳳登進士授南京工部主事行視中河築隄數千丈以抑水暴故事漕卒輓船至者計伍出錢名爲均給而商有稅奸吏乾沒其中格悉罷之遷刑部郎中當塗民聚黨盜官蘆格曰此竊盜不當坐殊死清涼門吳虎者爲暴民間則重按其罪曰吾令一境帖席也出爲廣東按察副使分巡海道琉球變人市易他國漂至香山武臣欲殲之以爲功格曰此市舶耳非寇也奏遣之改雲南按察使孟密叛其酋罕穹法事下三司議格言彝人保險相噬未易翦滅往者麓川之

常昭合志

卷之八

人物

器

役得不償失可鑒也宜事緩輯徐圖進取遷福建左布政使上杭盜起格以計誅其渠率餘黨解散召爲南京光祿寺卿遷大理寺卿致仕寺官清慎家無餘財郡守以所居隘請斥閒田爲別業不受其在刑曹嘗平反王某獄王登第知應天貢舉謀所以報格戒二子勿應試其不苟得如此卒賜祭列祀鄉賢子淦字清之以父蔭任寧波經歷孫棨字宗肅舉於鄉聞湛若水呂柟講學兩遊其門授知單縣塞黃河決口以通漕道釐正兩稅敝法單人思其德與宓子賤巫馬期並祀稱三賢祠遷安吉州釋寃囚百人有枯竹復生猛虎北渡之異再遷永州府丞征勦麻陽洞獠寇奮勇先登擒獲渠首捷

聞賜賚甚渥以勞瘁卒官歸太僕集棨弟宗實字若虛以舉人授

歸化知縣廣中大盜數千突攻邑城宗實率吏民日夜守禦

出私橐賑饑賊退民賫金帛告償宗實曰吾民僇力為令守

令無以犒士方用自愧安用償乎後盜復大起所過索獻千

金乃去宗實獨不與相持七月城不可下賊射書城中特為

賢令完此城竟退氏族志律字鳴鳳登進士授刑部主事遷員

外郎有姑以亡男之兄強耦其寡婦婦不從訟婦不孝有司

鍛成罪律鞠而釋之有卒縱其妻與千戶通求無厭千戶不

能應則殺之并殺妻提二首以殺姦告律窮詰正法出知保

定府初父珪官御史時以忤臺長見黜至是臺長已歿而其

常昭合志 卷之八

人物

巽

子坐事繫保定獄人謂律且甘心焉律歎指其坐曰吾敢借

三尺法修先人之怨乎陞雲南右叅政安南遣使人貢請道

臨安律曰臨安道徑彝欲益習為寇耳執不許進廣西右布

政使荔浦獐叛律帥泗城兵由象武路扼陳郵口以當賊衝

遂擒其渠魁以功加正二品俸轉貴州左布政使擢右副都

御史巡撫雲南與巡按御史不相善會其人以考察斥而律

還南京理院事遂許律受彝賂皆檻致廷尉按驗無實御史

請佃塞外律亦免官著都憲奏議春澤文稿鄧志參王楷號

羅庵不求仕進諸兄皆貴獨任家政怡怡如也度字虞鳳煥

文孫與從兄表同榜舉人選汝州訓導再任武邑典山東浙

江稱得人擢知閩清再補建始以德化民民甚戴之以疾歸
退然如未宦者

李傑志

魚侃字希直父宗信有孝行修德行善鄉里稱之侃登進士任
刑部主事改工部從都御史王竑往清河督運河多淺漲帝
梗漕舟侃奏置淺舖夫時加疏濬運遂通撩淺置卒自侃始
陞刑部郎中出知開封府斷決明允苞苴迹絕人謂其治可
繼包孝肅母亡家人往訃值侃方視事未敢遽曰侃覺之長
號以出即日行不持官府一物歸無以爲資或日罷炊所居
敝壤病臥雨溜濕牀簀寒衾單薄家人愠見曰開封守亦有
今日耶侃夷然自得也同時錢布政昕亦勵志節而家本饒

常昭合志

卷之八

人物

巽

人爲之語曰富不愛錢錢昕貧不愛錢魚侃生辰客爲壽壻
王韶方居喪以素服往賀客止之侃遙見招之執其手曰真
吾壻也歿祀鄉賢祠

姑蘇志參章珪銘

程式字以則號可庵母夢梵王授記而生登第授南京職方主
事夙夜自勵飭部務陳邊害以邊軍苦寒特疏請皮襖又條
上兵政十策轉北京刑部員外郎讞獄明允正統己巳也先
入寇中人王振議親征式抗疏諫復與諸臣連章上請語涉
振遂詔從行八月至大同前軍報敗式泣諫不可往振怒謂
動搖軍心將加不測令掠陣既駐狼山土木驛師大潰虜圍
四合矢石亂發死亡以萬計文武將吏倖免者併日夜趣入

關倉卒間失英宗所在式裏瘡號泣遇同官太常卿王一居
御史尹竑夏誠行人羅如塘等嚙血誓曰吾輩奉駕出不奉
駕歸而偷生竄伏者有如此盟隨謀知駕陷虜冒死赴行在
侍左右尺寸不離虜踞前嫚語要英宗如其禮式忠憤慷慨
力持英宗不爲動虜磨刃斷所持御服式指節嚙落更伏駕
前藉地爲障虜排刃橫砍式張目奮罵虜眾前磔一時隨侍
者無孑遺式兩股墮地虜大噪擁英宗去初式之將行夢人
曳偏裳倉皇入室示以土獸俄折兩足踏道左竟爲土木截
股之兆云式容止端凝和粹對人恂恂如不勝遇事輒震奮
敢先工詩古文語及古忠義節烈每託賦詠其弔顏杲卿有

常昭合志

卷之八

人物

畢

罵賊一場明大義殺身千古不圖名之句居官簡約嘗擬趙
清獻之爲人以琴鶴名兩奚奴旣被難琴奴伏積屍下得不
死訴式被難狀以衣冠歸葬景泰四年錄死事諸臣以原官
受階奉訓大夫蔭子嵩爲國子生撫按請立專祠列祀鄉賢
所著有兵政十策葩經衍義明史參李傑傳顧仲芬集嵩字希仁仕至延
平府同知元孫大經字可權以舉人授樂昌知縣地壘險而
介於猺且錯以宗藩宦游者往往爲貨賄所餌大經矢志砥
節無所緇染和椒利甚鉅廣人每假藩府行賄以冒禁大經
不爲動持禁益力刑獄多所平反俗工釀毒恒自毒以誣富

人大經每爲洗白敘州通判卒

錢志參嚴文靖志

程宗字原伊式之族登進士官刑部員外廣昌有大臣當英廟復辟畏罪自盡仇家陷其子以弑逆久不決宗往讞得自出知吉安府訟獄率手自裁牒吏無所容其奸再除真定改武昌陞四川叅政陝西布政使擢副都御史掌院事巡撫陝西西番滿松諸族屢入寇宗率師禦之直抵洮川寇遁去丁內艱服將闋會木邦孟密爭地相讐殺木邦首罕竈法潛使人通金齒鎮守太監王舉謂王師若征孟密當輸重貨舉以語鎮守太監覃黔平國公沐琮巡撫都御史吳誠三人信之奏聞廷議謂孟密險遠用兵非使當遣大臣諳曉夷情者往諭之卽家賜璽書起宗馳赴雲南與眾議撫輯皆不樂宗曰吾

受詔撫綏不言用兵也乃與鎮守馳至騰衝孟酋曩罕弄與罕竈法皆懷疑未肯出宗使人詰其故曩罕弄叩首言爲人所間遣其酋以方物入貢宗具以聞明年宗獨至南甸罕竈法率其族五百餘人來見宗宣勅諭之皆聽命乃踰南牙山曩罕弄遣人來迓前至孟密兵眾萬餘分布營外宗令譯者宣勅切責之皆伏地叩首謝罪遂命三司頒宴檄木邦以所侵寨歸孟密立孟密安撫司屬雲南布政使司於是羣夷皆輯睦朝廷以宗不用一兵而平三十餘萬獷悍之眾轉左副都御史留撫雲南明年召爲刑部左侍郎進南京工部尙書蘇銓者久從宗於南有勞績宗還朝銓冀得守金齒宗拒之

僅得鴻臚丞遂謗宗嘗入夷賂憲宗命御史覆之卒無實因請致仕歸卒宗事母孝遇諸弟厚仕垂四十年家產不加於舊爲文典則詩尤工有官游撫彝二集奏議二十卷列祀鄉

賢

明史參
鄧志

呂困字希顏父謙人有劫其修脯者越三載欵門謝罪倍息以償謙不受復攜季女至郤之不可撫爲已女擇良士歸之謙四十無子至是妻有妊遂生困焉困幼好學文有奇氣舉進士授行人轉監察御史巡歷湖湘以舉職聞陞湖廣按察副使武岡猺寇竊發困會師討平之進雲南按察使陞左布政以資當遷時執政方納賂使人諭意困曰與其枉節而遷不

常昭合志

卷之八

人物

吳

若納祿以歸竟罷其職

鄧志

朱驥字漢房登進士除行人遷監察御史慮囚淮南多所平反再按永平滯獄出株連者數百人大學士李賢方執政尚書金璉附麗之驥抗疏劾璉并侵賢時長洲練剛亦爲御史彈劾不避諫院爲之語曰朱驥手練剛口出爲廣西僉事備兵南寧有土夷秦呂二姓以奪宗事聚黨相殺會兵討平之以功遷左叅議嶺表夷獞嘯亂驥獻十策於安遠侯柳慶其一請城桃花江徙民居之扼賊入寇之門慶從之遂大捷都御史吳琛薦其可大用會卒

韓雍志

孫大韶字象虞以貢官建昌

教授表章劉一峯之賢署南城知縣時大旱開釋疑獄遂得

雨氏族

孫紀字維政正統辛酉舉人授南考功司主事遷刑部員外守

官廉勤治獄必反覆詳讞求生不辜秩滿將遷遽乞休優游

林泉自號醉鄉傲吏錢志參 錢溥志子艾字世節性好俠父喪致十

郡客肆力學問學詩於沈周嘗依韻和周所作落花詩周大

激賞因畫落花卷為贈與崑山周詩長洲吳寬皇甫冲兄弟

友善鑿虞山陽崖得美泉又剗崖石結廬以待游者篤故舊

周窮乏坐此家益貧艾不自少貶鄧鞅題其畫像云開門延

十里不羈之客赤手鑿百仞未關之山至今傳之精品鑿工

繪事初學黃子久晚好王叔明所居有園亭水石之勝在琴

常昭合志 卷之八

人物

辛

川之西自號西川翁艾二子舟字取渙年四十一始鄉薦明

年登進士遽乞歸養內艱服除授工部主事修通州倉兼管

磚廠內官其事甚驕倨舟援儀制折之闔為之戢錢志參張 回之墓表

耒字取益篤孝友重然諾精醫理待詔太醫院錢志參皇 甫訪志七

政字齊之耒子七歲能詩才名籍甚所居西爽樓清暉館蓄

古鼎彝書畫客至觴詠其中晚年貧甚皆割去僅存長松一

株吟嘯其下蕭如也撫臣張佳允造廬定交與講鈞禮時八

兩賢之自為贊有云葆光匪晦養志實榮其志趣可知矣著

有松韻堂集十二卷子森字蘭畹林字芝房幼時父友皇浦

汴王世貞等時常過訪森兄弟周旋函丈嘗命二子即席賦

詩森得燈字有但攜明月去猶是別時燈之句相與摩頂激賞森以舉人官弋陽令有善政陞高州府同知有映雲山居集林以貢授高郵訓導森子朝昌字來禹與弟朝翼同出顧涇陽之門讀書取友士林推重子朝肅朝讓陳志樓字子虛號百川舟之孫鄉舉後久困禮闈適同舉士當分校意屬之樓堅拒銓補湖州推官嘗攝郡篆捕論巨盜一郡帖服然非其好也會李攀龍王世貞相繼爲浙臬副知其才雅相引重而同列挾進士資多目懾之改調漢中遂致仕歸杜門較讐藏書逾萬卷手自校讐畧無脫誤每讌集雅譔四座盡傾或以滑稽寓之文章爲古文詞法歐蘇所著詩文及吳音奇字四

常昭合志

卷之八

人物

三

卷子允伽字唐卿好異書手自繕寫父樓有藏書之所曰丁冊度比弇州萬卷樓允伽更增碎金斷璧之秘所著有艷雪齋集王臺外史談觚等書善填南詞允伽子江字岷山亦能詩袖字遂初樓從兄才情流麗歐詩樂府膾炙人口虞山北麓有古藤蜿蜒如龍袖營別業名曰藤溪與名流王伯穀莫廷韓輩觴詠其中著有藤溪稿神遊雜著等作陳志

孫朝肅字恭甫登進士授刑部主事光宗不豫李可灼進紅丸朝肅以書讓大學士方從哲不濟宮闈隱蝨有負先帝之託輦下竦然嗣諸正人昌言排擊實自朝肅發之出知兗州府當白蓮賊亂朝肅單騎赴任縋入城鼓勵士民悉力戰守賊

平陞廣東副使遷布政先是劉大夏官此有却金事朝肅常以自勵失巡撫意鑄一級歸爲人伉爽負氣能詩朝讓字光甫登進士愿官刑部郎出知泉州府內艱服闋再補泉州泉人權呼如慈父母復至陞建南兵巡副使築城捍寇民以安枕旋晉按察使轉江西布政不赴年方逾艾林居終老杖屨所臨婦孺懽悅詩文不事雕績草書學孫過庭年九十而終

陳志

錢昕字景寅沙盆人曾祖甦字更生博學專攻性理洪武十年應詔上書至中書長揖不拜左右以爲言甦曰未拜天子不敢先拜丞相遂於本省聽辦事數月不得召會有詔募撰祭

常昭合志

卷之八

人物

五

元幼主文甦亦擬撰以進上大喜即日召見欲官之以老疾辭賜歸卒甦初名沂字伯與洪武初坐事當刑其子廸代之死故易今名次子申得字鳴謙亦以孝友稱昕爲申得孫登進士擢御史年甫踰冠獨持風裁巡按浙江有勳臣家奴暴橫立杖殺之出知荊州府以清謹稱荆民謠云荊州太守蘇州士千里家家知姓氏太守衣蘇州綺太守食蘇州米荆民食飽荊州米荊州衣被荆民體安我父母育我妻子女織男荆樂生理不願太守一品貴只願太守千百歲後歷叅政布政熟於尚書箋疏詩文純雅有典則桑志潤字惟霖昕族弟席有豐業性夷曠喜近林藪詞墨士每月集善詩者於家爲吟

社詩温麗可誦書傲宋仲温

錢志

錢承德字世恒父昌字允言性方嚴博學工詩與武功伯徐有貞學士錢溥僉憲劉珏大叅祝惟清輩結詠社著有未齋集承德登進士知阜平縣奉檄決平山贊皇兩縣滯獄皆得其情擢御史巡北城兼九門鈔法出稽兩廣錢穀又理山東鹽法巡視河道值朝叅失期左遷犍爲知縣縣境連馬湖有鹽井北山竈丁負險不應徭役承德選有才幹爲眾所服者爲耆長俾論以聽法俱聽命丁外艱服闋遷知蘄州復以母憂服闋改冀州擢山東僉事命督京衛真定河間德州天津各衛屯田遷副使飭理密雲邊備兼永平府衛屯田訟牒邊關

常昭合志

卷之八

人物

三

堡障修其廢壤以勘獄事降知新興州除福建鹽運司同知罷歸承德所至持風裁不爲骫骳取容以故數起數躓家構西園有奇石五名五老峯日與名賢輩觴詠其中而與從兄仁夫倡和尤多有五老峯集若干卷

管志

錢仁夫字士宏甦元孫少學於陳九疇聞性理之學舉進士年五十四矣不肯隱年以便仕進授都水司主事分司臨清領衛河提舉司兼理漕渠開事會省冗官兼理磚廠還朝改虞衡司北使入貢攝主客事輸役匠免役例出銀解部歲久匠戶亡耗過半而官徵不已里役以爲累仁夫請徵清出匠戶以補其乏而蠲其舊負曾尙書鑑是其議會孝宗以逃匠問

曾對如仁夫議乃盡除無徵者監稅浙江往時稅不及額官輒益稅以足仁夫竟以實稅解還朝遷繕部員外郎逆瑾方竊政遂引疾歸後瑾益張誣逮中外官一時清望皆不免人服其明決性好客座嘗滿內行甚修與弟信夫友愛置義莊以贍族博綜羣籍爲文雅贍詩有唐人風著有歸閒文纂八卷水部詩歷八卷和高季迪吳中百詠鳴鶴餘音各一卷楷隸畫山水竹石有逸致號東湖居士年八十五卒子璠字國用舉順天鄉試任奉化縣六年不以妻子自隨廉潔孤介雖自食之粟必取給於家尤留心民瘼修復倪家碑表章戴德彝靖難死節創祠曰顯忠陞雲南府通判致仕著有奉化

常昭合志

卷之八

人物

壽

縣志五經旁註古文會編詩韻釋義

管志參審
波府志

有威字惟重

甦之族王府教授綏曾孫肆力爲文辭登進士授行人陞刑部主事裕邸有闖奴犯法大瑞李素懷以私憾縛闖屬有威窮治時景王未之國中外交疑有威謂奴罪不及主必引繩批根浸淫及裕邸爲不便乃抵奴罪置闖不問素懷恚甚構蜚語中傷謫德州判官遷登州通判攝府事文登巨豪相聚竊礦縣官不能制遽以反告有威曰何事張皇亟草檄諭渠魁自縛詣吏餘悉貫不問豪黨賂所親求解不得忌者遂以是誣有威時已遷南京刑部郎中猶中以考功法罷歸有威恒衷熱腸遇人有急嘗傾身爲地入仕籍十九年囊無餘蓄

年八十四無疾而卒著有廣川集後遷長洲孫位坤郡籍崇

正辛未進士

申時
行志

朱鉉字良玉父亮以徭役居京師鉉領順天鄉薦試事於禮部會御史員缺詔選用貢士卽授江西道巡視五城出按宣府請定占役法衛官不得占士役於家國法邊墻二百里外屯牧者不問一日有數人馳近塞邊將獲之解於京鉉援例請釋以息怨會坐不糾儀謫桐廬知縣久之復前職出按南畿值歲饑發倉賑民以疾卒子紳字朝佩謹靜好學父所交居政地欲引之紳辭焉孫召字維翰以責任漳浦主簿遷益陽縣丞署漳平令修漳平志御史稱以文學飾吏治以古道濟

常昭合志

卷之八

人物

五

時宜云祀漳浦名宦著有四書口授葩經日記東河文集曾孫孔暘字國裳以責任都司都事

鄧志察
錢志

顧立字成夫以邑從事除烏程主簿縣境窪下恆被水立董農築隄民遂稼穡縣有置郵遠長興路僻多虎患移之坦道閩寇竊發立督造兵器先期畢集奉委督餉軍無匱乏處州盜起都御史軒輓率師征討檄立守險用立策平之捷聞賜鈔絹遷雲和縣縣方新設民風獷悍立撫字有方臺司交薦擬擢郡守遽卒著有流芳稿轅門集行世雲和人立祠祀之龔志曾孫玉柱字臺卿登進士授南京工部主事改北晉郎中外艱服除補刑部坐祈穀失陪祀謫道州同知有異績累遷至

山東副使庚戌秋俺答入塞玉柱適以慶賀入都被命監軍時變起倉猝士伍捨攘玉柱躍馬塵埃中無暇休沐因得疾會嚴嵩又以他事嫌之遂致仕性故伉直喜任事先是邑令沈宏彝以常熟沃瘠不同嘗計畝定稅三則豪猾不無詭匿玉柱議更度田攤稅乃躬行阡陌操尺量而圖之雖未盡行奸弊稍稍得清倭警首捐金助城役及倭薄城下堅守東南隅身冒矢石散粟予民佐邑令王鈇守白茆三丈諸浦俱有策畧居恒好談節俠事抵掌慷慨恨不一致身其間王志堅府志子耿光字汝觀少豪舉結客壯年折節精於治家兼習吏事知縣段然嘗委以勘荒鑿河耿光日習經理勞瘁以卒顧鎮支溪

常昭合志

卷之八

人物

美

志小

陸景字孟昭景泰初進士任刑部主事晉郎中以文學飾吏治性仁慈多所寬貸兩按河南山西大獄俱稱明允尋陞福建右叅政巡視海道先是有通倭商船掠殺人景禽之築漳泉二郡海隄海水不能侵郭閩人服其威惠性嘉延攬篤於故舊所至居舍或僦居必飾軒亭蒔花竹儲名醞甘泉珍錯以待客過必留與觴飲至夜未已緣此得豪俠聲王世貞傳參楊循吉吳中

往哲記

繆樸字尙質通經學邑中髦士多游其門登第授行人遷南京刑部郎中有坐重法冀免以燐鵝餽中實以金樸竟發其事

置諸法年逾六十致仕題其曰草窩有草窩稿鄧志沈字元濟

樸之族隱居樂道卜居西莊構南臯草堂季簾爲之記子熊

字陽瑞嘉靖間貢性豪宕不事生產張京安志熊子元吉字伯旋

元亨字叔通元吉遊瞿文懿景瀆門事母孝人有犯者不校

也邑令三表其門工書畫年九十餘卒元亨舉人陳禹謨志元吉

子開文字茂宏有孝行積學味道爲鄉祭酒開文子祖命字

令憲善體親意嘗登舟爲艙門所格受傷忍痛歸候父既寢

含血方吐於地惟恐親之知也舉於鄉將上春官富室有以

重贖相貽欲約婚祖命曰取婦須不如我家者并其贖却之

錢志

常昭合志

卷之八

人物

三

楊集字浩然祖福字貽穀與黃忠節鉞善集登進士觀政兵部

時禮部郎中章綸御史鍾同以疏請復儲事下獄集上書于

謙曰奸人黃竑獻議易儲不過爲逃死計耳公國家柱石獨

不思所以善後乎今同等又下獄矣脫諸人死杖下如清議

何謙以示王文文曰書生不知忌諱要爲有膽當進一階處

之乃以集知安州以上參採明史鍾同傳州當兵荒後集省徭役停諸

所不便值大水郡倅來視災集以潦浸難履畝倅命閱民資

議徵集不可貴戚奏求莊田內臣出畋畿郡集皆力爭之歲

荒上官行勸分令以多寡爲殿最集謂穀貴而勸之是益重

其貴耳命里胥籍民出穀之數而緩其入倅猝至人爭納無

後期州有牧馬詔令種駒倒死皆免他日馬不繼令復徵集令以不息牝馬充數民困以紓會同事坐法連集遂罷職歸卒祀鄉賢子舫字宏載以鄉舉授知莒州政尚清簡導民力本平其賦役以計擒劇盜李花作賢賢堂親聚士以教攻古文詞其文明整善述事情著有水利書一卷言水事者多取之多記邑中故事有集若干卷鄧舫子儀字夢羽登進士授工部主事轉禮兵二部郎中時有人貢者瀆擾都下邀厚賞儀召其酋長宣諭朝廷威德靡不讐服夏文愍言雅重之諮以謀議太常樂典廢缺命儀考訂纂成樂書爲同事所格時論惜之秩滿陞山東副使備兵羈州文愍以詞餞之有可惜

常昭合志

卷之八

人物

五

文儒却使提兵盜賊區之句儀念用違其材遂移疾歸以讀書著述爲事有南宮集高坡異纂行於世平生耽嗜古構書萬卷樓多聚宋元舊本法書名畫鼎彝古器亦稱是江左推爲博雅然性高亢傲睨一世爲時所嫉一朝構禍家貲蕩然儀亦尋卒

沈應元志

蔣紱字洪章祖安字仁伯隨其父榮自蘇來徙洪武中安弟懋以累謫戍開平安時爲諸生自詣御史謂懋弱不任荷戈疆場且老母所種念不若使安往幸得爲國家竭犬馬用且以慰老母餘年御史義而許之

楊伸志

紱登進士擢試御史石亨

有母喪朝士縞素往弔紱獨不預被繡衣騎而過亨怒欲以

事中之不可得會有前進者與紱有隙譖之都御史李實黜
知光山縣改吉水憲長嘗以事攝紱託疾久不往會王尙事
翽爲吏部雅知紱將以大理召時憲長已長寺持故憾沮之
遂不果用解職歸肆志博覽文詞莊密書法趙子昂兼通醫
理著有無礙等集子純字子勵有俊才舉人滑縣教諭舊績志
字洪勳紱之弟以舉人授開化知縣發奸摘伏人不敢欺宏
治初更造版籍里胥並緣爲弊訴訟數千績從容剖決務得
其平歷九載乞歸士民號泣攀留家居教子弟處宗族咸盡
其道年八十卒李傑誌 孫沔字盈甫博綜羣籍時稱書淫曾孫
樾字德山有學行邑令段然虛懷延訪樾對以兼聽獨斷段

常昭合志 卷之八

人物

五

用此遂爲循吏蔣氏世譜 五世孫國瑚字成甫年十三卽能詩晚
舉鄉飲賓著鳩適集國瑚子鵬起明末避兵時嘗棄米載其
鄰王銘盤全家人鄉以免於難錢志 綺字洪煥紱季弟喜爲詩
文沈鬱有密緻子欽以直諫死處之泰然王文恪整以爲有
福年九十六卒有集若干卷陳察誌

蔣欽字子修宏治九年進士授衛輝推官擢南京御史數有論
奏正德元年劉瑾逐大學士劉健謝遷欽偕同官切諫瑾大
怒逮下詔獄廷杖爲民居三日欽獨具疏曰劉瑾小豎耳陛
下親以腹心倚以耳目待以股肱殊不知瑾悖逆之徒蠹國
之賊也忿臣等奏留二輔抑諸權奸矯旨逮問予杖削職然

臣思猷猷猶不忘君况待命衽席目擊時弊烏忍不言昨瑾要索天下三司官賄人千金甚有至五千金者不與則貶斥與之則遷擢通國皆寒心而陛下獨用之於左右是不知左右有賊而以賊爲腹心也給事中劉蒞指陛下闇於用人昏於行事而瑾削其秩撻辱之矯旨禁諸言官無得妄生議論不言則失於坐視言之則虐以非法通國皆寒心而陛下獨用之於前後是不知前後有賊而以賊爲耳目股肱也一賊弄權萬民失望愁歎之聲動徹天地陛下顧憫然不聞縱之使壞天下事亂祖宗法陛下尙何以自立乎幸聽臣言急誅瑾以謝天下然後殺臣以謝瑾使朝廷一正萬邪不能入君

常昭合志

卷之八

人物

卒

心一正萬欲不能侵臣之願也今日之國家乃祖宗之國家也陛下苟重祖宗國家則聽臣所奏如其輕之則任瑾所欺疏入再杖三十繫獄越三日復具疏曰臣與賊瑾勢不兩立賊瑾蓄惡已非一朝乘間起釁乃其本志陛下日與嬉遊茫不知悟內外臣庶凜如冰淵臣昨再疏受杖血肉淋漓伏枕獄中終難自默願借上方劍斬之朱雲何人臣肯少讓陛下試將臣較瑾瑾忠乎臣忠乎忠與不忠天下皆知之陛下亦洞然知之何仇於臣而信任此逆賊耶臣骨月都銷涕泗交作七十二歲老父不顧養矣臣死何足惜但陛下覆國喪家之禍起於旦夕是大可惜也陛下誠殺瑾梟之午門使天下

知臣欽有敢諫之直陛下有誅賊之明陛下不殺此賊當先
殺臣使臣得與龍逢比干同遊地下臣誠不願與此賊並生
疏入復杖三十方欽屬草時燈下微聞鬼聲欽念此殆先人
之靈欲寢吾所奏耳因整衣冠立曰果先人盍厲聲以告言
未已聲出壁間益悽愴欽歎曰業已委身義不得顧私使緘
默負國爲先人羞不孝孰甚復坐奮筆曰死卽死此稿不可
易也聲遂止杖後三日卒於獄年四十九瑾誅贈光祿少卿
嘉靖中賜祭葬錄一子入監明末追諡忠烈列祀鄉賢明子
浣字潔甫以廕授仙居丞浣曾孫凌雲字仲賢爲人魁梧磊
落念高祖欽墓久沒荆榛請於當道表章墓域蔣氏世譜

常昭合志

卷之八

人物

李

陳璧字仲奎祖貞字子固

薛文清墓誌作陳固字元貞

母沈患心痛貞割股

以進母食而蘇越三日痛復作貞欲剔心再進母覺之謂貞
曰若爾我心益痛止之是夜沈夢邑神周孝子授以紫蘇飲
服之愈人以爲孝感璧質幹修岸有才氣舉進士擢監察御
史出按湖廣瀕行冢司委以地方切要五事還朝無所報謫
長汀縣丞尋遷浙江僉事處郡有銀課民盜爭久不息璧往
監之怙亂者不敢動未幾罷歸璧以才自奮恥庸碌充位屢
起輒躓性好學家居日事討閱所作篇什頗多率以草草書
之鄧志兄璫字仲器文行純雅父母相繼沒廬墓六年目失明
一夕爲白衣人爲之洗既覺雙瞳豁然適有僧往過見白龍

盤其墓木云吳文恪訥詩陳子廬親墓六年雙目瞽神龍爲洗開孝行昭千古紀其實也

桑志吳太冲墓表

璧曾孫子忠字景言

少稱神童爲文宗兩漢有潔癖好古硯鄉舉後登公車輒攜數十雌旅邸食次必列硯於前時爲把玩其風致可想也

錢志

參孫百川集廷讚字襟宇推官璨元孫爲小兒醫二子啟元調元

俱登賢書矣村童里嫗篝燈叩門昏夜卽往繩牀土鏗兒呱

呱啼敗絮中便溲狼籍腥臊垢穢未嘗蹙額掩鼻也二子仕

爲令貽書戒之曰醫誤殺一人吏誤殺一邑我有十指餬口

無以盜泉爲鼎養也

錢志參蔣德璟銘

啟元字君亮調元字和卿學

生事親至孝兄弟亦至老相友愛並以舉人爲令啟元知昌

常昭合志 卷之八 人物 奎

邑縣爲政有聲調元知平山縣政聲如其兄晉工部屯田郎

中權稅杭州南關得六一泉勝地捐俸建祠祀靖難諸君子

并璫難諸公凡五十餘粟主兄弟皆登上壽啟元子錡字幼

萍以貢授潛山訓導

錢志

湯琛字魯寶敏悟絕人摛文頃刻數千言登進士授刑部主事

進員外郎出爲廣西僉事有清強之譽性剛寡諧好面斥人

過遇故舊寒峻特厚視顯貴蔑如也與里儒陳表善每過從

必去巾服豪飲以詩相角一日邀表飲室中邑有以輪進得

官橫鄉里郡守繩之反爲所嚙其人來訪琛使人辭之隔屏

語曰彼腹弱膏血以自雄常時不相識茲乃爲刑部主事來

耶表起掩其口不止其剛褊類是有牡丹詩和宋人韻百詠傳於世孫繼文字引之亦以進士授南京兵部主事進員外郎郎中奉職詳慎官校恣橫繼文痛抑之有勲貴抵法當戍邊賁緣請脫繼文執不從陞福建叅議兵部有選事尙書諭留使竣事而後行至閩分守建寧諸郡臨事不少回假閩連歲祿軍儲告闕有詔蠲民租適有秋省臣議變通法將加徵繼文謂詔旨不可違軍儲當別措卒從其議長樂有豪據紫陽書院繼文勒還朱子後裔慮囚使者臨境有司以撫按成案爲言繼文曰拘案斷而入人於罪可乎爲之抗論得白者甚眾遷湖廣副使分巡湖南時衡永多盜警繼文謂吏失職

常昭合志

卷之八

人物

三

則民失業盜乃起於是命有司緩徵節費和糶以賑仍戒守將固守要害毋贖武以覲功盜旋平

鄧志

洪字宗範琛從兄治

經尤精於書提學御史彭勗論南士經學以洪爲首晚舉於鄉授江山訓導陞祁州學正尋乞歸家窶甚劬書不輟博覽強記人以書厨目之元孫有光字子韜早有文譽動循矩矱以鄉薦授莘鄉教諭陞長清令力行保甲均徭役整驛務聽訟無留牘引疾歸居郊外門無雜賓年七十八卒

昭志

桑瑾字廷璋曾祖原善字谷良吳元年徐達攻蘇令曰城不下屠之原善同張飛卿上書言王師拯溺立萬民命屠之一字非弔伐旨徐是之洪武初以薦辟爲曲靖府推官祖顯祖字

宗道精於老易行已端厚人目爲德士父侃字用和長鬚玉立嘗疏請蠲免荒租郤外家負郭田讓兄弟以己所應得之產人以爲難瑾以儒士領鄉書與兄瓊弟瑜在國學有名謁選得處州通判麗水松楊二邑間故有通濟堰蓄水可灌田數千頃一夕爲震霆擊破瑾修復之又捕巨盜吳大八夏文義有功秩滿當遷引疾致仕瑾孝友之行可方古人以親不逮養終身不受燕賀瓊病於京邸爲嘗惡以驗疾仲兄琳墓割隸太倉立祠祀於家姊少寡迎歸以養著述甚富有三經集說讀易備忘玩易隨筆蘿窗閒筆讀史景忠韻府摘玉節義林同舟稿滄齋詩文草門人私謚淵靜先生列祀鄉賢鄧志

常昭合志

卷之八

人物

畝

參甫瓊字廷瑞琳字廷貢玘字廷珪皆瑾兄瓊舉順天試官田集瓊字廷瑞琳字廷貢玘字廷珪皆瑾兄瓊舉順天試官中書舍人早卒子克孝甫晬依母程居外家再期母歿至九歲瓊弟琳遣人慰問克孝泣請外祖父母負母骸骨歸年十七卒琳性恬澹早喪偶終身不娶學黃老養性之術結廬穿山年八十餘卒著有鶴溪集蔗鄉雜詠團瓢清唱圮學醫於婦翁施緒能盡其術有名於時病而貧者資之事緒如父緒無子命其子爲之後年亦八十餘子榮華皆善寫竹能詩榮字文耀諸生有竹窗集華子鳳性行和謹有父風桑氏世譜瑜字廷瓚瑾弟弱冠舉於鄉任温州府通判其治尚寬屬邑泰順有銀坑歲久礦微官取盈額民多破產瑜白於上官遂得奏

減瀕海有地曰蒲莊設二千戶領卒備倭寇卒侵平陽民田
累訟不決瑜被檄往勘冒瘴踰鐵沙嶺籍其田定其稅民大
悅温有鹽竈戶多逃亡課坐是虧部臣議以三丁充一丁竈
戶攜老幼泣訴於瑜瑜稽舊額以復戶部卒從其言温有謝
靈運夢草池瑜作堂其上瑾往自處州每相與觴詠初瑾瑜
拜命同日出都門居官八年相約致仕遂同舟歸里年未五
十士論高之著吟窗選粹四卷檢齋集續集各八卷常熟志
四卷

桑悅字民懌琳子少負才名讀書過目輒焚棄曰已在吾腹中
矣敢爲大言以孟子自况或問翰林文章曰虛無人舉天下

常昭合志 卷之八

人物

奎

惟悅其次祝允明又次羅圯爲諸生上謁監司曰江南才子
監司大駭延之校書預刊落以試悅文義不屬者索筆補之
年十九舉成化元年鄉試試春官對策語不雅馴被斥三試
得副榜年二十餘耳年籍誤二爲六遂除泰和訓導學士邱
濬重其文屬學使善遇之使者至問悅不迎豈有恙乎長吏
皆銜之曰固無恙自負才名不肯謁耳使者遣吏召不至益
兩使促之悅怒曰始吾謂天下未有無耳者乃今有之與期
三日後來賁則不來矣使者恚欲收悅緣濬故不果三日來
見長揖使者怒悅脫帽竟去使者下階謝乃已遷長沙通判
調柳州會外艱歸遂不出居家益狂誕鄉人莫不重其文而

駭其行初悅在京師見高麗使臣市本朝兩都賦無有以爲
恥遂賦之居長沙著庸言自以爲窮究天人之際所著書頗

行於世

明史 府志有周易傳解春秋傳解周禮傳解易鈔
庸言兩都賦古賦太倉志思元集龔立本志云公少

有狂十召田父兒童莫不炫耀而喜爲之博故所言多過其
所易贊之先御史按部在邑與公有舊殷勤臨視適豪官有
獄危急屬公居間願酬千金公雖衾裯不掩竟堅却之此非
文人所能也邑令段然記其祠云當邱文莊李文正文正王端毅
雙眼垂青豈難登華陟膺靈放長沙靈投郴州靈抽推科而
考下下窻井凍牀寒而不染指暮夜之鼎則先生自不朽矣

桑翹字民起瑾長子宏治己卯舉人知萬安縣縣爲山賊焚劫

翹至輯縣解學宮安集流亡捐私橐築城濬壕賊歐陽富壓
境翹率民兵百餘擊楫渡河手斬賊首賊眾鼠竄少叅某督
藩課苛翹以民力竭爭之時議調廣兵討桃源賊翹謂賊內

常昭合志

卷之八

人物

奕

離無煩兵賊果就招遷泉州通判乞養歸詩筒酒醜笑傲以

終著有寒青集西巖卽事

家述

介字于石瑾次子以貢入南雍

條陳十二策如祀周公完六經等議皆上所不能言者湛若

水時掌國子極器之後以舉人選授滋陽知縣僅三閱月罷

馬役歲俵之橫征活饑民以千計有豪倚宗藩橫奪田廬子

女者以法繩之豪不能無銜於介介歎曰是使陶公千載之

上笑人寂寂也遂拂衣歸著理學會通五經問答庸言吟史

和陶等集十六卷

卷志參嚴文
清集甫田集

子大發子培甫諸生宗濂洛

之學事親至孝葬母淚漬冢產紫芝督學耿定向欲聞於朝

力辭之著有經子纂十卷近康錄四卷理學有得七卷大協

字華甫以舉人知清流縣歲凶多盜協悉罷里甲諸供請於
上官汰偽增戶口浮稅林畚弄兵當事主勦協單騎諭之立
卽解散故事司戶籍者先輸楮金三百及贈耗羨餘悉佐公
費協悉屏却遷杭州通判主尚衣事以客禮見中貴爲策錢
穀弊孔及輸作工緻中貴心折焉時以大婚急需裘襦四十
萬協以越疋瘵不克辦白中丞請度支水衡佐費報可以忤
蹇使者歸尋卒孫孝光孝芳皆大協子孝光字師舜母疾嘗
惡以驗安貧好學賅洽子史孝芳字道馨由太學任峽江縣
丞

雲松
巢集

施雨字潤之本桑姓玘之曾孫登進士授刑部主事以壽寧侯

常昭合志

卷之八

人物

七

事株及謫濮州同知充郡曹單間多年少無賴羣聚擄掠兩
厲法禁使民相告訐悉逃他郡曹單稱緒陞南刑部主事晉
郎中遷廣東僉事備兵潮惠時和平賊李鑑擁峽山谷間有
司莫能制雨單車過之會暮鑑以千人迎燃炬列戟欲脅雨
雨入其巢諭以禍福率頓首伏罪程鄉賊某者巨猾也旣就
擒羣盜謀竄去雨佯整兵爲備密遣武士縛至庭下扑殺之
羣盜懾伏巡按使者以私憾論免歸子元孝字子純舉順天
試時父以哭仲子目盲問元孝捷音目復明後父母相繼歿

元孝慟哭病瘖卒

錢志參嚴
文靖集

馬紹榮初姓周字宗勉天順中舉人成化初試中書選預修英

廟實錄授中書舍人直文淵閣陞驗封員外陳情復姓宏治
初修憲廟實錄遷山東左叅議陞太常少卿憲宗嘗有急勅
夜宣館中人盡醉紹榮獨簪筆上殿書麻稱旨同官得無究
書法與永嘉姜立綱齊名其陞少卿也立綱以出身布衣不
得齊階紹榮請捐一級與立綱齊故紹榮得太常姜得太僕
朝論賢之卒賜葬祭著有紀盛詩集

管志

陳易字一元文村人父喆字成夫隱居好學治春秋折衷諸家
名曰集解易以舉人除建昌推官初喆嘗著居官一覽易遵
行之民有胡萬八者以怨殺其叔事秘久不決易廉得之胡
屬顯要爲解卒抵於法廣昌獲盜誣引五十餘人易察其冤

常昭合志

卷之八

人物

矣

悉縱之廣昌歲仍旱民聚爲盜易遣人入賊中以色線縫其
衣盜潛入城驗衣屨得之乃言於上官發倉賑民盜皆散去
邑有虎患易移文於神遂焚其穴易母老而賢手製紡織具
遺官中家人治布以資費郡守聞而賢之遷黃州府同知課
復最吏部尙書王恕第其治爲諸郡首將擢用之以母老力
請致仕易性孝母病思肉不能進易感之終身不御肉列祀
鄉賢子俸通譜學有士行

鄧志

狄雲漢字天章沙溪人後徙華蕩爲人清勁有風概由歲貢舉
順天試授知沅江縣沅江樸野易治雲漢政尙簡靜民皆愛
之郊外有佳山無事輒出遊民爭絮果茗候於郊雲漢停輿

受之童豎爲掖輿而行語之曰汝等善自愛吾數出遊汝不能供也後調判臨清州致仕歸閉戶斷炊吹嘯不輟邑令楊子器爲置田二十五畝戲自號爲餘夫年八十餘卒有沅江

詩集

鄧志參皇甫冲志

李傑字世賢號雪樵父子璨字希潤讀書通古今力農教子傑年十七舉於鄉登進士高第選庶吉士授編修進侍講侍讀學士以春宮恩兼左春坊左庶子纂修憲宗實錄徙南京國子監祭酒憂歸服除改太常少卿復爲東宮講讀官皇太子年少好嬉戲傑正色款詞隨事匡正遷南京禮部右侍郎召入北部徙左纂修孝宗實錄爲副總裁進南京吏部尙書改

常昭合志

卷之八

人物

五

北禮部尙書上邊務六條時劉瑾亂政嘗以私事屬傑不聽餽之瓜以示意又不報謝瑾嫉之會晉府鎮國將軍求封郡王不得至是入賂於瑾瑾集府部科道官於左順門厲聲詰曰親王子封郡王祖訓也前部臣不省虧損上恩諸君能改議乎傑對曰祖訓親王子封郡王今將軍乃世子所生不當膺王爵先皇帝已有成命矣公將割損正法以奸先皇之命焉用議爲瑾怒馳去欲中以離間罪上不從力請致仕遂歸年七十卒贈太子太保謚文安列祀鄉賢傑高簡自重不爲骫骳以故在翰林最久號爲淹滯迨逆瑾誅吏部首薦傑傑無意復起亦以傑地望逼已名且用之實不召也其文醇雅

清美簡而有法詩筆婉麗温厚書法遵逸得黃米筆意

先賢事畧

吳中往哲記子而進而遇見恩蔭元孫廷璋字孟玉母病劇百藥

罔效遂嚙臂肉煎糜以進竟瘥後客揚州忽忽心動兼程歸

而母已歿哀毀骨立

徐恪字公肅

曾祖恢祖號春軒工書至正末嘗集鄉兵捍閭里

城父及猶行喪禮以勵俗張士誠據吳欲官之不往有靜菴集父訓字敏叔讀書有高行累世聚居輯古今同居者為一

編做浦江鄭氏遺範為家規晨列男女長幼於堂下鳴鼓述訓警厲之已乃升堂序揖男女各一室同飲食題楹曰永遵

家訓不聽婦言躬課僮奴耕織恤其勞苦不加笞詈家量出入無二歲歎必發粟賑貧鄉黨稱其篤行舊志登進

士擢工科給事中中官欲出領抽分厥恪等疏爭中官怒請

即遣恪等將摭其罪無所得乃已出為湖廣左叅議遷河南

常昭合志

卷之八

人物

七

右叅政陝西飢當轉粟數萬石以道遠請輸直上下稱便宏

治初歷遷左右布政使徽王府承奉司違制置吏恪革之王

奏恪侵侮帝賜書誡王河徙過開封有議遷藩府三司於許

州者恪言非便遂寢四年拜右副都御史巡撫其地奏言秦

項梁唐龐勛元方谷珍輩往往起東南今東南民力已竭如

水旱洊臻去冬彗掃天津直吳越地乞召還織造內臣勅撫

按諸臣加意拊循以弭異變帝不從故事王府有大喪遣中

官致祭所過擾民成化末始就遣王府承奉及帝即位又復

之恪請如先帝制并條上汰冗官清賦稅禁科擾定贖例革

抽分數事多議行戶部督逋急恪以災變請緩其事御史李

興請於鄖陽別設三司割南陽荊州襄陽漢中保寧夔州隸之恪陳五不可乃止恪素剛正所至抑豪右祛奸弊及爲巡撫以所部多王府持法尤嚴宗人多不悅平樂義寧二王遂許恪減祿米改校尉諸事勘無驗坐恪入王府誤行端禮門欲以平二王忿帝知恪無他而以二王幼降勅切責命湖廣巡撫韓文與恪易任吏民罷市泣送數十里不絕屬吏以羨金贖揮之去至則值岐王之國中使攜鹽數百艘抑賣於民爲恪所持阻不行其黨密搆於帝居一歲中旨改南京工部右侍郎恪上疏曰大臣進用宜出廷推未聞有傳奉得者臣生平不敢由他途進請賜罷黜帝慰留乃拜命勢要家濫索

常昭合志

卷之八

人物

七

工匠者悉執不予十一年考績入都得疾遂致仕卒遺令勿請卹典列祀鄉賢子綰字清甫淹記國典以襟量聞綰字華甫亦修謹有士行明孫瑑字文伯以祖廕授西安丞嘗知縣事廉豪右罪狀悉正以法富民陳賊乘歲飢閉糴飢民鬻聚取之部符捕甚急眾恐謀亂瑑馳至諭曰汝輩迫於飢耳取汝券來俟秋成償穀仍爲白郡眾遂懽呼解散邑有旱災力請蠲賦民得不飢委督江右軍餉瑑令上戶出馬中戶出船下戶出夫事立辦能聲籍甚軍中總制俞某至降階與揖與時不合卒以病歸家行甚修與人交能急人困處族姻尤厚云

瞿文

察字鑑之恪族孫嘉靖時倭犯邑境知縣王鉄練民

兵選智勇者統之察統家人徐章等百人前驅抗敵至三丈浦生擒韓龍三大王法智羅三等五名斬獲倭首二十級追至讓塘猝中伏叅政錢泮知縣王鈇死之察與徐章等九人亦赴敵死子希顏陳父戰功死節事聞贈太醫院吏目廕一子入監會希顏死次子希冉痛兄未受廕父無專祠率子立敬亟請立祠

國朝詔祀忠孝祠希冉號聽鳥蒔花好客工弈著萃奕搜元四

卷錢志

沈海字淵瀾登進士授刑部主事時有疑獄久不決海一訊得其情老於法者自以爲不及也遷員外郎晉郎中出知泉州

常昭合志

卷之八

人物

七

府泉士久失解海延師授之業自是多領鄉薦歲旱禱於天有願捐十年壽化爲三日霖之言兩大澍內艱歸服闋補重慶府興學校省徭役令家僮歲致杭米以供饗殮郡人爲之謠曰侯食蘇州米惟食巴江水考最當遷以老乞歸家居好讀書年八十五卒著有葵軒遺稿李傑墓表子韓字愛葵舉進士知曹州曹數患河決韓築隄城外仍植柳以固之先是役夫太濫韓務節省歲減夫錢十萬有奇會歲祲發粟賑饑又增葺黌舍以作新士氣嚴於馭吏遂爲所誣左遷慶府長史尋致仕韓子汝爲舉人黃巖知縣管志汝爲孫昌時字逢可潔身

勵行文譽藹然萬曆庚子丙午兩中副榜授太湖訓導遷清

流教論著有四書發禮記定註趙士春傳昌時子道元字貞起舉

人遊齊楚間從學者甚眾任廣平推官王夢鼎銘應元字子春海

孫五六歲能作徑尺大字見者目為奇童與弟應魁同舉於

鄉知陳州聯民居以定保甲禁違式以消禍本慎編審以防

飛詭嚴徵解以杜侵漁爰除豪右與民休息調趙州趙當南

北孔道接應轆轤應元性疏濶不耐折腰遂歸歲時約里中

故人結詩酒社山介水隈惟意所適嚴文靖集應魁字子文性孝

友事繼母程不殊所出處兄弟自艾不校鬻產以營喪葬登

進士授南禮部郎上禦倭六策忤執政出僉廣右三月竟罷

歸結廬丹井足不出戶者二十年饋粥僅給著書談道優游

常昭合志 卷之八

人物

三

以終有江南目錄西湖覽勝鳴缶禮部等集王夢鼎先哲考

陸潤字昌澤出儒士中式登進士知閩縣俗好訟潤執一二束

置於法風少止番使入貢往時多濫給潤為計口給廩內艱

歸服除補清平縣遷太僕寺丞擢知温州府溫有銀礦盜時

竊發豪猾代輸公賦潤皆嚴禁絕之修築石堰百餘里以捍

潮汐倭劫瑞安沿海巡司及守禦所撫臣彭韶欲以失機論

潤曰海鄉本無城守而印信不失民眾無虧舉止不應彭是

其議滿九載中蜚語罷歸家居足跡不履公府卒年八十三

子隆恩字晉卿以鄉舉入國學授浮梁知縣縣歲貢磁器中

人督造民苦之隆恩疏請停止報聞改江華令時藩府奉御

搃殺大賈隆恩被命往覈卒正奉御罪累遷福建鹽運司同

知鄧志參朱希周誌曾孫一鳳字子韶舉於鄉仕泉州府海防同知

府瀕海歲屢中倭其署在料羅嶼寇衝也又當上游一鳳簡

勁卒立水寨戍之而以艤臙翼其外既而他舟皆遇颶敗而

一鳳所部獨全尋受臺檄會討海酋林鳳大破之覆其巢詔

賜白金一鎰凡三署府篆清戎籍理屯政課鹽法俱能其職

最後在興化往來山谷間染病卒一鳳博學有文尤精三禮

著有三禮奧義行世祀泉州名宦王世貞誌

陸崇禮字孟敦一鳳孫登進士知龍溪縣時礦稅四起中使為

橫閩中尤甚崇禮與之相抗中使露章奏聞賴撫臣調護改

常昭合志 卷之八 人物 諸

折江平陽以勤事卒於官年僅三十一弟同禮字仲謀亦舉

進士授永嘉令陞兵部主事轉郎中有中涓稱令旨推副將

某為大帥同禮不為動擢湖廣叅政移浙臬鈎黨禍起誣周

宗建令仁和時賊數萬同禮堅報無有織造璫李實為魏闥

立生祠邀藩臬遊祠下欲邀之入謁問禮強一律卒不可屈

陞廣東布政使例有羨餘特申撫按不名一錢巡撫南贛討

平九連山銅鼓嶂諸強賊萬餘人奏請設州縣於兩地以便

控制為善後計卒於任贈兵部右侍郎有撫虜兵畧行世昭志

子廷保字定爾廕生

王鼎字元勳梅李人十歲作聽琴賦甚工弱冠登進士授南京

刑部主事有京衛指揮抵重法賂尙書求移獄尙書諭意鼎不從遷郎中旋陞湖廣左叅議總督糧餉湖地苦潦民訴災遽下有司覈之隨災數多寡爲停徵藩府預借祿米歲以爲常鼎持不許有豪猾田洪者脅持官長勢傾一郡立杖殺之遷廣東叅政嶺外帥府類有叅隨糜費縣官鼎移文裁革羣訴於督府由是罷歸爲人有風裁篤於行誼南臺御史蕭山何舜賓與鼎善何坐事謫戍其邑令鄒魯與何有郟械何赴戍陰遣人殺之中途復欲滅其家以杜後患何之子競挈家歸鼎鼎授館衣食之誓爲復仇久之競請行鼎曰汝未有子姑少待之競得子會魯陞僉事去縣鼎乃資遣競求死士刺

常昭合志

卷之八

人物

妻

之江滸廢其目法吏擬競死鼎復資競母入京擊登聞鼓上訴事下大理評事曹恕謂魯旣遷官非親臨比且以唐梁悅事爲證競得減死而魯論死天下稱競之孝而高鼎之義又嘗以水災爭於都御史得奏免歲徵十六萬石工於詩有集若干卷鄧子訪字啟道性行端和好山水善詞翰與楊儀植

欽友善

氏族志叅南宮集

瞿俊字世用五渠人登進士知崇仁縣豪右斂跡創便民倉積穀十萬餘以最擢監察御史出按廣西再按雲南刺劾不避權要治墨吏無縱舍者還朝奉詔錄四每爲死者求生遷廣東副使律已甚廉不可干以私嘗出見市箒者呼而入分箒

給諸僚有僚素乏清譽倍給之問故俊曰君庭多穢耳以病致仕家徒四壁不著嶺外一物比舍皆漁戶時時就之席地飲箕踞相爾汝每入郭率晨候載芟小艇歸仍附之善爲詩酒次立可數百言著學古齋稿姑蘇志參江西志錢仁夫志從弟明字德昭性真率好詼諧登第後由兵部出知撫州府爲諸生時邑丞某嘗辱明及爲部曹一解餉官頓顙請罪問之卽丞某明扶起曰舊父母也歎遇有加官十餘年依然寒素著作多散佚周卿集懋業號仲湖俊元孫性通敏受知於楊忠烈漣漣懼閣禍下令毀祠懋業夜半偕王憲曾冒風雨昇像藏之迨詔下褒忠葺祠懋業復迎以入建五渠塘石橋往來者賴焉從

常昭合志

卷之八

人物

表

兄材字成甫事母以孝聞景淳沒有議役其後者材傾身任之有大姓下石汝稷勢甚張材竭力周旋得免於難入貲爲山東都閩幕檄勘旱災較同事獨矚苦遷襄陽通判濯行不涅以勞卒官諸壽賢誌

瞿景淳字師道常熟人八歲能屬文久困諸生間教授里中自給嘉靖二十三年舉會試第一殿試第二授編修鄭王厚烷以言事廢徙鳳陽景淳奉勅封其子載堉爲世子攝國事世子丙懼贖重幣景淳却之時恭順侯吳繼爵爲正使已授幣慚景淳亦謝不納既而語景淳曰上遣使密訶狀微公吾幾中法滿九載遷侍讀請急歸江南久苦倭總督胡宗憲師未

捷景瀆還京謁大學士嚴嵩嵩語之曰倭且夕且平胡總督
才足辦南人短之何也景瀆正色曰遙度之耳景瀆自南來
目覩倭患胡君坐擁十萬師南中人不得安枕臥相公不欲
聞誰爲言者嵩愕然謝之歷侍讀學士掌院事改太常卿領
南京祭酒事就遷吏部右侍郎隆慶元年召爲禮部左侍郎
用總校水樂大典勞兼翰林院學士支二品俸侍經筵修嘉
靖實錄疾作累疏乞骸骨歸逾年卒贈禮部尙書諡文懿爲
編修時典制誥錦衣陸炳先後四妻欲封最後者屬景瀆撰
詞不可介嚴嵩爲請亦不應囊金以投卒笑謝之子汝稷汝
益汝說汝稷字元立好學工屬文以廕補官三遷刑部主事

常昭合志

卷之八

人物

七

扶溝知縣扶宗人神宗令與重比汝稷曰是微服至邑庭官
自扶扶溝民耳讞上竟得釋歷黃州知府徙邵武再守辰州
永順土司彭元錦助其弟保靖土司象坤與酉陽冉御龍相
讐殺汝稷馳檄元錦解兵去三土司皆安尋遷長蘆鹽運使
以太僕少卿致仕尋卒明史汝稷嗜宗門書撮其要旨爲指月
錄著石經大學質疑一卷大學格物訓二卷兵畧纂聞十二
卷問卿集十四卷子式末字起周善八分書工畫詩亦清沁
可誦官涪州判官式黼字起民諸生有志節式耜哭之以詩
有傲骨重泉還太僕清風兩袖見尙書之句可想見其人汝
益字靜觀爲諸生喜談兵杖策遊遼東始受鎮撫後以徐陳

兩御史薦授平清偏鎮署指揮僉事平清苗民雜處衛軍單
弱汝益革狡黠之兵募勇健之卒苗蠻三犯黔境清鎮獨靈
調守荆瞿卯澗土司向崧仇其叔向明輔明輔陰投永順永
順代爲叩闈下部行院道委永順往捕甫臨卯澗二千人一
夕盡殲當事行文起解荆南諸司卽起兵要奪久不赴鞫汝
益至理論諸土司崧亦悔罪泣謝荆瞿民立石記功丁酉關
白稱亂汝益上禦倭八策遂有神樞五營佐擊將軍之命遼
左金得時入山修道聚眾四千人院道喜功上疏請勦汝益
就疏代叅數語乃改勦爲撫四千人盡得釋自弟汝說入官
卽解任歸悠游林下三十餘年汝說字星卿五歲而孤構文

常昭合志

卷之八

人物

表

成輒跪薦父木主前萬曆中舉進士官至湖廣提學僉事亦
以剛正聞初授營繕主事遷都水員外工曹日與宦官相接
商賈緣爲奸利汝說條理精密動引故事爲据羣閹日爭於
前終無所假所省億萬計又考百年間供億盈縮之數彙而
成書時甚賴之督學時所進退士雖有勢力屹然不可撓動
所著有名臣畧百卷子式耜

舊志

瞿式耜字起田舉萬曆四十四年進士授吉安永豐知縣有惠
政調江陵永豐民乞留命再任以憂歸崇禎元年擢戶部給
事中疏言李國槽宜留內閣王永光宜典銓曹于汴宜秉憲
鄭三俊畢懋良宜總版曹李邦華宜主戎政帝多采其言俄

陳朝政不平爲王之案請卹孫慎行訟寃速楊鎬王化貞之誅白楊漣左光斗結毒之謗追論故相魏廣微顧秉謙馮銓黃立極之罪因言奪情建祠之朱童蒙不可寬積愆久廢之湯賓尹不可用帝亦納之又極論來宗道楊景辰附逆不可居政府二人旋罷去御史袁宏勛劾大學士劉鴻訓逆黨徐大化實主之川貴總督張鶴鳴先已被廢其復用由魏忠賢式耜並疏論已頌楊漣魏大中周順昌爲清中之清忠中之忠三人遂賜諡未幾陳時務七事言起廢不可不覈陞遷不可不漸會推不可不慎諡典宜嚴刑章宜飭論人宜審附璫者宜區分又極論館選奔競之弊請臨軒親試多議行時將

常昭合志

卷之八

人物

五

定逆案請盡發紅木審其情罪輕重又言宣府巡撫徐良彥不附逆奄爲崔呈秀誣劾遣戍亟當登用良彥遂獲起式耜矯矯立名所建白多當帝意然搏擊權豪大臣多畏其口十月詔會推閣臣禮部侍郎錢謙益以同官周延儒方言事蒙眷慮並推則已細謀沮之式耜謙益門人也言於當事者擯延儒弗推而列謙益第二溫體仁遂發難延儒助之謙益奪官閒住式耜坐貶謫式耜嘗頌貴宦參政胡平表殺賊功請優擢其後平表爲貴州布政使坐不謹罷式耜再貶一秩遂廢於家久之奸民張漢儒希體仁指訐謙益式耜貪肆不法體仁主之下法司逮治巡撫張國維巡按路振飛交章白其

寃不聽比兩人就獄則體仁已去位獄稍解謙益坐削籍式
耜贖徒言官疏薦不納十七年福王立於南京八月起式耜
應天府丞已擢右僉都御史巡撫廣西明年夏甫抵梧州聞
南京破靖江王亨嘉謀僭號召式耜拒不往亨嘉至梧劫式
耜幽之桂林遣人取其勅印而亨嘉爲丁魁楚所攻勢窘乃
釋式耜式耜與中軍官焦璉召思恩叅將陳邦傳共執亨嘉
亂遂定唐王擢式耜兵部右侍郎協理戎政式耜不入朝退
居廣東順治三年九月

大兵破汀州式耜與魁楚議立永明王由榔乃迎王於梧州以
十月十日監國肇慶進式耜吏部右侍郎東閣大學士兼掌

常昭合志

卷之八

八務

平

兵部事未幾贛州敗報至司禮王坤廵王赴梧州式耜力爭
不得十一月朔蘇觀生立唐王聿錡於廣州式耜乃與魁楚
等議迎王還肇慶遣總督林佳鼎禦觀生兵敗歿式耜視師
峽口十二月望

大兵破廣州王坤趣王西走式耜趨赴王王已越梧而西四年
正月

大兵破肇慶逼梧州丁魁楚呂大器王化澄皆棄王去止
及吳炳吳貞毓等從乃由平樂抵桂林二月

大兵襲平樂分兵趨桂林王將走全州式耜極陳桂林形勢請
留不許自請留守許之進文淵閣大學士兼兵部尙書賜劍

便宜從事

大兵於二月薄桂林以騎數十突入文昌門登城樓瞰式耜公署式耜急令援將焦璉拒戰比三月式耜身立矢石中與士卒同甘苦積雨城壞吏士無人色式耜督守自如故人無叛志援兵索餉而譁式耜括庫不足妻邵捐簪珥佐之既而璉兵主客不和諜而去城幾破者數矣會

大兵引而東桂林獲全王聞封式耜臨桂伯七年十一月大兵破桂林總兵戚良勛請式耜上馬速走式耜堅不聽叱退之俄總督張同敞至誓偕死乃相對飲酒一老兵侍召軍中徐高付以勅印屬馳送王是夕兩人秉燭危坐黎明數騎至

常昭合志

卷之八

人物

全

式耜曰吾兩人待死久矣遂與偕行至則踞坐於地論之降不聽幽於民舍兩人日賦詩倡和得一百一首至閏十一月十有七日將就刑天大雷電空中震擊者三遠近稱異遂與

同敞俱死

明史 忠烈紀 曾祥王監國贈式耜粵國公謚文忠

乾隆四十一年

賜謚忠宣子嵩錫字伯申舉人家世華膺嵩錫性淡退如寒門素士昌文字壽名式耜孫性豁達能行度外事年十七念其祖在遠欲往省恐父母惜其年少不聽一日早起襟被獨行家人覺之急遣力齎資用追及之杭州僧舍問關萬里微服隱名冒矢石陷重圍幾死者再然後得達式耜誦退之知汝遠來之句且喜且悲薦授翰林院檢討式耜殉節後裹骨歸

又幾落虎口式耜以歿後英爽脫之著有粵行紀事倦知小
記初昌文既往家書久不至其叔父元鎔字生甫繼往道阻
不得達歿於永寧府志

蕭奎字漢文父韶字鳳儀有俊才工詩多警語李東陽和其遺
詩有君有孝子誠而無流俗酣之句奎讀書博貫羣籍登進
士授工部都水司主事督造淮安運艦却解船料常例銀千
餘兩再被命修太倉與巨璫蕭敬共事屢以法裁之敬不能
堪而服其公進員外郎兼領神木廠太監顧雄嘗事憲宗有
罪減死斥居厥中廷議復用奎上疏論雄蠹法不可再用雄
泣訴於上銓司乃擬奎爲雲南按察僉事提督學政有旨復

常昭合志

卷之八

人物

全

改理刑既上道人謂仇將機伺奎曰禍福豈人所能避哉吾
以此身委國久矣未赴官卒奎篤於交誼同縣御史褚祚中
書舍人凌遠卒於官爲之歛歸其喪經紀其家子維通古文
詞孫允楨字賢甫弱冠卽事檢身之學法朱子投豆爲書一
冊號曰百錄日檢意念所發畫白黑圈以識之爲諸生以績
學得疾痿處牀蓐愈益勵志依蔡虛齋蒙引輯四書精義更
究心易理彙諸家說爲易學二書卒之前日出所訂五音六
律度數付其子曰汝諦察之尙有譌且佚者乎其好學如此

嚴訥志

塾字庭訓奎族兄以貢授齊河訓導性和易詩語清圓

兼善地理錢誌

蕭應宮字觀復奎族孫登進士由刑部郎中出知東昌府親擒劇賊備兵於潼關固原臨洮時火落赤萬眾寇邊盛暑環甲張疑設伏寇望風引去海內皆以邊才推許及東事孔棘應宮以遼海道監軍朝鮮南原之覬主者欲棄王京退守鳴綠江應宮單騎赴王京止之既而用說士沈惟敬手書退倭而制府反以捷聞應宮以功罪錯迂力爭之制府慙陰申之遂被徵下獄論戍奉赦歸卒

錢志

褚祚字昌允曾祖懋字芳叔洪武中以人材薦官南城縣丞父讓字國蕃有操行嘗赴郡守召人有冒法者以千金餽讓峻却之祚舉進士知臨海縣縣有嶺道雨三日淖陷則居人薪

常昭合志

卷之八

人物

全

米斷絕祚發工治之人稱褚公嶺僧有茶山爲鄉豪侵占訟數年不決祚閱其牒亟召僧還之以薦召爲御史在臨海時其弟往視瀕歸無以爲遺以父所授田予之比卒至無以爲

欽鄒志參

李傑志璵字廷暉祚族弟以舉人官國子博士三典鄉試

歸隱江濱不入城市子圻字宏望登進士授刑部主事遷員外四有手搏三人而掠其貲圻謂四初無械安得一人掠嶽貨辨脫之湖廣叅將趙晟殺指揮某圻被命往鞫知晟力能移獄兼程以進按論晟死擢知靈波府舉荒政修廢堰建小學遷廣西按察副使

鄧志

次子垠字宏鎮以鄉舉除靈縣知縣

縣僻而俗強戾度不能治遂致仕歸

周木字近仁其先有士良者永樂間以薦授監察御史爲木高祖信之兄信生鼎字季新有文行事母至孝鼎生珪珪有弟琳字以素事父母克盡子職父嗜魚每薄暮輒至市擇鮮魚歸以博父歡珪生澍字時望人有緩急力拯濟之卽木父也木總角時或問讀書奚爲曰爲事君人皆異之旣長游心理學不屑詞藻之業登進士授南京行人司副時王端毅恕典留務雅知木王秉銓遂奏木爲稽勲司郎中預修憲宗實錄懿祖祧祭木奏言祧廟之祭遷祖宗之主居不享之室比之常祭樂少而哀多乞是日免朝精一其心以供祀事奉命冊封岷王會災異求直言木上疏言今天下極弊莫如賦役請

常昭合志 卷之八

人物

齒

勅戶禮兵工四部將天下諸司大小賦役自洪武正額添置者逐一條出或因或革務在公私兩便因者必杜其請益之門革者必絕其復開之路并行各省布政使各條所屬賦役有在外添置而不申部者悉已之禮部災下尙書耿裕等於獄木復疏救遷浙江右叅政理杭州二衛戎籍稽隱漏辨枉抑人稱其明俗葬用水火木下令以戒立義冢於三山作道南書院修岳武穆墓復其墓田爲同官所忌遂致仕歸晚好易因邵子所畫諸圖推而衍之著易心逸說其於洪範所陳配合皆有倫類木事親孝與弟彬友愛尤篤於族誼計口給食歲費甚廣而其家廩無贏積也冠婚喪祭禮廢已久木考

古以行於家有文集奏疏若干卷詞義高簡善古隸學者稱
勉思先生志鄧子炯字光宇少時嘗撰萬言書言國家大計父
木抑之不果上舉進士授工部主事監稅浙江進郎中會西
藩叛倉卒出師炯調軍械整暇無之一日劉瑾召問虞衡司
所儲戎器幾何炯對以數籍於庫時瑾已有逆志故折之遷
雲南叅議麗江軍民府爲羈縻郡巡歷所不及御史張璞屬
炯諭下之知府木定以貨餽炯不納定再拜願盡力守邊十
八寨久不靖邊臣議征之炯獨持不可全活甚眾遷叅政用
撫臣薦命督理糧儲兼理鹺法轉陝西苑馬寺卿遷山西布
政使首禁官買病民數事同僚已不便按部御史所遣人有

常昭合志

卷之八

人物

全

擾州縣者炯治之御史遂撫他事劾炯會以艱歸自號簡默
有遺文四卷炯子坦字孟平舉人彬字近德舉於鄉累試未
第卒兄木以例請授通州州判木久仕於外調家資以佐官
費父老且病起居侍膳有常禮與人交有意氣子光宙初名
照以字行號文川舉順天解元嘉靖初尙書李某撫循三吳
以水利諮光宙條對甚悉因有白茆之役錢志

周滌字進之木從兄舉進士授刑部主事慮囚淮南論決明允
遷員外郎晉郎中以才被推閱尙書珪欲薦不果逆瑾竊政
每求朝士過失文致以罪滌持法頗峻掾史小過必詣責司
吏董某積不能堪會歲盡刑部例發庫贓物轉市滌家人於

市中得二絹吏告滌私取下獄案問瑾方事威噬滌不敢理
乃勒停其官瑾死詔滌起滌以老辭焉兄源字尚本博學能
文嘗剖股愈母疾年八十餘滙字行之滌從兄隱居力學與
桑瑾兄弟爲詩友著漱石稿嘗作爲政節要二十條訓其子
子楷字民則由歲貢中式官袁州同知與知府王俊協心圖
治詔褒之楷子懋字元政登進士授定海令有吏能分校浙

闡卒

鄧志

王宗錫字元善登進士知餘姚縣縣有陂介蕭山旱則兩縣民
阻水爭訟不解宗錫審地勢築堰防使民各保其利訟乃息
擢南京廣東道御史尋改北臺命往福建理戎籍立連坐法

常昭合志

卷之八

人物

尖

凡脫隱者許自實得漏卒無算按江西民有以詐辨代訟者
率昇棺而訴於庭宗錫痛治之頑風少沮彭蠡湖有渡舟負
險索無藝不遂則加虐焉宗錫命造官艦集故以渡爲業者
使領艦一日盡得之皆置法吉安有顯仕中朝者與宗錫有
舊其弟怙勢暴鄉里宗錫執之以屬吏竟死獄中浮梁有豪
暴與臺長爲姻家宗錫捕治如律遷山東按察副使卒於官
有西臺奏草若干卷子舜元字慶卒舜愷字慶陽兄弟皆好
學篤行舜元著來董樓吳山唱和集舜愷監生授都司經歷

趙用賢志

王舜耕字于田宗錫族子祖賓字敬夫父璣字宜安有孝行賓

年九十餘坐臥一小樓日負其父以上下力資供養舜耕
與弟舜漁同登進士授廬陵知縣值武宗南狩旁郡縣多以
科派被劾廬陵獨無所擾擢監察御史巡長蘆鹽政陳便宜
七事巡按河南儀賓某瀆倫逮繫久不決舜耕至立正其刑
歲終奏報以貪殘劾去者殆百餘人境內肅然時歲大旱郡
縣上慶雲圖撫臣欲借舜耕表賀辭曰民方病旱何以爲瑞
事遂已並減厨傳饋遺人多衙之會京察謫光州改判濱州
致仕

管志參翟文懿集

舜漁字子澤登第時年才十九授工部主事

分司浙江倖臣江彬方用事申官以賂得預司事怙權橫徵
舜漁以法裁之課人命貯錢塘仁和二縣庫錙銖無所與宸

常昭合志

卷之八

人物

七

濠反浙江鎮守監畢真謀應之巡按御史張縉知舜漁忠畧
移司入城與謀議真一日召縉與舜漁飲將戕之座上舜漁
見兵械森列詰真曰豈備寧藩耶當於城上耳命左右立撤
之酒半日縉先行引觥與真痛飲而出真氣索改刑部員外
郎遷山東僉事督武定兵備州方有警舜漁修軍政躬習騎
射知州姚遜貪暴劾罷之丁外艱歸服闋補原官分巡遼海
東寧道修築邊牆延袤千里有挾中官勢擅支諸衛俸給者
捕置於法豪猾持官長短結黨攫財者亦遣戍極邊一道震
懼遷副使整飭臨清兵備遼人數千泣送有圖其像而去者
臨清當道衝奸宄所窟穴舜漁訓練士卒安撫商賈上下頌

其治巡河郎中在臨清繫囚五十餘人久不決舜漁察其寃命釋之又按考州庫贓罰銀有隱匿舜漁持之急遂據他事訐奏詔令二人候勘於家舜漁事得白吏部方擬薦用無何卒年四十七列祀鄉賢舜耕子之夔字汝和舉人舜漁子之

稷字汝立官漢陽通判

李本
盜志

聞釗字遠明性嚴峭舉進士授南京大理評事進寺正給事中方向劾奏巨璫蔣宗不法宗因誣奏向事下理寺讞釗竟直向抵宗罪遂為所構左遷華容知縣兄鑑字理明以舉人知榮昌縣有吏才鑑子武字邦憲韶字邦夔俱舉人韶官建寧同知以廉謹稱兄弟皆純實坦易居家有子弟之節武子東

常昭合志 卷之八

人物

矣

昌字會卿登進士官工部主事

鄧志參姚宗儀志
陳寰志丁南湖集

馮玘字良玉其先戍鳳陽至玘始歸舉進士知泌陽縣陝右兩河飢民流入境內玘請發粟以賑全活甚眾徵為監察御史京師大雨壞民廬舍玘劾奏大學士劉吉燮理失職宜罷斥以答天譴出按貴州都勻獠叛戕官兵玘論獠肆惡不可長宜發兵進討再疏請勦師出果有功主事李文祥忤權貴請興隆衛玘疏辨之得召還復按浙江劾中貴之鎮浙者上為謫戍邊自奉甚儉浙人歌之曰食無肉馮良玉還朝會召番僧領占竹玘言妖僧不足辱上命遷福建按察副使嘗按舉受賅吏顯官為之請玘執不從曰法如是不行矣致仕卒有

奏議若干卷子冠字正伯善彈琵琶歌金元曲五上公車未嘗挾策止挾琵琶而已登進士授知鄧州清介負氣失兵使者意自劾不任改國子博士遷工部主事晉郎中出知衡州府卒於官錢志蔡先賢事畧孫復京字嗣宗強學廣記不屑爲章句小儒少業詩鉤貫箋疏著六家詩名物疏六十卷謂冠婚喪祭不當抗家禮於會典作遵制家禮四卷羅舊聞述先德作常熟先賢事畧十卷族譜四卷年四十餘始見實錄謂通紀詳而野吾學裁而疏弇山炫博妄而謬憲章典則自檜無譏作編年書駁正得失曰明右史畧草創未就卒府縣志合參

郁容字宏德世以醫爲職容舉進士授刑部主事精於法比然

常昭合志

卷之八

人物

允

性寬厚不事深竟都御史秦紘與安遠侯柳溥訟尙書何喬新屬容讞之竟直紘抵溥罪容後至南都秦已爲尙書避不往見遷員外郎御史李興坐事下獄巨璫楊某欲坐興死容援法爭得末減楊因中容以罪調撫州通判陞知澧州撫臣以州租不入將罪長吏容解印綬爭之陞雲南僉事所部產金每銷礦金戶率有例入容禁絕之蠻賊阿則聚山谷爲亂以計散其黨卒禽之丁母憂歸卒著有見菴集子勲字元績讀書能強識以進士知華容縣亦以廉謹稱鄧志

蔡坤字一靈世居白茆鎮七歲能詩登進士擢刑部給事中輔臣萬安學士尹直憑寵專恣坤疏列其罪不報李孜省以左

道進內侍梁方陳禧相倚爲不法坤並論之直聲震一時孝宗登極奉詔祭禹陵邵州縣禮餽後以朝祭失期出判興國州遷知安順州同知衡州府超拜山西僉事兼督河南屯田卒官

鄧志

時中字大本先世以役籍大興中舉進士乃還常熟授知絳州絳多宗藩號難治中躬自斂飭無敢撓法者授南京工部員外絳民遮道送車不得行在部時中官有因役入賂者中發之以艱歸改補刑部累辨枉抑陞山西僉事提督屯糧爲劉瑾所誣貶衡州通判瑾誅復舊職移廣東清遠兵備猺獞寇連州率兵平之陞副使領海南兵備指揮徐某獲罪暮夜懷

常昭合志

卷之八

人物

卒

金謂免中執而治之人皆畏威斂戢中性簡易其治尙清嚴所至有聲子春字元甫夏字亨甫俱舉人春任鷄澤知縣夏

任江山知縣

鄧志

盧翊字鳳翀父琮字彥貴由鄉舉爲海陽令有廉操嘗平反死罪二十人以直道忤其守罷官翊宏治庚戌舉進士授新喻令政尙簡易以治聞內艱服闋知獲嘉縣里豪久負稅挾刃自衛翊捕置於法租遂入縣自屯卒調白澤州其千戶橫邑中翊持其骹法事千戶叩首謝以薦拜御史出理山東軍政再巡按廣西當猺獞竊發兵疲民敝翊加意撫輯柳度叛亂被旨錄戎功時逆瑾擅國以苛刻立威會省城火論翊與三

司失救翊時已遷湖廣僉事猶不免罰又以功冊稽緩爲罪
停其官瑾敗復職改任川南兼視水利疏鑿都江堰以灌民
田歲連大熟天全六番招討司所統碉門土軍以重斂作亂
蜀中大震鎮巡官議進兵翊以爲非計乃屬翊招撫之皆詣
軍門降罷塘千戶徐啟夷種也白晝行劫官兵追之深入險
阻翊訪其所善指揮某誘而縛之遂伏法遷副使守禦松潘
其地介羌戎爲全蜀屏蔽松守卒自成都調分諸戍勞逸不
均卒怨多逃翊定更戍法復嚴衛長斂索之禁其亂始弭曰
小河抵棧閣久廢壞商旅不通翊調工治之士人名爲盧崖
閣龍州之西有鐵索橋翊命益其索而上施之板行者稱便

常昭合志 卷之八

人物

全

遷雲南叅政賓州洱海之界有鐵索菁夷諸熟夷爲寇輒導
之入擾時方議勦翊條其利害謂夷未易殄請於姚安界中
創大堡擇將率其屬以守仍諭各堡堅城濬川夷竊發則相
狙擊使生熟夷不得合可以取勝遂用其議洱海在雲南之
西常苦旱其地有品甸開砦二陂可以儲水安南坡諸處有
美泉可灌溉翊諭民治二陂築梁玉山壩障水以入田歲比
登公私有儲粟遷廣西右布政使尋卒年六十六翊器度宏
裕是非不苟歷官久而門闈蕭然不異寒窶所至以君子目

之 鄧志

鄒韶字性之父蘭和厚有令資韶力學登進士授南京工部主

事革蘆鈔吏弊司務劉某坐事韶久攝其職當入役銀悉以還劉人服其義督磚運於儀真簡靜不擾遷刑部員外郎有折柳從內府出者中人執以爲盜韶論出之晉司勳郎中出知兗州府訟牒紛委剖決如流逆瑾亂政遣卒四出偵事取賂韶知不免上疏致仕瑾欲逮韶而韶已得請乃摘二罪俾以米贖不慊復加譴俾再贖瑾敗廷臣疏爲瑾去職者擢山東左叅政未赴卒

陳寰志

弟武字靖之舉人知潯州府亦以廉

靜稱列祀鄉賢

陳察志

吳一鵬字南夫舉進士選庶吉士授編修正德初進侍講充經筵講官時劉瑾用事怒不時謁出授翰林爲部曹調南京刑

常昭合志

卷之八

人物

三

部員外郎遷禮部郎中瑾誅復爲侍講歷國子祭酒太常卿世宗踐祚召拜禮部侍郎數與尙書毛澄汪俊力爭大禮帝極建獻帝廟一鵬集廷臣上議乞立廟安陸不從時嘉靖三年四月也頃之極陳四方災異請率先臣工救疾苦罷營繕信大臣納忠言用回天意帝優詔報之踰月遂命一鵬偕中官賴義京山侯崔元迎獻帝神主於安陸一鵬復上言帝不納乃行慮使者爲道途患疏請禁約帝善其言而戒飭之比還朝則廷臣已伏闕哭爭朝事大變而給事中陳洸講張允甚一鵬抗疏論洸不聽其年九月以本官入內閣專典誥敕掌詹事武宗實錄成進尙書張聰桂萼素銜一鵬出爲南京

吏部尚書加太子少保居二年致仕卒年八十三贈太子太
保謚文端一鵬有器量寬然長者爲文典腴有成宏風格子
子孝字純叔嘉靖己丑進士由庶吉士改台州推官歷南吏
部主事乞終養後補禮部官湖廣叅議子孝穎敏絕倫博覽
文籍爲文章典則雅馴有玉涵堂集曾孫安國亦進士

明史
叅府

縣志

陳播字中定高祖圭字伯珪洪武初長鄉賦詣京夜拒奔女邑
有朱蝦墓者將肆寇掠伯珪與兄伯琬糾眾擒之兼善山水
其從弟嵩字景陽篤行績學爲後進所推曾祖允文字永聞
能詩亦善畫祖墓字嘉謨永樂間邑令有坐累去者其弟出

常昭合志

卷之八

人物

七

白金五十兩託之袖於途遂爲強禦所奪後十年令去職來
游問其弟已歿暮補其數還之令愕然不知也平生致力於
朱子小學有譚異端者正色拒之暮年有感董仲舒正誼明
道之語因以正誼自號程式傳父宏字德容以字行才藻敏瞻
貢入國學念母老請於國子先生曰宏有衰母目倚廬而望
誠知業之不可以間不如子職之不可以曠也願得歸養國
子先生嘉許之宏自是絕意不出成化中以詔恩得入品章
服拜賜藏之自命曰留菴以見志嘗學於張修撰洪吳尙書
訥善屬文爲時所稱詩亦律度圓熟有留菴稿二十卷訓釋
伊洛精義歷代敘畧補遺若干卷

鄧轍傳

播領鄉薦以親老謁

選得慈谿教諭以身模範日以治心養性訓迪諸生士習丕
變兼留心民事凡興利除弊切切爲縣令言之令雅重播多
見採納時鄉人褚圻爲其郡守與播有契誼旅見外未嘗私
謁歲丙寅詔天下纂修孝宗實錄寧波一郡舉播爲總裁人
稱得春秋子奪之法家貧事繼母生母盡孝與弟友愛尤篤
著有靜成稿錢仁夫志其族有襲者字承甫從談勿菴游日誦千
言著有節慎齋稿吳苑菴集

陳迥字良會播次子舉進士初任惠安縣調福清擢監察御史
會世廟議大禮抗疏極論桂萼時兩御史已逮繫復抗疏救
之忤旨廷杖謫合浦主簿代王文成守仁講道雲山又代林

常昭合志

卷之八

人物

菴

都憲富處置思田降寇遷新喻知縣陞大名同知超擢福建
僉事備兵福寧平處州古田礦賊晉河南副使時肅廟巡幸
承天迥兼程扈駕有巨璫要重賄不得遂銜之適召一宮人
以泥濫屬車不得前璫從旁嗾曰誰扈蹕而稽慢若是再被
廷杖削籍甲辰九廟成推恩復官撫按交薦堅臥不起著有
石淙山人漫稿省菴集列祀鄉賢閩廣俱祀名宦鄧從子官志
字舜卿以貢授青田訓導轉教諭倭入寇率諸生偕令分城
捍禦賴以安堵擢知大冶縣以廉慎誠樸爲治尋解職歸嚴
靖集國華字珍几迥孫登進士任南刑部郎中司寇吳某屬爲
江陵賀啟以不能四六謝語聞江陵謫知東平州州故土城

部議磔石民間譁然國華條奏第深大其塹奸民王某殺人
獄久不決國華獄禱於神案上印有聲鏗爾國華躍然曰神
告我矣一鞠遂服劇盜黃幡縱橫濟充設方畧猝縛之東郡
以盜累遷廣州太守首嚴保甲官役以捕盜冬寡爲殿最歲
飢捐俸設粥糜全活甚眾平番夷龍涎香之值歲供得減累
嘗覈債帥某冒餉及以法持豪紳某輿論快之卒以此中蜚
語借同年事株連事得直而國華竟棄官歸優游林泉者四
十年年九十卒

陳必謙志

兄以誠字思齋年弱冠卽佐大父迨築

山城爲禦倭備性孝友澹泊無私邑令某爲弟國華守廣州
時所拔士下車卽通款以誠始終不干以私後令以墨敗人

常昭合志

卷之八

人物

七

服其識國華子星樞字拱微以舉人授湯陰令時京師戒嚴
徵兵入衛星樞用司馬法部勒兩河丁壯戎行肅然明年勤
王之師雲集境上星樞具糗糧芻芻兵皆宿飽民不告勞兩
臺交章薦以思親告歸終養事父以純孝聞

孫朝讓志

胃樞字漢

瑩星樞從弟幼孤自立精韜鈴喜騎射萬曆壬子乙卯天啟

辛酉三捷武闈會試兩登副榜練兵崇明御史以將材薦授

南匯守備纂輯列代將畧并憲章總目行世

河西陳氏家乘

士懋字

素庸亦迨之族幼孤事母孝母病倭寇至侍湯藥不離左右

倭感其孝而去之年九十三卒

陳煒卿字希文迨元孫邑增生入國子監以經學爲後進師謁

選湖廣布政司理問張獻忠寇武昌城陷死之妾馮氏陶氏
子垆芳暨一女俱被難闔門死者十二人祀忠孝祠

陳祖范
陳氏家

乘

吳寅字敬夫鄉舉肄業國學擢武昌同知攝守事劇盜趙璉劉
六等躡河汴捕急入鄂寅練卒爲戰守具民以無恐趙璉變
形服匿境內設計擒之殪劉六江中恥與武臣爭口不言功
丁艱服闋補常德府尋遷河東都轉運使同知凡爲鹺司多
損譽寅莅職謹名特起巡鹽御史惡之罷歸單車上道至無
以爲行性狷直文詞敏贍援筆立成有文集鄧曾孫士志字
伯高年八歲父母出避倭中道相失士志歸守其廬日家人

常昭合志

卷之八

人物

矣

終當於此索我父歿痛欲從死其大母年九十餘令其母強
之食乃日進粥一盂淚漬枕席重裊俱爛二母不知其夜哭
也執喪踰小祥目失明耳失聰口失音血枯骨立見者以爲
人腊免喪未幾卒

府志

王槐字公甫祖蘭字廷芳精於經學以鄉舉仕至夔州同知居
官有廉聲父韶字鳳儀有高行嘗率族人倡睦族會月一申
勸尤多隱德槐以舉人知湘陰縣平賦役善聽斷民多格心
者遷安陸知州會大水盡心救荒謀積貯以備緩急世宗人
正大統奉迎皇太后槐扈送供億百需立具以治績陞順天
府治中南郊特命分獻南岳乞歸不許卒於官廕一子數人

監鄧志從弟評字審言登進士授刑部主事詳慎明決用法不

阿有以偽造稅司條記繫者評考其印文漫漶竟以誑財論

有怙內臣勢迫人死者評正其罪親老乞改南曹以母喪歸

逾年卒評事親孝能詩多警拔語鄧志留字存甫評之族

以舉人任饒州通判有才名著廼文百詠爲人傳誦年八十

餘卒石淙漫稿

陳言字汝昌舉進士授刑部主事慮囚三輔晉郎中案無留牘

獄無冤滯出知撫州府多惠政劇寇艾茹七等作亂詔都御

史陳公金討之言參其軍寇平當遷會言路以私憾劾之遂

致仕撫州立生祠有四美八奇之頌年八十卒弟交字汝同

常昭合志

卷之八

人物

七

以舉人選知永康縣道通五省驛傳供億甚煩交一切裁抑

民得安堵調知興寧猺獞出沒爲患交單騎禦之渠魁十餘

人皆歸降號之曰新民歲大旱微服徒步禱於江濱諸邑不

雨而興寧獨雨民喜相謂爲陳侯雨上官命建靈雨坊紀其

事先是積穀數千悉發以濟民飢當路交章薦竟浩然歸宦

游十年行李蕭然興寧謠曰須臺月帷好不若陳侯明楚江

水雖深不若陳侯清性方正造次不苟在南雍時曾拒奔女

鄉人有冤獄爲脫其難其人以女謝正色卻之年八十餘臨

終呼其子啟篋視有簿籍五皆平日手錄名儒粹語也著有

五經註釋心說主一稿嚴文靖集

陳必謙字益吾交之曾孫登進士知輝縣濬阜水萬泉等河民利賴之擢南京御史抗疏論挺擊紅丸二案罪人當窮治削籍歸崇禎初再起爲御史當京察陳六事曰正紀綱明職業重操守破情面禁借端息黨議累陞都御史巡撫河南時汴宋汝洛間所在皆寇必謙所部兵不滿千人援勦邊兵多駐雒西檄令分道殺賊邊將左良玉部將李雲程趙柱累戰皆捷部將陳永福自陳趨沈邱攻賊賊分走潁輦洛必謙曰濠潁接壤園陵不可再驚而西賊又不容緩圖乃自引兵西命永福赴潁力戰賊走黃州西賊亦奔雒西恃永寧靈寶告急必謙遣別將救永寧而自救靈寶薄賊於朱陽山賊潰走尸

常昭合志

卷之八

人物

矣

滿川谷別將亦敗賊於河底村兩縣得完已而闖賊合數萬衆來寇與戰於九臯山又大戰汝州圯料鎮斬闖塌天整齊王二魁賊潰走或西入秦或南入楚而闖賊由汝寧入南直界必謙上疏乞勅督師會諸兵先勦闖賊會賊別部復自秦楚分道寇雒闖賊乃復進窺歸德開封必謙督諸將迎擊敗之度雒必西分兵備汝闖賊果西諸將前後夾擊又破之會楚鄖二撫不相能而京師戒嚴邊帥在河南者皆召入衛賊勢復猖必謙轉戰宛雒間斬賊掃地王擒僞軍師金龍騰甚有勞績執政以門戶計忌其功遂以該撫贖計土寇不戢二事爲罪解任歸必謙歸而河南益不可問矣初帝嘗書天下

清官四人於御屏首文震孟次卽必謙次劉宗周黃道周久之思必謙廢棄非罪召爲工部侍郎疏薦史可法可大倚任晉尙書未幾京師破被執得間亡歸發憤病死著柴居漫語行於世弟必誠字拙生舉人鏃厲名節著增廣楚詞南華經

悟解

府志

唐天恩字堯仁曾祖敏字志學資性敏捷博極羣書文辭典贍以鄉舉歷任浮梁寧津棲霞汶上四縣教諭兩典江西河南鄉試所著有詩經鈎旨博古要覽寒碧歸田二稿生子元舉山東鄉試孫政字文瑞著有鳴臯集天恩父也天恩由舉人授葉縣知縣正德六年盜起河朔天恩增城塹池繕修器械

常昭合志

卷之八

人物

九

流賊趙璠徐彥明等哨馬千餘臨城天恩率兵奮戰擒賊數十人賊引去是歲十月劇盜劉七徒黨尤甚抵城下攻圍甚急天恩嬰城固守二十餘日外無強援城遂陷賊執天恩與其父懸於縣庭叢射殺之庶母任及二妹皆遇害妻錢子詩臥亂屍下得脫詩收祖父屍成斂護歸事聞贈光祿少卿賜祭葬廕一子入監仍賜子孫爲儒籍後巡按御史華珩請建專祠有司春秋致祭

明史 參舊志

曾孫一麟字少峯母患痰疾幾殆一麟時焚香請代一夕大笑數聲而卒卒三日而母病竟

愈裔孫學聖以孝友聞鄒嶧山泉器之

錢志

丁仁字明德登進士授行人陞司正持節冊封慶符王堅卻饋

遺陞南京工部郎中蘆洲歲課銀二萬五千餘兩當司專出
納仁請委吏受銀於堂廡郎中無所預擢廣西叅議督糧餉
歲歉仁請糴於鄰省躬往監運軍餉獲濟賓州梗化民以粟
塗屋自別仁使人敦諭州人素德仁卒不敢肆以老致仕居
南都日節其俸入置書籍日取以讀以博洽名

鄧志

陳察字元習常熟人

曾祖芳字繼芳祖璇字叔維號市南清隱皆有著作行疏弟玉字叔英亦積善好義練

達世務父稷字允材性稟清懿居常好以禮容自攝時爲章詠有臨財若淵冰忍貧如鐵石之句平生恥言人過喜愠不彰親友招集皆不赴安常履善以壽終鄧志 登宏治十五年進士授南昌推官正

德初擢南京御史尋改北劉瑾既誅武宗猶日狎羣小察偕同官請務講學節嗜欲勤視朝語甚切直以養親歸家居九

常昭合志 卷之八

人物

一百

年始赴補會帝將親征宸濠察請無行而亟下罪已詔忤旨奪俸一年論羣臣更諫必置極典俄巡按雲南助巡撫何孟春討定彌勒州以功增秩世宗卽位疏言金齒騰衝地極邊徼旣統以巡撫總兵又有監司守備分轄無事鎮守中官因劾太監劉玉都督沐崧罪詔並罷還再按四川請罷鎮守中官不聽錮衣百戶王邦奇誣大學士費宏石瑤庇楊廷和將興大獄給事中楊言抗疏諫帝震怒親鞫言落其一指察大呼曰臣願以不肖軀易言命不忍言獨死帝目攝之察不爲動退具疏申理且請下王邦奇於獄直聲震朝野巡視京營與給事中主科極陳武定侯郭勛貪橫狀擢南京太僕少卿

疏辭因請召前給事中劉世賢等二十餘人帝怒責以市恩
要名貶遠方雜職給事中王俊民鄭一鵬論救皆奪俸察補
海陽教諭累遷山西左布政使入爲光祿卿以僉都御史巡
撫南贛居二年乞休因薦前都御史萬堂大理卿董天錫等
十四人可用吏部請從其言帝奪部臣俸責察徇私妄舉斥
爲民察居官廉旣歸敝衣糲食而已

明史

陳寰字原大察弟少警敏登進士選庶吉士授檢討大內災寰
上書言上昵比羣小佚遊騎射儲嗣久虛宜絕逸欲禁橫斂
正法度節濫用語多躓直詔奪半歲俸嘉靖初預修武宗實
錄請以靖難諸臣緣故主駢僇者人賜一傳新都相心器之

常昭合志

卷之八

人物

百

薦爲經筵講官時宮中有妃之喪輟講寰抗言人主寧以微
戚廢大典遷南京國子司業有詔罷孔子諡號遂有議闕里
器物非度者寰持不可曰陛下稱孔子爲先師蓋尊之也尊
之則闕里制當益不當裁報可俄超遷南祭酒上所論次大
學章勸上勤德政戒土木省齋祀上覽書稱善助教劉世龍
以封事下獄柄臣疑出寰意遂請致仕性至孝奔母喪日馳
一羸南嚮哭畫工方擬爲遺像未成寰甫息有間蹶然啼曰
予庶幾得之爲之準己睛顙輔跪而加丹粉焉兄察自蜀來
望見號曰母而在哉爲人倜儻簡易爲司業時祭酒湛若水
講學諸生拱聽寰笑謂諸生曰大旨如是耳宜趨歸事而父

母毋徒褻衣矩坐爲所著有琴溪集二十卷王弁州集子文周字

汝中以諸生官光祿寺監事侍穆廟清宮講學肅宗親書中

正二字賜之出爲大同通判潔已任事兵民德之以功賜璽

書金綺擢廣東鹽課提舉商民咸便一時縮攝四邑象肆應

如流動中肯綮嚴文靖集堯仁字汝元少孤事母至孝以諸生謁

選潼州州同歷練如老吏奉命採木有黎峒土司者少嫠也

伺堯仁寢直入臥榻堯仁肅起整衣冠列侍從不假色笑土

司慙而去遷南安通判平訟建學治聲騰起晉南康同知遂

歸瞿汝說志宣字用徵察從弟嗜吟詠善鼓琴七歲母金病拜周

孝子祠祈以身代及長父病篤割股以進父啜之愈邑令大

常昭合志 卷之八

人物

頁

書孝子二字表其門其族又有燦者字介卿敦尚信義有友

人遠行以七白金寄之十七年其友歸以原金還之封識宛

然子至善字用拙亦以好義稱錢志

張文麟字公瑞高祖衡字以平詞翰俱美永樂初徵入禁廷書

誥以親老乞歸生三子繼字信申端肅沉靜以儒業淑人緒

字廷瑞居鄉校有才名以詞翰薦會昌侯府教授善寫墨竹

亞於夏昶純字粹中生懋字時勉舉於鄉官武邑教諭以德

行廉恥淑其徒著有遜志錄歸閒集懋三子堯民字從仁通

經史湯民字從禮俱與修邑志有和楊子器早朝詩三百首

安民字從敬亦好吟詠桑志文麟爲湯民子初登進士時

錢志

修孝宗實錄探故事諸繇高第選者馳傳行郡邑文麟得浙
江還上事太史授刑部主事所治金吾緹綺一以惠文彈治
遂治尙書章奏與同舍郎共治逆瑾獄爰書明允晉郎中南
海梁次摠以宰相子賊殺良民奉璽書往勘竟劾抵罪遷吉
安知府未上丁外艱服除補建寧府年僅三十八致仕歸王
貞志黎留從弟文鳳字公儀安民子子爲文根極理趣與文
青日劄競爽登進士知新會縣政尙寬和擢工部主事理徂徠泉源
晉郎中時上命大臣督視決河文鳳謂安山湖久堙宜急濬
從之三月底績遷贛州府知府致任兄弟並祀鄉賢陳近志京
安字康甫懋從姪父學字時思成化辛卯舉人甘貧好修治

常昭合志 卷之八

人物

真

詩經有名王端毅恕遣子承裕受業焉邑令延於官廨集邑
俊屬授之業學未嘗干以私除遂安知縣俗剽詐治以簡易
有古循吏風居九年引疾歸鄧志京安登進士授南京刑部主
事晉員外郎素與郎中藍某不協又有吏部郎以事囑託不
應二人共謀藥之降解州同知再入爲刑部主事乞改益王
府長史子文元字檜谷負奇氣學問宏洽見時事輒吐罵人
以迂怪目之錢志從孫一元字長卿治毛氏詩力學攻苦以虞
山賦得名一元弟一本字道生性行方嚴書法適美教授里
中四十年手輯經史及濟世諸書一本孫有恒能世其學舊志
張承慶字璿浦文麟曾孫以國子生謁選授汝南府照磨署上

蔡縣事有惠政遷蘄州衛經歷獻賊陷蘄承慶度勢不可爲
投河死妾徐氏與子幼子及家人沈堂等十一人俱從死焉

崇祀忠孝祠

嚴龍翔傳

顧達字德孚既壯始學勤苦靡間舉進士任臨州知縣運軍恣
橫過取耗糧長多破產達追拘其已兌者每石予耗三升以
其餘抵正兌二萬餘石布政承差蔡堂數撓縣法達得其攬
納鹽鐵奸贓事論成邊衛堂求守備姚太監爲之解達不從
掌庫役毛昌夜持羨銀二千餘兩請入達以銀解郡而罪之
會主簿申屠祥因事入賄達禁勿納因行謗於巡按御史奏
調龍泉教諭尋遷魯山令陞南京刑部主事進郎中子衮性

常昭合志 卷之八

人物

高

涓有至行

鄧志

丁奉字獻之號南湖少孤力學舉進士授南吏部主事晉郎中
會內艱歸有旨擢用太宰陸完手書促赴奉疏懇乞休併致
書太宰勸其功成身退遂以原官致仕年僅三十八其後完
敗交游多株連奉以前書免累士論高之寄傲湖山沉酣六
籍著五經臆言四十卷通鑑節要五十卷作贊斷千餘條南
湖留稿十二卷巡撫歐陽某發帑以廣其傳而奉念故友湯
副使繼文五喪未舉卽以此賻之列祀鄉賢

管志

曹達字履中世居福山舉進士擢御史糾冢宰汪鋌不法杖謫
隨州判官攝蘄水縣事中人從章聖梓宮過蘄急責供帳達

飭吏民手板水次已公服前引常廩外不庀一錢中人聞知
曰是故強項曹邪先是達按司隸得強項名故云累遷知廣
州府廉直不撓調雲南守治如廣擢按察副使彝酋普憲阻
兵達以所部深入縛之巡撫害其功格不上當調歸府志系昭文志
王魯字質甫號山城祖室字民潤有至性族有戍外者歲給軍
裝費親黨無告者皆以室爲歸魯由諸生入國學授沅州判
官便道抵家會倭夷煽亂邑城肇工巨室皆畫地分築魯獨
任西門城樓工費最鉅既抵沅沅自麻陽作難督撫駐節供
應稱煩繼有阿項之變征調日廣魯夙夜鞅掌項旋就擒先
是官於沅者廩餼多取給里中魯一切却之擢晉寧州同知

常昭合志

卷之八

人物

夏

有治績尋解官歸子嘉謨字順伯諸生有詩集嘉謨孫憲曾
字孝甫少負氣節無錫顧端文憲成延致家塾獲與東林諸
正人遊捐地建邑令楊漣生祠楊罹璫禍檄下毀祠憲曾與
瞿懋業負其像藏白龍寺夾室璫誅復奉像還祠錢志

王嘉言字君謨魯次子登進士知肥鄉縣縣有猾胥爲鹽盜窟
嘉言一夕斃三胥鹽盜解散洗手奉職踰年稱治外艱服闋
補曲周擢工部主事改南禮部歷郎中陞浙江僉事備兵盩
紱台儲糗糧練士卒島倭突入嘉言縛其魁六人斬首三十
餘級詔賜白金一鎰遷叅議移駐溫處處多礦盜嘉言撫諭
悉散去再賜金幣引疾歸祀肥鄉名宦子維屏維楨維城維

翰維屏字邦甫諸生父叅浙藩時客有囊金爲所部居間者
維屏掩耳卻之子輔臣字涵台善事後母官大同都司都事
攝馬邑知縣剿劇寇雪冤獄遷涿州州同移泰安威奸惠良
頗著政跡維楨字澄吾官浙江都司都事按治軍士之飢法
者遷霑益州同知署南寧有盜案率累十四人盡釋之維城
字敬吾官四川都司都事署新津知縣悉除巨猾晉漢中通
判鎮漁渡壩練兵千人防礦寇督修棧道兩月報竣歷署州
縣多惠政子良臣字忠亮登進士知浦城縣改國子監助教
擢刑部郎中平反明允出知梧州府以懷集逼連陽徭賊盤
互建四堡分兵守禦遷河南副使祀梧州名宦傅臣字巖築

常昭合志

卷之八

人物

真

天性質直恥言門第專心力學大書於堂曰要做轟烈士且
向光明正大裏尋來欲完清淨身須從酒色財氣上克去師
事李緝大精二戴之學孫運昌字乾符良臣子登進士歷知
開封歸德二府所在有治績遷山東運使鹽政一清錢維翰
字抑吾母晚年失明籲天願代以舌舐之生平敦倫睦族恤
寡孤念故舊行義甚著子清臣負才名克敦孝友府志

王奔昌字德符輔臣子以貢選江西布政使理問遷廣西都司
斷事署武宣陽朔二縣所在治辦靖江王亨嘉久蓄異志奔
昌刺得其狀密告巡撫瞿式耜早爲之備乙酉九月唐王建
號亨嘉拒命禽式耜歸囚之邸中奔昌遣閒使饋鮭菜得式

耜密書星夜趣東將吏進兵亨嘉就縛亂遂定丁亥永明王走楚式耜留守桂林弈昌以府同知守柳

大兵逼桂林分畧左右郡縣趨柳叛將李明忠據潯以瞰柳分守副使知府推官皆遁弈昌獨與馬平守城守明忠劫降書至弈昌縛其使械送桂林誓死待援會武宣狼目廖文登等襲沈北舟思恩侯陳邦傳復潯州明忠遁柳乃固式耜奏擢為按察僉事監陽朔與新興侯焦璉恢復平樂戊子二月陞廣西右叅議督理糧儲明年六月輓運至龍門為滇營亂卒所害贈太僕卿歿後五年子孫英徒步尋母歸逾年子孫蘭扶父柩歸

府志

常昭合志 卷之八

人物

卓

王夢鼐字兆隆魯之族祖會字希元幼為從父後本生父析產及之以出嗣固辭事嗣父母與本生父母各得歡心壯歲喪耦不再娶父嘉定字毅菴家貧常不舉火或遺之粟堅忍不受夢鼐登進士知烏程縣質直清方愛民如子以不阿枋相謫河南幕轉襄城令建永安堡於劉莊武定寨於張村以遏寇盜巨盜混十萬黨猝至夢鼐單騎擒其魁晉刑部主事工部郎中出知保定府蠲雜徭清馬政翦除豪民劇盜閹人貴戚不任公家賦者皆就役時添兵一萬專責府餉又議買南征戰馬千餘匹皆抗言力爭歲省餉三十萬而市馬事亦不果行以勞卒於官祀保定名宦夢鼎字兆吉夢鼐兄以舉人

官吏部司務爲人孝友與夢鼐并衣其炊居鄉急病讓夷不遺餘力留意邑中文獻搜羅放失後錢陸燦修邑志證據多其手訂年七十九卒兄弟並祀鄉賢

府志

盛賚汝字以善二歲而孤育於舅家因冒王姓以鄉舉任增城知縣增城陸接五嶺多寇盜水通海縮爪哇三佛齊滿喇咖諸國之利羅山猺叛督撫起大兵討之被檄監藍木軍且轉漕給食賚汝廣設方畧禽其謀主劉智山等躬率營兵疾鬪而前鹵獲無算詔賜白金諸變以寶貨至者故事有司檢錄奇珍以待進御然後開市謂之抽盤賚汝三閱貨三卻之彝感其德醪金樹楔署曰卻金民間歌之曰三番抽盤不要錢

常昭合志

卷之八

人物

頁一

增城知縣實痴顛治最當內徵會嚴世蕃索賂不得遷知崖州崖有生黎熟黎其酋號土舍者不能統治爭相仇殺賚汝遣譯諭除以次諭部落多港那臘等咸願內屬用其故俗使殺人者出耕牛爲償牽犬臨水涯斬頭噫血相誓解仇既詛盟土舍還報黎人大喜輸租襁屬黎之前輸租也有司爲木量值木其中高尺許合米與木齊所收倍蓰以故怨恨數畔賚汝角甬正概著爲式生黎羅活本萬等聞其威信願輸歲貢比熟黎又計誘斬劇賊陳廷魁兵備王惠急責沉水香賚汝拒之曰前州守以徵香木絀禍於黎至今未弭下吏若私銖雨及以賂上官者有如大海稍遷開封同知築河隄三百

餘里水不溢湧擢漢陽知府瀆水填淤梗行舟資汝出府美
金疏鑿民不苦役而渠道通漑田千餘頃號曰盛公河劉公
洲賊阻江爲寇資汝督兵擣其巢穴而南科臣張某受賂賂
屬勿窮竟資汝荅曰天子任公言天下是非不任公爲逋逃
主也竟爲張誣劾免官家居貧困以卒

先賢
事畧

許河字水東舉鄉薦知浦江縣調上蔡創築兩縣石城祀浦江
名宦孫士奇字渤海重熙字子洽士奇以諸生負經濟才縣
令楊忠烈漣器重之府塘水利諸大事必咨訪焉重熙爲太
學生以史學著崇禎九年刻五陵注畧觸誠意伯劉孔昭忌
將發難祭酒倪元璐爭之因併攻元璐牽連叅閱姓氏七十

常昭合志

卷之八

人物

覓

五人俱東林指名時溫體仁當國陰主之擬旨推究三上不
允而解後周延儒復相令所親敦請不往所著有歷代通畧
大臣年表行世宋史增定新編綴籬草旅寄軒稿未刻曾孫
嘉祐字宜生博學不應舉求多聞者叩質焉著語語集應科
字孟山河從子巡按御史劉某咨以水利延入幕知府蔡國
熙創中吳書院合九學生講藝其中以應科爲首諸生皆師
事之

錢志

時省字箕山河從孫爲人高曠寄情詩酒以鄉舉作

令餘干不喜事上官人以傲更目之從弟時登尤有高趣以
柳枝詞致於西廬宋光夏至今傳之

氏族志

許士柔字仲嘉

祖汾字子清以布衣居胡襄懋宗憲幕下敘平
倭功歷官工部主事父備字伯彥父爲族所擄

備走顛直指出於獄爲諸生不喜帖括留心邑中故實興革利弊言之鑿鑿當事每諮訪焉著有詩古文集若干卷魏浣

初傳天啟二年進士改庶吉士授檢討崇禎初遷左庶子掌左

春坊事先是魏忠賢既輯三朝要典以光宗實錄所載與要典左乃言葉向高等所修非實宜重修遂恣意改削牴牾要典者崇禎改元燬要典而所改光宗實錄如故六年少詹文震孟言皇考實錄爲魏黨曲筆當改正從原錄時溫體仁當國與王應熊等陰沮之事遂寢士柔憤然曰若是要典猶弗焚矣乃上疏曰皇考實錄總記於世系獨畧皇上娠教之年聖誕之日不書也命名之典潛邸之號不書也聖母出何氏族受何封號不書也此皆原錄備載而改錄故削之者也原

常昭合志

卷之八

人物

卓

錄之成在皇上潛邸之日猶詳慎如彼新錄之進在皇上御極之初何以率畧如此使聖朝父子母后兄弟之大倫皆闕而不明缺而莫考其於信史謂何疏上不省體仁令中書官檢穆宗總記示士柔士柔具揭爭之曰皇考實錄與列聖條例不同列聖在位久登極後事編年排纂則總記可以不書皇考在位僅一月三后誕育聖躬皆在未登極以前不書之總記將於何書也穆廟大婚之禮皇子之生在嘉靖中故總記不載至於冊立大典編年未嘗不具載也皇考一月易世熹廟之冊立當書皇考之冊封獨不當書乎體仁怒將劾之爲同列沮止士柔復疏曰累朝實錄無不書世系之例臣所

以決摘改錄正謂與累朝成例不合也孝端皇后皇上之嫡母也原錄具書保護之功而改錄削之何也當日國本幾危坤寧調護真孝慈之極則顧復之深恩史官不難以寸管抹殺之此尤不可解也疏上報聞體仁滋不悅會體仁嗾劉孔昭劾祭酒倪元璐因言士柔族子重熙私撰五朝注畧將以連士柔士柔亟以注畧進乃得解尋出爲南京國子祭酒體仁去張至發當國益謀逐士柔先是高攀龍贈官士柔草詔詞送內閣未給攀龍家故事贈官誥屬誥敕中書職掌崇禎初褒卹諸忠臣翰林能文者或爲之而中書以爲侵官崇禎三年禁誥文駢儷語至是攀龍家請給去士柔草時數年矣

常昭合志

卷之八

人物

事

主者仍以士柔前撰文進中書黃應恩告至發誥語違禁至發喜劾士柔降二級調用司業黃鳳翔抗疏辨曰詞林故事閣臣分屬撰文或手加詳定或發竄改未有徑自糾叅者也誥勅用寶歲有常期未有十年後用寶進呈吹求當制者也贈誥專屬中書崇禎三年所申飭未有追咎元年之史官詆爲越俎者也不報尋補尙寶司丞遷少卿卒子琪詣闕辨誣乃復原官贈詹事兼侍讀學士明琪字嘉生以廕爲饒州府推官士儉字季約號希俠士柔弟僮好大節朔望必拜於先師跪讀孝經卽旅次不廢尤好易深探程朱奧義所與契洽皆名德宿望有先達爲士儉世好或諷執弟子禮士儉曰

吾受先人命師西谿繆先生蓼州周先生安知其他甲申三月士儉賦詩十章巡撫祁忠敏彪佳見而歎曰吾按吳日未卽薦爲國用負許生卽負國也金陵失守士儉泣祭先祠戒諸子以讀書淬志令義士陳龍威間道上書山陰張大司馬時姦民乘亂所過焚掠士儉以嫂嬰難奔救於鄉鄉人見士儉未雍髮欲邀功於守帥士儉瞋目大罵遂被殺唐王監國授兵部職方司主事魏訥集士驥字德生士柔從弟姿敏氣岸博通羣籍同里楊葵與婁東二張創舉復社士驥執牛耳稱應社十六子爲文開闔變化具有法度甲申後從瞿式耜入廣西桂梧一隅之地主客喧豗文武橫決累建奇策噤不得

常昭合志

卷之八

人物

墓

施授潯州推官攝蒼梧縣兼城破縊死有集若干卷

蔣莘田集

鐵籍字汝載舉進士除遂安知縣分校浙闈拔名士茅坤拜南

御史罷歸性故倜儻才復瞻麗旣歸益縱情詩酒臯甫子循輩俱稱賞之嘗言天地間培塿凹凸足供吾搜剔者無限以虞山佳麗而奇絕勝處久湮沒土石中恐爲山靈所笑乃闢劍門剏樓三楹復作亭於其上大書楹聯爲時所指摘寄居吳門年八十五卒著有海山集子審言好聚異書亦能詩籍從弟壽字汝猷家貧好吟詠耻干謁有蘭泉集四卷庶字國微籍族弟登進士官行人奉使汴藩適同年段某作令河南邑豪扞文罔段將置之法而欲藉手贈庶豪賈以千金爲壽

庶正色郤之兄昇以事瘕死獄中庶以哭兄遽卒昇孫岱岱
字汝瞻父亨字龍橋家居織畚不漏銖兩至扶危周急飯飢
糲死卽傾囷橐弗恤岱登進士授廣州理刑秩滿擢御史巡
按山東決犯常不滿額有旨詔齊豫按臣議穿河渠岱言當
壤官亭廬舍千餘費水衡錢萬萬無益國計事乃寢張文襄
居正急於求才得岱所上封事輒反復稱善岱亦竭其材力
釐剔奸弊所至有聲然竟以居正故牽累罷官林居修飾池
館度曲飲酒對客談燕移日不厭年八十餘卒著兩晉合纂
等書子時俊字用章少力學貫通春秋四傳登進士以工部
主事差北新關除苛剔弊正供而外不名一錢終湖廣按察

常昭合志

卷之八

人物

臺

副使所至以清惠聞

錢志

錢泮字鳴教號雲江五世祖德字本忠通敏有心計以力穡起
家高祖衡字叔平永樂初以賢良薦累遷吏部稽勳主事小
心周密考最還鄉散財焚券鄉里稱爲長者父鮪字雲澤好
禮樂施設義塾以教里中兒歲早悉捐其租泮登進士知侯
官縣調繁慈谿擢刑部主事歷員外郎中出知順慶府陞陝
西副使備兵漢中嘗發粟賑飢全活甚眾遷江西叅政丁父
憂歸而倭亂作邑令王鈇善騎射時時從泮把酒談兵泮有
兩蒼頭亦善射倭自吳門劫關稅巨萬奪民船載之取道尚
湖入江泮與鈇率兵追至讓塘猝與倭戰伏四起俱遇害事

聞詔贈光祿卿諭祭建祠廕一子錦衣百戶世襲

明史參管龔二志

時從泮死者有錢鑄錢班錢錫及徐密宋濤五人子部字子

曹少力學為諸生事母至孝襲父廕為錦衣百戶部子與龔

廕琛字國寶泮從弟正德中貨巨室粟數千石賑飢鄧七寇

江淮計擒其客范秋山送軍門斬之

舊志

趙士端字叔正五世祖仲先洪武初以醫名生子璧字彥美亦

精於醫取藥者恆施之不責報年八十卒璧生瓊瓊生安字

維靜貢生官肅寧知縣士端為安之孫以歲貢授仙居訓導

嘉靖甲寅倭寇越中與縣令協謀戰守力竭令被害倭知士

端之為廣文也以師禮迎士端瞋目大罵倭斷其首而去後

常昭合志 卷之八

人物

高

輿尸抵家止以身葬列祀忠孝祠

府志

宗禮忠簡公澤之裔由應天衛千戶歷署都督僉事驍健敢戰

練卒三千連破倭浙江巡撫阮鶚遣禮擊徐海於崇德三里

橋三戰三捷旣而戰死贈都督同知諡忠壯賜祠皂林

明史參通

志子彭年廕世職千戶

趙承謙字德光其先江陰人祖實贅常熟錢氏因家焉父珙字

永遠敦善好義歲飢罄家以賑鄉里承謙少貧苦力學年逾

四十始舉於鄉又十年成進士授贛州推官被檄視商稅釐

革宿弊行旅稱便龍南賊葉白劫贛尉去勢洶洶將挾以攻

縣承謙肩輿抵賊壘陳說利害白叩首送尉出擢南京文選

主事晉郎中遷廣東叅議和平盜李文彪事起僉事尤瑛倉卒問計承謙貽書報之曰五嶺出風氣外盜幸未成亂宜柔之而已夫用兵者不必有勝算其小人利賊資而君子利功勲兵起禍結財匱人困竊以爲所當念也且吾左右皆是賊黨吾推心賊腹而賊寄耳目於吾股掌間故兵符臥寢皇甲士不下睥睨而賊已伏隘左矣敢以龍南之事進瑛懔然與承謙合策撫下之得不亂蕭御史者承謙同年也意有所屬承謙不之應王御史者以使至承謙待之簡因相與謀曰趙叅嶽嶽來欲折御史角耶遂誣以佗事鐫職歸承謙魁岸傲儻性和易而介當南銓考滿時嚴世蕃識其名使所善諷之

常昭合志

卷之八

人物

墓

曰良苦寂寂亦有意耶吾能致之北笑謝曰老憊不願北也獨與同曹鄭端簡曉楊忠愍繼盛厚歸田後取司馬通鑑朱

子綱目手編成錄以遺家塾年八十二卒

王世貞傳

趙用賢字汝師號定宇登第選庶吉士授檢討張居正父喪奪情用賢抗疏曰臣竊怪居正能以君臣之義效忠於數年不能以父子之情少盡於一日臣又竊怪居正之勳望積以數年而陛下忽敗之一旦莫若如先朝楊溥李賢故事聽其暫還守制刻期赴闕庶父子音容乖睽阻隔於十有九年者得區區稍申其痛於臨穴憑棺之一慟也國家設臺諫以司法紀任糾繩乃今曉曉爲輔臣請留背公議而徇私情蔑至性

而創異論臣愚竊懼士氣之日靡國是之日濇也疏入與吳中行同杖除名用賢體素肥肉潰落如掌其妻腊而藏之用賢有女許御史吳之彥子鎮之彥懼及深結居正得巡撫福建過里門不爲用賢禮且坐鎮於其弟下曰婢子也以激用賢用賢怒已察知其受居正黨王篆指遂反幣告絕之彥大喜居正死之明年用賢復故官進右贊善江東之李植輩爭嚮之物望皆屬焉而用賢性剛負氣傲物數訾議大臣得失申時行許國等忌之會植東之攻時行國遂力詆植東之而陰斥用賢中行於是用賢抗辨求去極言朋黨之說小人以之去君子空人國詞甚激憤尋充經筵講官再遷右庶子改

常昭合志

卷之八

人物

真

南京祭酒請早建儲宥言官李沂罪居三年擢南京禮部右侍郎以吏部郎中趙南星薦改北部尋以本官兼教習庶吉士二十一年王錫爵復入內閣用賢以爭三王並封語侵錫爵爲所銜會改吏部左侍郎與文選樓顧憲成辨論人才羣情益附錫爵不便也用賢故所絕婚吳之彥者錫爵里人時以僉事論罷使其子鎮許用賢論財逐壻蔑法棄倫用賢疏辨乞休詔禮官平議錫爵乃上議曰用賢輕絕之彥緩發均失也今趙女已嫁難問初盟吳男未婚無容反坐宜聽用賢引疾而出貸之彥遂免歸用賢長身聳肩議論風發有經濟大畧蘇松嘉湖諸府財賦敵天下半民生坐困用賢官庶子

時與進士袁黃商確數十晝夜條十四事上之時行錫爵以爲吳人不當言吳事調旨切責寢不行家居四年卒著有松石齋集三吳文獻志國朝典章因革錄天啟初贈太子太保禮部尙書謚文毅列祀鄉賢忠孝祠子琦美祖美隆美

明史
參傳

志琦美字元度天性穎發博聞強記以父廕歷官刑部郎中

生平損衣削食假書繕寫朱黃讐校欲見諸實用官太僕丞時嘗解馬出關周覽博訪上書條奏方畧隨例報聞遂以使事歸里著有洪武聖政記三十二卷僞吳雜記三卷容臺小草脈望館書目子士震見仕籍祖美字叔度爲諸生磊落英敏不矜門第與瞿汝說顧雲鴻輩結文社聲名藉甚友人王

常昭合志

卷之八

人物

五

字春避家難祖美割宅與之居其好義類如此早卒子士履字坦之以祖廕授中書科中書奉命出關頒賞布示恩信諸郡驩然時閹焰方張諸君子被禍交親畏避士履候問無少間遷營膳主事晉都水郎中提督夏鎮河道密授方畧擒沙溝盜首餘衆悉散以同官累降河間府管河通判署在泊頭鎮鎮無城士履傾橐以佐城工民德之稱爲趙城云遷韶州府同知未任卒著有松風草隆美字季昌刻苦恭謹發皇家聲熹宗卽位上書具陳先臣用賢當國本危疑請建儲爭並封擁佑先帝宜見卹錄得廕太常典簿太僕少丞越三年又請補給用賢考滿贈太子少保廕一孫中書舍人及推刑曹

進士唐紹堯爲逆璫所陷身受榜掠令以家人代之唐卒以
良吏著出守敘州會奢安二酋連謀變檄縣團選鄉丁數千
人又募僧兵訓練預防又遣材官出建武以爲犄角及兩酋
發難擁焮號二十萬假道鎮雄直逼叙境隆美短衣策馬寢
處城外督兵立營戒勿與戰但乘高擣石發弩出不意以拒
其來賊五進俱傷又爲建武所挫乃回攻永寧永寧故宿重
兵賴敘保障以老其師因得有備兩酋投首論者以敘先受
兵能却敵就斃其功不在永寧下其他新學宮釋滯獄裁茶
稅議鹽布緩積逋蠲贖闔郡德之且指馬騰仲薦治行第
一又疏守敘功而部議以資格罷遂歸及得旨復官竟不出

常昭合志

卷之八

人物

真

祀敘州名宦有文度詩二卷子士春士錦士功

府志參劉同升傳

趙士春字景之崇禎十年第三人及第授編修明年兵部侍郎
楊嗣昌奪情視事未幾入閣少詹事黃道周劾之下獄士春
上疏曰嗣昌墨纒視事既已罔効陛下簡入綸扉自應力辭
新命乃閱其奏牘徒計歲月久近間絕無哀痛惻恒之念何
奸悖一至此也陛下破格奪情曰人才不足故耳不知人才
所以不振正由愛功名薄忠孝致之且無事不講儲才有事
輕言破格非用人無弊之道也臣祖用賢首論故相奪情幾
斃杖下腊敗肉示子孫臣敢背家學負明主坐視綱常掃地
哉帝怒謫廣東布政司照磨祖孫並以攻執政奪情斥士論

重之後復故官終左中允士春自爲諸生無世家子弟之習
補衣徒步一以修身學道爲事晚登勞山謁孔林以歸知命

樂天浩然有得年七十九卒著有保間堂集列祀鄉賢明史
參舊

志士錦字前之與士春同舉進士授知化州甫下車卽復書

院置社田課文藝給筆札撫按交章薦陞工部員外有壹是

堂集士功字升之嫡母性嚴毅士功能得其歡心上有三兄

俱遭无妄之禍士功往來營救傾貲累千金曾志參
錢志

嚴訥字敏卿曾祖昌字景美自吳縣來徙業醫市藥自號種杏
子祖衡字以正有孝行父病籲天願以身代父恪

字心萱少投牒爲郡掾旋棄去力田掌鄉賦輸運至京與陳
宗祥叩關請濬自萌又嘗以吳中多蕪田歲連無所出因所

有膏腴資諸通賦者名曰助
役著水利紀畧隨意吟管志舉鄉試以主司試錄觸忌一榜

常昭合志

卷之八

人物

夏

皆不得會試越三年成進士改庶吉士授編修遷侍讀三吳
數中倭患歲復大禳民死徙幾半有司徵歛益急訥疏陳民
困請蠲貸帝得疏感動報如其請尋與李春芳入直西苑撰
青詞超授翰林學士歷太常少卿禮部左右侍郎改吏部皆
兼學士仍直西苑所撰青詞皆稱旨禮部尙書郭朴遷吏部
遂以訥代之朴遭父喪復代爲吏部尙書嚴嵩當國吏道汗
雜嵩敗朴與銓猶未能盡變訥雅意自飭徐階亦推心任之
訥乃與朝士約有事白於朝房毋謁私邸慎擇曹郎務抑奔
競振淹滯又以資格太拘人才不能盡倣先朝三途並用法
州縣吏政績異者破格超擢銓政一新尋錄供奉勞加太子

太保四十四年袁煒罷命兼武英殿大學士入叅機務以代者郭朴未至仍掌銓政帝齋居西苑侍臣直廬皆在苑中訥晨出理部事暮宿直廬供奉青詞小心謹畏至成疾久不愈遂乞歸踰年世宗崩遂不復出訥既歸里父母皆在晨夕潔餐孝養人以爲榮訥嘗語人曰銓臣與輔臣必同心乃有濟吾掌銓二年適華亭當國事無阻且所任選郎賢無失人華亭謂徐階選郎則陸光祖也家居二十年卒年七十有四贈少保諡文靖列祀鄉賢子治澂澍澤濟明史治字道隆性機警爲人清約簡澹操守甚峻當文靖拜冢宰治自北雍歸薦紳雲台不接一刺海忠介瑞素有介聲獨不修謁治言於文靖

常昭合志

卷之八

人物

事

得以異等擢有桀點某潛以千金爲壽治正色曰若豈無耳吾翁謂何而敢奸命亟屏斥之以舉人選授文淵閣中書舍人諸中書以此爲最優故事非宿著文學之譽者不輕授治意終以不得甲科怏怏歸瞿汝稷狀子楨字翼卿性剛介僕有以勢凌里人者痛責之邑令楊忠烈漣欲見之不可一日飲於其叔父天池家卽席三召三却之比謁於公堂語不及私楊益重之著有格言隨筆錢志孫煒字伯玉由恩廕中書舍人廕官太僕正卿著有滄浪集蘇山草詩苑澂字道徹清修推尙以廕官中書舍人仕至邵武知府按獄窮其指蹤者治稅去其煩苛者闔爲稅使縱橫激收其橐闔奪氣去築城東壩開鷺

絲池通九曲水舉一切利民事歸里後琴書自娛湘簾棊几
陳列古器座無俗賓口無俗語他如娶啞女却治童歸姻某
產鉅萬皆人所難能者著有雲松巢集松弦館琴譜子四楸
字曼倩恬靜端雅闢別業於北麓曰天潭邃谷著天谷小吟
老莊註枋字子俞嘗遊尙湖有婦號哭投水亟救之詢其故
曰夫貧勢家金將賣妾以償不如死耳卽典酒器如數償勢
家取契還之著有娛暉逸稿栝字大年精琴理柱字子建勵
志爲學善談名理錢志澍字道時書得虞永興米南宮筆法閒
吟小詩清韻絕塵澤字開字太學生官中書舍人萬曆中端
陽節命諸中書書扇頒賜中貴神宗見澤書稱善者再未幾

常昭合志

卷之八

人物

墓

以使事歸爲人豪侈好義揮斥千金不少顧惜楊忠烈漣稱
爲江南大雅佳公子年七十二卒子二櫬字長文父歿時弟
棡爲信陽守櫬一一封識其服御器物待歸兄弟相讓而後
分之生母馮歿櫬年已七十餘竟以哀卒櫬子焯字子尹隱
居不仕操行清苦著南虞小草朱錫鬯採入詩綜詩苑棡字子
張少穎悟工書畫篆刻兼善騎射登進士知信陽州地當寇
衝繕守禦練鄉勇賊有興世王者銳悍無敵棡與巡撫陳必
謙部將陳永福等擊之斬俘而歸時盧忠烈象昇督師河上
獨與棡商權軍務如左右手轉戰趙莊邢集平關等處皆以
少勝眾總兵祖寬兵頗不戢棡以牛酒犒師不令入城民皆

安堵丁艱服闋起爲兵部主事未赴順治初大吏交薦自以
衰廢固辭卒年七十有九

譜書畫

志

濟字道行書法得曹娥碑筆意

朱木字子喬父寅字時元舉進士知吉水縣用法嚴峻民皆悚
息縣故無城寅築之擢工部主事理山東泉源可疾歸木登
第授知昌樂縣部使者入境旁縣民持牒訟者必請曰願發
昌樂境內則絕無訟者凡訟於昌樂者多旁縣民也擢南臺
御史巡上江尋拜山東道御史兼攝四道時嚴嵩逐不附己
者忽逮治木廷杖幾斃出判鄭州會浙中繕兵被檄赴浙遷
知遂安縣歲稔民阻山發礦格殺官捕勢張甚部使者檄木

常昭合志

卷之八

人物

臺

勦之木引兵駐山下諭以禍福立解散遷敘州同知致仕歸

嚴文清集

顧柄字文謙舉進士授工部主事司荊州權務課額有羨輒籍
記貯郡庫吏胥不敢爲奸嘗有蜀商運大木爲桴浮江東下
猝以水汎桴解巨猾乘機掠取投匿遼府柄廉得之具疏啟
王出其人盡置於法晉員外郎司臨清磚廠陞貴州僉事分
巡思南思南俗雜民猺易動難靜柄鎮以寬和反側遂定奉
檄董試事忤某御史意被劾歸既而御史以不法敗起補廣
西旋晉湖廣叅議柄初第時嘗夢賈誼談長沙事甚悉至是

竟殞長沙

瞿文懿集

章美中字道華梅李人九歲能屬文登進士授大理評事出爲江西僉事分部豫章嚴相國嵩家所幸監奴戚郇多不法美中按律懲治無所假借藩邸藏匿亡命美中請於王曰法自高皇建大王爲高皇耳孫而身悖之使者以宗正條收王之舍人子王亦能終匿之耶或謂其持法太峻得無虞身對曰吾虞墮三尺耳不能爲七尺計前後臺使十三薦格於嚴嵩久之始遷廣西叅議盜陷太平諸郡美中先諸道兵撥其衝捕虜首百餘設伏夜搗賓利猺降之獠民俛首惕息所按部出入箐巖冒瘴癘成疾會遷四川副使自念地益遠疾益深遂乞致仕既歸無立錫地僦旅舍以居隆慶初中丞林潤御

常昭合志

卷之八

人物

事

史董堯封交章薦報聞將大用之而美中死矣王世子士雅貞傳亦起家進士知嘉善縣多惠政官至工部郎中父子皆能詩曾孫在茲字素文有文名以歲貢考授知縣未仕卒

徐棡字世寅祖鯤宇拙隱創立徐市父天民字覺甫事母至孝與人交始終一致不談人過歲祿收葬道殣無數棡登進士除宜春知縣擢南京御史時京山王宗茂者同被命瀕行嚴嵩置酒餞之備極珍異宗茂多不能名棡微笑曰海外物也若何由名後宗茂極論嵩父子其疏草嘗從棡更定有設宴而水陸畢具皆海外物等語嵩憾之謫棡浙江都事遷饒州同知擢浙江僉事進叅議監戚繼光軍破江西羣盜丁內艱

歸服闋補河南轉湖廣提學副使遷雲南叅政進按察使轉
山東布政使尋擢應天府尹未上拜右副都御史巡撫江西
疏言饒困於蠶其猩紅尤不易得朝廷淺其色而減其數晉
南京工部右侍郎山東漕河淤議開海運棧被命督膠河工
未竟改兵部右侍郎巡撫浙江修築海鹽隄二十餘里入爲
刑部左侍郎拜南京工部尙書時張居正以奪情怒言者棧
以書規之未幾罷歸棧敷歷中外爲政務捍禦災患師事嚴
訥具恭謹頗相類居家孝友恤故舊有文集奏議及纂補大
學術議行於世明史叅孫復祚原名篤孺字陽初以諸生入
國學才度爾美工詞曲著宵光劍紅梨記投梳記一文錢梧

常昭合志

卷之八

人物

壽

桐雨諧劇村老委談

昭文志

徐待聘字廷珍棧從孫祖侯字世卿與弟俶友愛同財五十年
豁達多智曾上白茆利病於當事多采用焉俶字世美有鄰
繫獄鬻女於俶俶厚贈之而却其女待聘舉進士歷知樂清
上虞分宜三縣皆有遺愛陞刑部主事轉工部郎中管節慎
庫勾稽出入洗手奉職遷湖廣僉事分守荆南當奢會繹騷
繕兵庀餉荆南宴然陞陝西按察使巡撫喬應甲希魏闈意
追故侍郎王之案贓期旦夕取辦待聘故緩其獄與應甲抗
不少屈以疾歸子錫祚一名字于王酷愛晚唐宋元詩輯元
詩三千首名情綺集嘗集唐人句爲百絕效李龔剪綃集時

艷傳之著有夢雨菴集

府志參
昭志

待任字廷葵待聘從弟以舉

人知沔陽州楚藩中涓殺人捕置法相國子奪民田視其質

劑斷歸民會待調分守荆南未及調卒

府志

汝良字冲寰待聘

從弟父振德字見東萬曆十六年邑大飢出米三千石麥三

千石助賑事聞詔令建坊官光祿署正又嘗輸銀二千兩助

餉汝良由太學授中書嘗刳股以愈父病割產以償弟逋居

恒退遜無富貴容

錢志

陳諫字信可父復字一暘以舉人歷知長興大庾二縣陞韶州

通判居官誠篤慈信多惠政諫登進士授刑部主事嫻於律

例以朋允稱晉郎中奉命恤八閩刑未至出知重慶府嚴明

常昭合志

卷之八

人物

■

廉謹剖決若流奉檄採木入夜郎窮崖谷所得木視他郡獨

多會有搆之者落職歸縱酒自娛竟成疾卒

瞿文
誌集

兄策字獻

可坦易峭直年八十四卒

陳瓚字廷裸策之子嘉靖三十五年進士授江西永豐知縣治

最擢刑科給事中劾罷嚴嵩黨祭酒王材論德唐汝楫遷左

給事中劾文選郎南軒請錄建言廢斥者帝震怒杖六十除

名隆慶元年起官吏科請卹楊最楊爵羅洪先楊繼盛而誅

奸黨之殺沈鍊者帝皆可之楊順路楷皆逮治其冬擢太常

少卿高拱惡瓚爲徐階所引瓚已移疾歸竟坐浮躁謫洛川

丞不赴萬曆中累官刑部左侍郎初瓚爲拱所惡被斥及張

居正柄政亦惡之不召居正死始以薦起會稽縣丞其後官
侍郎稽勲郎顧憲成疏論時弊謫官瓚責大學士王錫爵曰
憲成疏最公何以得譴錫爵曰彼執書生之言徇道旁之口
安知吾輩苦心瓚曰恐書生之言當信道旁之口當察憲成
苦心亦不可不知也錫爵默然瓚前後忤執政如此卒官贈
右都御史諡莊靖著有濟字堂集

明史

陳禹謨字錫九瓚子以舉人授獲嘉教諭累陞兵部郎中遷四
川僉事備兵川南長琪盜田虎熊林彝豪曾良弼等皆蠢動
禹謨戰守兼施殺虎林良弼移檄諭降涼山彝石波等萬餘
人尋遷貴州叅議分巡清都撫臣議勦下衛苗禹謨偵知其

常昭合志 卷之八

人物

翼

倚平定爲謀主誘斬之分兵四出拔寨二十一馬蹄有洞阻
險敗賊聚爲窟穴用火攻殲焉疊石封戶鑿其石曰天焦紀
功而還禹謨以一巡道專寄師旅所向克捷其功甚偉振旅
入賀病卒於途贈亞中大夫生平博識強記貫穿經史嘗撰
左氏兵畧以左爲經以史爲緯上於朝又輯駢志說儲經言
枝指廣滑稽志補北堂書鈔數百卷父子並列祀鄉賢

參

府縣志合

邵圭潔字伯如世居虞山北麓學者稱北虞先生瞿文懿景淳
嚴文靖訥結社會文時稱十傑圭潔爲領袖工制舉業尤工
策論古文辭不斤斤繩削而清婉淒切叅軌名家舉於鄉選

德清教諭生平篤行孝弟留心經濟倭亂時邑令士鈇造廬問計上築城四策城賴以全所著有北虞集若干卷學者私謚文達列祀鄉賢子鏊字麟武登進士仕至兵部郎中著有蓮墟集天相字文吉圭潔從父八九歲時常涅孝弟二字於左臂又刻孝弟忠信禮義廉恥八字懸於胸給事黃忠節鉞死靖難墓久湮沒天相於草萊中得之亟題碑以志其處憫忠節無嗣聞有族人在田間者徒步數十里外求得之邑令楊子器嘗訪以民間疾苦委之賑飢天相家至戶察見民釜中多野菜靡蕪至捧之以泣云曾孫濂字茂齊少負俊聲爲諸生攻苦讀書善談名理尤精毛詩兼善吟詠從遊者雲集

常昭合志

卷之八

人物

墓

至賃屋列肆以居有水雲集行世

府志參錢志

葛邦典字敘卿父覃字成之以明經任嘉興教授邦典登進士授工部主事典節慎庫秋毫無染晉刑部員外改兵部外艱服闋晉郎中出知汝寧府有屬吏素憾邦典入爲御史以大計劾之遂歸家居二十年卒弟邦弼字右卿以舉人授歸州知州均斗級糴穀二徭民以不困奉檄丈畝搜其田而不稅者豁其稅而不田者施州界有沃土百頃軍民兵刃爭之弼按籍瓜分爭遂息陞南寧同知先是安南貢方物例有所餽典郡者因太索犒於屬縣弼移檄關吏令貢物外一所不入

錢志

何鈞字子宣父墨字翰卿以貴爲湖廣布政司都事嘗創市廛以居商賈人稱何市鈞才識通敏好談經世大畧以舉人除平陽知縣平陽有東西江灌田四十萬畝而海水流注由爲斥鹵鈞修築鳳浦埭以捍之歲輸禾嘉蒲門軍糧涉江踰阻民苦其勞鈞請折銀皆垂永利又行視甌江防倭要害築石堡二爲營房百有二十以居戍卒繕置守備縣境帖然厯官淮府長史致仕尙寶徐貞明開畿南水田貽書詢鈞報言國家兵屯鹽漕四政皆表裏水田田邊地之法四曰清舊屯重邊引廣招募隆賞功田內地之法四曰貴力田更納贖在徭役定流配田畿南之法三曰近山用閩人汲泉法近河用楚

常昭合志

卷之八

人物

真

人障陂法近海用吳人引潮法鑿鑿數千言皆可施行子允澄字平仲允泓字季穆允澄少治春秋曉大義著澗情譜百餘卷允泓年十四五旣厭薄舉子業爲詩歌古文累數萬言長而學問日成自唐宋以來經世大典如杜鄭馬邱四氏之書攬披解剝窮極指要凡古今地理官制河漕錢穀兵農經緯畢貫好談三吳水利訪問三江故道及夏周疏濬遺跡論者比之宋王道甫鑛字子啟錞字子端俱鈞弟鑛舉進士授興化推官篤學勵行日手一編不輟有詩文行世孫大成字君立嘗佐同邑陳禹謨勦叛苗有功詩極清俊有娛野園集錞太學生好讀書得卽鈔校朱黃不去手書法鍾繇詩亦有

雅致玉寵莫是龍輩雅相矜重之孫雲字士龍服習家學能
古文詞尤熟唐史凡唐人詩有關時事者歷歷指出如目覩
崇禎間瞿忠宣式耜被訐下獄雲草索相從世以郭亮王咸
擬之後復從式耜至閩廣流離十五年復歸故園才情意匠
蒼老雄健有七夕行感激雄壯人比玉川月蝕詩云府縣志合參
夢齡字與九祖允濟字商楫舉人官嶧縣知縣能詩好獎借
後學屠隆傳夢齡讀書過目成誦通經史百家言爲詩古文皆
有法度游雍士大夫爭延禮之以人材薦授誥勅中書母憂
歸輯春秋三傳曰伯主源流學者宗之子其仁世其業爲專

經名家

錢志

常昭合志

卷之八

人物

夏

連鑲字抑武其先有璞者字魯質自鳳陽來徙少勤學鄉邑文
獻多所記識邑有纂輯璞必預焉從子恭字伯莊舉人授寶
慶通判以儒術行吏治百姓思之恭孫憲字成章以鄉舉人
南雍聞父病徒步潛歸時監規嚴人爲憲危之憲曰得送親
終死何懼哉吳俗侈靡憲準文公家禮以拯時弊豪爽負氣
好面折人褚圻志桑志鑲由選貢授安陸令縣爲獻陵孔道鑲廉
悍自持平差役清驛遞翦除宿猾王仲秀等郡守力庇不少
貨郡鞠孝感疑盜十三人鑲察其寃請釋之坐免歸著讀書
記游息漫稿兩京舊聞弟錦字煥卿性嚴正兄令安陸安陸
人有不法者持千金爲錦壽以解於鑲錦却之從弟珠字龍

巖高才能文與邵圭潔齊名

氏族考

錢順德字道充世居奚浦高祖洪字理平與兄寬字理容能詩好客一時名輩如劉溥湯允勣沈周皆與之游度量濶達儻好義修家規立宗法葺世譜周知土俗水利以康濟一鄉爲已任周文襄忱按部請開濬奚浦身董其役灌田甚多正統八年海運漂沒洪具舟撈救全活無算生平賑禱癘施積構置義冢耆老名其堂曰尙義云

湯琛志

曾祖泰字崧岳好義一如其父少力學詩文清麗著有益齋稿泰孫勅字思卿體仁字長卿正德中勅以貲補太倉衛千戶從征劉七於湘江套中用計焚賊舟又嘗殪狼山賊擒劇賊胡某平慶安寇王

常昭合志

卷之八

人物

事

勒累著勞績子汝孝字道原博覽子史口若懸河晚工詩著有評史體言詩文集若干卷體仁少孤能自淬礪博通經史不苟然諾著有虛窗手鏡

王川詔表

順德體仁子登進士授刑部

主事歷郎中初徐文貞階論死楊順路楷天下稱快文貞去位高拱議釋之順德白尙書毋署名牘尾尙書慚恚出知常德府平糶賑飢流民復集艱歸服闋知興化府禱雨蟹眼泉雨隨車注遷浙江副使尋調山東致仕歸孫謙貞字履之早孤嗜學受知於邑令楊忠烈漣讀書求志闕懷古堂以奉母所與遊惟魏冲馮舒輩相與論詩度曲移日永夕下鍵謝客意泊如也初爲詩好劉長卿韋莊劉隱許渾之作後更深於

韓杜元白旁獵蘇陸尤善書法著未學菴稿錢志貞子孫保字

求赤經史子集校讐精審日讀書夜必記卷尾評明代詩文

有匪菴選本爲人方嚴抗特有父風孫保子興祖守孝修熟

史學長於議論陳志順時字道隆順德兄嘉靖末登進士奉命

餉遼軍給假歸卒年二十九順時儻有大志講求天文律

歷河渠兵農諸家之書薈成編凡百餘卷名曰資世文鑰

子世揚字景行萬曆辛卯副榜年十三能闇記經史數萬言

好談古今忠節奇偉事欲奮臂出其間著古史談苑行於世

順化字道光順德弟不喜爲儒雜學參同悟真諸書王文肅

錫爵被召順化上書千言請減東南財賦禁百官苞苴語皆

常昭合志

卷之八

人物

墓

愷直歲飢貸金泛粟設糜分賑活數萬人管志之選字舜臣順

德從弟父表以事繫獄之選走控上官莫能解乃代父繫獄

父遠愬京師母卒於家哀懇差押視殮畢復就繫居囹圄日

手一編呶唔不輟父歸出獄則又躬樵採以給朝夕迨父戍

遼左之選隨往有千戶延爲師遂補鐵嶺衛諸生鄉會連捷

釋褐知晉江縣以搏繫爲治爲巨姓所螫調固始縣擢刑部

主事尋晉兵部郎中上書訟父冤得雪封父如其官遂告終

養父子衣繡歸里吳中傳爲佳話錢志從子希言字簡栖少遇

家難避地之吳門博覽好學刻意爲聲詩王穉登折輩行與

交屠長卿湯若士皆稱其才然負才恃氣所如多不合所著

松樞十九山才情爛漫罕見其比又徵古今劍事撰劍策通記採摭詳博卷帙甚富梁谿鄒迪光序其集曰簡栖舌本木強好抵掌人事殊不了了與人荒荒忽忽人近彼遠人遠彼近都無况味及讀其所著書而與之交土木其身而龍虎其文愍轉爲慧無味轉爲有味自穉登云亡雅道淪喪簡栖以一布衣居詞壇忌之者終不勝好之者之口良有以也

蔣以忠字伯孝曾祖岳字時秀舉人官汝州知府父世卿字順中諸生以母守節號慕節嘗郤奔女返遺金人稱長者以忠登進士授長樂知縣政尚廉靖邑有濱閩二湖灌田千頃爲豪猾所竊據以忠執下於理大加疏濬民賴其利陞南京刑

常昭合志

卷之八

人物

三

部主事有闖僞稱選良家子充後宮部使者覺而執之闖託權貴關說以忠不爲動竟論死晉郎中外艱歸服除再補刑部有尙書子使酒殺人以忠不阿亦論死遷廣平知府廣平高阜苦旱民飢爲盜以忠建閘置倉經理荒政盜爲衰止陞福建副使未上卒以忠居官廉介內行修潔有文名所著有藝圃球琳清權山人集管志弟以化字仲學以舉人授孝感知

縣民有乘兄夜出掩殺之以嫂奸殺告以化叱曰爾兄夜出誰知其出又何以知必死於途密搜其家牀下利刃血猶鮮也立置於法擢主事遷御史請蠲楚一歲租出理淮揚鹽法調停均節裕國甦商尋歸值歲大水猶上書當事請蠲賑著

有西臺漫記使淮探古錄龍興雜記操古錄槍榆子花草粹
編以化子國鈇字含美山太學任鄖陽都事有風節

見墓表

沈應科字獻夫支塘人登進士授知沂州適歲凶招集流民五
千餘家時賦均徭鄰縣取法巡撫李世達於屬吏中獨賢之
其蠲積逋折馬價多出應科條上著爲令費縣典史某以貪
聞應科察知其枉爲言之世達世達曰官小註下考矣應科
曰官有大小是非無大小也世達特揭吏部以全典史其相
信如此累陞廣西叅議孫春澤字雨若好客能詩善草書畫
蘭竹有詩集先是有瑄者字廷塘亦支塘人天順末進士任
大理評事有清望卒於官

葉盛志

常昭合志 卷之八

人物

臺

黃時雨字化之高祖欽剖股療母疾時雨登進士官刑部郎中
當江陵一切繩下時雨獨持平出知惠州府以清強治覆畝
籍田賦不由田者籍除田不充賦者額減免鐵稅八百餘兩
禁女子貿易市中御史王度死靖難子孫戍廣奏脫之岑岡
夷長江月照者故泐寇李文彪黨也王文成守仁破池仲容
時岑岡獨險遠不可下文彪死月照代有其眾公行劫掠督
撫遣兩指揮招之反彼辱怒欲遣兵勦之時雨牒陳不可願
假歲月斬賊乃爲手書令主簿邱懋入其巢救禍福月照謾
言抵攔時岑岡私人遍左右伺官府動息時雨廉得四人釋
其重罪令取賊自贖以方寸紙用府印書免死字使持歸賊

巢給降者署名爲信得三千餘人月照弗覺也既遣邱懋歸
椎牛鳴鼓聚眾如平時無有應者再致如前月照計竊乃挺
身詣府及城闔服毒死斬首以獻散其黨爲良民寇始絕擢
廣東副使再平海寇李茂陳德樂之亂遷雲南叅政乞養歸
卒時雨天性下直與人言蟬連不出口遇事明辨莫能奪祀
惠州名宦曾孫朝元字非百甘貧苦學舉於鄉留滯京師卒

先賢
事畧

黃門字道登居奚浦少與錢岱蕭應宮齊名登進士授知邵武
縣調繁閩縣縣故劇邑豪右田產多飛詭門親履畝行度田
之制擢南工部主事晉刑部員外出知南雄府轉山東鹽運

常昭合志

卷之八

人物

壽

副使致仕有方伯某以重橐寄門其家不知也未幾方伯卒
於任門召其子畀之封識宛然歲飢傾困得大麥千石以助
賑鄉人稱大麥黃氏其後有名卷者字書城孝友端方嘗拒
奔女遊楊忠節廷樞門經傳註釋多其叅定太倉張溥推爲
復社巨擘

管志
陳志

顧雲程字務遠父早字怡東蚤歲連遭親喪屏絕葷肉者十餘
年富而好行其德有以貧故售所居者早言此吾故鄰何忍
使之遠徙厚酬其值仍割己廬規其故基相埒使居之而常
恤其家

嚴訥
表

雲程舉進士知淳安縣時方興丈量之役旁邑

希江陵旨爭爲小弓縮步雲程獨按故額缺更減賦撫按以

歲惡禁糶雲程令民販米者每十官糶其一餘勿問商民兩便調知嘉興歲稔穀賤雲程緩催科至元日召問耆老穀價視冬若何皆曰石益一鑽矣雲程曰如是趣完賦五日而畢御史姚江趙某弟遊嘉興使奴請事雲程笞而出諸境趙賢之曰是宜在臺中薦擢雲南道御史以伉直爲時所忌出爲江西僉事歲大飢請緩南運糧減價糶之比秋成亟糶以充所轄三郡獨無害景德鎮之亂撫臣檄往討之雲程言用兵勞費且渠率藍芳威梟桀難制某嘗識之可撫而降也後朝廷卒用芳威力平劉孽救朝鮮勦播爲時名將云尋改貴州叅議時議用兵容山銅仁二苗雲程力主安撫遷雲南副使

常昭合志

卷之八

人物

臺

將行苗率妻子哭送數百里雲南叅將鄧子龍僞報首功雲程白中丞吳曰鄧初莅軍遽報六十級翌日才獲十五級更數日乃足是真賊否吳欲杜其口檄往覈不從收司吏杖之雲程曰任日杖殺一吏猶勝殺無辜千萬人也事竟已復檄屯田蠻哈雲程言無故奪彝人地不可吳謬曰諸將力戰得之獨不能屯何怯也雲程不對退謂同列吾往第問居民何年編入何將成功將大不利於開府吳聞事亦止自四川叅政調山東備兵霸州有閹人爲大盜藪築堡上林苑雲程出不意盡縛之毀堡爲鋪境內肅清稅使馬堂橫肆繩之以法三殿災百僚捐俸助工雲程言俸以養廉捐俸捐廉也監司

不捐俸自雲程始擢布政使晉南京太常寺卿致仕子大章
大韶大章狀兄雲龍字思東仲兄雨筦家政以雲龍先後異母
遇之多不以禮雲龍事兄惟謹兩以逋賦亡匿雲龍挺身出
代縣令撈掠累百械其手懸之獄中會令暴病卒得解歸見
兄終不言撈掠狀也雲程狀

顧大章字伯欽常熟人父雲程南京太常寺卿大章與弟大韶
孿生子也大章舉萬曆三十五年進士授泉州推官乞改常
州教授父喪除值朝中朋黨角立正士日摧大章慨然曰昔
賈彪不入顧厨之目卒西行以解其難余向與東林疏可以
彪自況也乃入都補國子博士與朝士通往來陰察其交關

常昭合志

卷之八

人物

裏

肯繁清流賴之稍遷刑部主事以奉使歸還朝天啟改元進
員外郎尚書王組合署山東司事司轄輦轂最難任自遼陽
失五城及京營巡捕日以邏奸細爲事稍有踪跡率論死絕
無左驗者二百餘人所司莫敢讞多徙官去囚未死者僅四
之一大章言於紀曰以一身易五十人命且甘之矧一官乎
卽口曾讞繫三人餘悉移大理釋放紀大嗟服佟卜年之獄
紀用大章言擬流卜年未上而紀斥侍郎楊東明署事欲置
之大辟大章力爭卒擬流忤旨詰責竟論卜年辟瘕死獄中
魏忠賢欲借劉一燾株累劉一燾大章力辨其非忠賢大恨
熊廷弼王化貞之下吏也法司諸屬二十八人共讞多有議

寬廷弼者大章因援議能議勞例言化貞宜誅廷弼宜論成
然二人卒坐死大章亦遷兵部去無異議也會王紀劾罷徐
大化又疏刺客氏其黨疑紀疏出大章手恨之大化令所親
御史楊維垣訐大章妄創八議鬻大獄大章疏辨維垣四疏
力攻言廷弼納賄四萬且列其鬻獄數事反覆詆訐不休大
章危甚賴座主葉向高保持之下所司驗問都御史孫瑋等
白其誣帝以大章瀆辨稍奪其俸大章遂引歸五年起官歷
禮部郎中陝西副使大化已起大理丞與維垣爲忠賢鷹犬
因假汪文言獄連及大章逮下鎮撫榜掠坐贓四萬及楊漣
等五人既死羣小聚謀謂諸人潛斃於獄無以厭人心宜付

常昭合志

卷之八

人物

墓

法司定罪明詔天下乃移大章刑部獄由是漣等慘死狀外
人始聞比對簿大章詞氣不撓刑部尙書李養正等一如鎮
撫原詞以移宮事牽合封疆坐六人大辟爰書旣上忠賢大
喜矯詔布告四方仍移大章鎮撫大章慨然曰吾安可再入
此獄呼酒與大詔訣輒和藥飲之不死投纆而卒崇禎初贈
太僕卿官其一子福王時追諡裕愍初大章等被逮獄中忽
生黃芝光彩遠映及六人畢入適成六瓣或以爲祥大章歎
曰芝瑞物也而辱於此吾輩其有幸乎已而果然韶字仲恭
老於諸生通經史百家及內典於詩禮儀禮周官多有發明
他辨駁者復數萬言嘗以爲宋元以來述者之事備學者但

當誦而不述將死始繕所箋詩禮莊子曰炳燭齋隨筆云

大章子麟生字玉書志氣豪邁好讀書年十五父遭閹禍及

烈廟昭雪死事而大章以封疆一案為逆黨把持止於贈官

麟生赴闕頌冤乃詔法司改定爰書著進履齋稿黃宗大武

字武仲大章從弟權奇倜儻以古豪俠自命大章被急徵大

武傾身入長安職內橐橐一夕垣中白氣亘北斗大武故諳

星象指而泣曰諸君子其不免乎己而護大章喪歸益自放

於酒未幾卒府志

顧雲鳳字伯祥登進士由漳州知州累遷工部都水郎中提督

儀徵南河請築邵伯隄又築界首漕旅免風濤之險陞山東

常昭合志 卷之八

人物

裏

翁政備兵濟寧乞歸卒氏族考弟雲鴻字朗仲年未強仕以舉

人終雲鴻少喪父拊心嘔血終身抱怔忡之疾事後母至孝

雲鴻病後母籲天請代雲鴻死旬日竟以哀卒後母之殉其

子古未有也讀書虞山之藤溪博學深思研精六籍句字少

有抵牾穿穴古今訓故證明而後已生平耿介絕俗而急公

赴義不顧頭目以忠孝名節為己任鎖院對策至大災民窮

淚箴箴下沾漬楮筆嘗語所知大丈夫殺身取義當轟轟烈

烈如疾雷閃電公等口姝自好他日縱遇難死節不過計無

復之而已耳江陰繆文貞昌期長洲文文肅震孟皆嚴事之

曰朗仲吾師也學者私謚孝毅先生

府志參趙士春集

王之麟字汝楨登進士授刑部主事晉郎中出知撫州府內艱服闋補廣信所在多惠政歷湖廣僉事山東督糧參政值歲大飢力請捐賑民得免死益都知縣吳宗堯疏論礦稅貪暴被逮繫獄事下撫臣會勘之麟第署其不諳世故拙於保身士論壯之卒於官子字春字季和天性孝友顧裕愍大章被閹禍字春冒暑求解傷暈道卒字春子昌諱精經學有父風

錢志

袁光字字元讓祖懋字德孚以明經官龍泉訓導光字登進士任孝感知縣調烏程遷工部主事晉郎中提督淮徐中河時河水灌淮浸犯陵寢河道尚書楊一魁力主分河導淮之議

常昭合志

卷之八

人物

墓

光宇馳驅調度其間以幹辦稱竟以勞致疾卒贈太僕寺少卿子德溫字無瑜舉於鄉以縣令終

管志

陸化溥字君復世居五渠祖龍有松韻齋前集父南英字俊卿嘗引正嘉間事雜以論說題曰樗叟叢談著松韻齋後集化溥年十三就縣試令訝其少命作化日中天論援筆立就舉鄉試第二成進士授工部主事治泉濟上身行泥淖中導流決壅諸泉悉理晉郎中出知金華府義烏東陽開採不聊化溥邀礦使駐府授縣方畧以得不償失報遂定全浙補價議革守礦兵省費以千數會義烏知縣忤理刑誣縣不職上之巡按御史化溥力爭之乃得白御史論罷理刑官化溥歎曰

我不能借屬吏媚當道忍以同官殉屬吏哉遂乞歸以薦起
知贛州府治久積弛府金虛額至三萬化淳發其奸弊得復
其額屯軍暴橫出納多不如法典司者往往破產議以本屯
軍各支本屯糧著爲例府有四郵郵道自南安而下宜從水
乘傳者利其折舍入水從陸化淳請令馳傳至南安卽止陸
給其敏練如此竟以勤事卒官先是有兩橋稅入羨金若干
貯於府至病革通判以微言病化淳謝曰無所藉此所著有
松韻齋續集府志子泰徵字九來諸生有才名早卒瑞徵字兆
登歲貢選應天訓導日與名流韻士結社賦詩南曹鉅公雅
相引重薦知新城縣爲人端方易直橫經籍史兼工書畫所

常昭合志

卷之八

人物

墓

居城西南隅幽軒山沼皆所手闢有願志堂歸鶴堂稿八卷

錢志

陸化熙字羽明化淳弟登進士授刑部主事督工部郎中管器
皿厥值光熹二宗婚喪相繼釐弊責實省金錢無算督夏陽
鎮河道開滿家壩糧艘由湖抵韓莊入泲不經河險聞香教
賊起連陷鄒滕或勸移家赴臺莊化熙曰我奉命治河以護
漕也我去而鎮事危矣鎮危漕安得獨完於是乞援兵塞隘
口編夫守望賊不敢逼淮徐兵至乃遣淮兵營戚城徐兵營
東關賊首劉翠華悉騎壓淮兵互有殺傷徐兵望而却走賊
遂突入東關化熙單騎抵徐益請兵授計陳百戶乘夜疾馳

襲賊於朱公祠退保戚城會李總兵檄焦遊擊來會合兵進
勦賊敗走七月復分道來犯我兵劃河爲守防設甚嚴會滕
民擒翠華眾遂散九月糧艘盡過鎮化熙無疆守寄而捍禦
之功特偉陞湖廣兵備副使遷廣西提學進湖廣參政未赴
卒化熙少與兄治毛氏詩著詩通行於世

錢志

翁憲祥字兆隆

父拱極字敬天父歿有糧役之累懼傷每心乃
隱誦爲羸母或不怡輒跪而請日有見在豈以

尸獲胎母
憂耶舊志

萬曆二十年進士爲鄞縣知縣課最入爲禮科給

事中以憂去補吏科疏陳銓政五事其一論掣籤法言使盡
付之無心則天官之職一吏可代苟爲不然則地本預擬何
必於大廷中爲掩飾之術請亟停罷時不能從故事正郎不

常昭合志

卷之八

人物

壘

奉使撫按必俟代至是多反之而江西巡撫許宏綱以父憂
徑歸廣西巡撫楊芳亦以憂乞免代憲祥極言非制宏綱貶
芳亦被責言者詆朱賡李廷機輒被譴憲祥疏論已劾雲南
巡撫陳用賓兩廣總督戴燿並不報是時人僚多缺而侍郎
楊時喬楊道賓旬日間相繼物故吏禮二部長貳遂無一人
兵部止一尙書養疴不出戶刑工三部暨都察院堂上官俱
以人言註籍通政大理亦無見官憲祥言九卿俱曠甚傷國
體因陳補缺官起遺佚數事報聞屢遷刑科給事中吏部尙
書孫丕揚副都御史許宏綱以考察爲言路所攻求去憲祥
言一時賢者直道難容相率引避國是如此可爲寒心既而

軍政拾遺疏爲錦衣都督王之楨所撓久不下罪人陳用賓等已論死疏亦留中憲祥皆抗章論駁知縣滿朝薦李嗣善同知王邦才以忤稅使繫獄力請釋之會冬至停決囚復請推緩刑尙德意宥彙臣矜楚獄帝皆不報尋調吏科四十一年會輔臣葉向高典會試給事會六德以論救被貶旨皆從內出憲祥力諫中官黃勳趙祿李朝用胡濱等不法亦連疏彈劾久之擢太常少卿居數年卒明兄蕙祥字兆慶諸生弱冠失怙孝事祖母及所生獨肩家政授經諸弟皆成名弟懋祥字兆嘉應祥字兆吉俱舉人愈祥字兆和登進士懋祥授安縣令陞知濱州應祥授無錫教諭遷知光澤縣陞知朔州

常昭合志

卷之八

人物

屢

居官清正人不敢犯州近邊西師過城下輒斂刃工詩古文有杭州集雲朔集苜蓿齋集歸田集愈祥初知鄒平縣人以少年易之愈祥發摘如神調知會稽丁艱服闋補知清豐召爲稽勳司郎中卒於道通籍數年蕭然四壁嘗署其門曰苞直未許誰人到清節由來此戶知祀鄒平名宦

錢志

魏浣初字仲雪明初有祥者字吉甫行善道不慕聲色子謙字伯恭永樂辛卯舉人官紹興府教授溫恭謙慎無愧其名浣初登進士不樂爲吏改嘉興府教授集諸生講論如家塾之課子弟遷南京戶部主事權蕪湖關商有清水之頌遷禮部員外晉吏部郎中革弊興利不以南爲冷曹自諉陞廣東僉

事分巡嶺南禽巨盜李魁奇等尋陞叅政提學公慎明允文
有未善每召諸生面爲指授卒於官爲人清隘自好喜爲詩
得元白意弟冲字叔子生而丰姿玉立嘗覽鏡自笑曰有美
如陳平而長貧賤者乎與其兄齊名而雄俊過之從江陰繆
西溪昌期遊藐眎里中兒以爲糞土狗馬惟不得踐而踏之
舉於鄉五上公車卒於京有詩文一卷

錢志

龔立本字淵孟舉萬曆乙卯鄉試出高陽孫承宗門由太平教
授遷知福安縣出冤獄數十人調繁崇德崇德接壤烏程時
溫體仁柄國其子怙勢驕縱立本繩以法烏程銜之改陝西
道御史有巨璫督部務監司以下皆拜立本不屈巨璫與烏

常昭合志

卷之八

人物

臺

程合謀勒改工部主事旋降南兵馬指揮有誣良民爲奸細
者立本廉得其實悉縱去遷刑部主事平反冤獄如指揮時
以降調歸孫承宗再出視師將請立本爲監紀立本固辭條
上疆場事宜悉中窾要甲申之變立本北向長號不食而死
祀鄉賢立本古文詞初爲六朝晚效秦漢所著有浪泊集甲
乙集松窗快筆烟艇漁筆永懷筆潤常熟縣志若干卷

府志參崇

禮錄

祝舜齡諱書孝謹舉鄉飲賓撫按獎額十二次甲申年八十聞

變觸階死子女祥哭斂畢與其妻葉子萬壽俱投井死

府志參錢

志

國朝乾隆四十一年奉

特旨祝舜齡屈坦之馮知十徐守質徐嶧項志寧並賜祀忠義祠

屈坦之字毓菴推官輜元孫文行修潔爲鄉祭酒甲申之變不

食七日死

府志

馮知十字彥淵復京季子縣學生爲人有謀而勇於義福王監國挾策入南都有內臣識而奇之將草疏舉爲總兵知十恥由奄寺進固謝止之鄉兵起眾且數萬知十歎曰此輩但拍手將駭而走何能爲耶七月十三日

大兵至邑知十在友人何氏舍猝遇之奮臂格鬪飛矢中胸仆

常昭合志

卷之八

人物

墓

地被斫死

忠烈紀實

徐守質字野王父濟忠字良夫喜讀書萬厯時尙王李學濟忠旁窺遠採獨得大厯以還宋元名家風旨著有綴閒集守質稟承家學有聲庠序乙酉

大兵臨城其母病不能去謂兄基曰不可俱死斷徐氏裔兄長宜行守質當侍母基曰弟賢不可徒死我無益於時當侍母死生以之相讓且久兵勢益急基乃棄妻子逃守質被二創

死母與妹俱沉井中

府志參錢志

徐嶧字瞻淇尙書棧之族家貧少時寄食外家苦心力學爲諸生卓然自立甲申聞變慟哭不食欲死家人每謹伺之乙酉

王師至嶧湛然如常呼婦陳共奔婦方屑麥爲飯不應強之終局歎息而起題詩留儿上闔戶自經鑠志

項志寧字靖伯少孤好學能文福王時始以選貢入南都一日謁同里巨卿甫就坐闈人報大僚某某至志寧退入屏後聞

其言亟歸泣語弟志康曰事不可爲矣遺書知交約同殉死題詩於壁曰髮爲雙親重身因一主輕書生無別策溝壑作

完人遂不食死門人私諡曰文烈府志子奔茂字松心自幼孝

謹與兄奔英篤志力學日就千言以選貢需次知縣卒陶志

王道煥知縣王鈇裔城破遇害二子一女號慟絕食越四日俱

死府志

常昭合志

卷之八

人物

墓

趙牧初名陵字俠侯諸生匡時子少有大志畧涉舉業卽棄去於書無不讀尤留心堪輿緯象王遁風角兵家水陸虛實之言喜結納江湖豪傑訪問關塞要害崇禎末上書撫軍言秦楚賊勢勦撫事宜撫軍領之卒不見用會浙中祁世培撫吳牧上時務六策其所論練鄉勇束漕卒尤鑿鑿可行世培方次第用之而國事已不可爲矣甲申三月牧慟哭不欲生數數自循其頭頸曰吾祖父卽不受祿公朝三百年飲食耕鑿忍忘報乎福王監國牧思以布衣召見時馬士英當軸朝政穢雜慟哭而返明年七月與其徒數百人一夕浮海去與福建人林籥舞皆爲平海將軍周崔芝客籥舞爲參謀牧爲總

兵鄭芝龍之降也籥舞陳八不可弗聽監軍朱永佑謂崔芝曰虞山趙牧勇士也我欲使見芝龍而刺之不果丁亥正月崔芝復海口籥舞與牧守之四月

王師攻海口牧出戰所殺傷過當又益兵攻之城破牧與籥舞

俱死錢陸燾傳
參忠烈紀

石電長身赤髭能挽強起距尤精槍法崇禎八年流賊躡中都圍桐城電與壯士陳英從指揮包文達往援二月二十日追賊於宿松文達恃勇輕進陷賊伏中死之英電分左右翼搏戰殺賊無算英躡被擒電大呼往救賊圍之數重電力盡捨弓矢手鎗復殺數人賊羣斫之頭既斷猶僵立爲擊刺狀良

常昭合志

卷之八

人物

真

久乃什桐城人招其魂祀之余忠宣廟下府志吳縣包文
達傳參錢志

國朝忠義
類敘

陸霖字沛蒼人強幹有大畧乾隆丙申例授四川大壺典史軍興征勦金川承辦公務壬子西藏用兵防守口外火竹卡甲寅楚匪竄入川境隨營差委派赴鄖陽竹谿擒獲要犯胡仲元總統薦擢知縣回川候補丙辰楚匪滋擾東鄉散秩大臣佛柱派往哈密路經陝省就近赴川至達州大營幫同協領佐領防禦塔克新等遊擊守備范楸等知縣陸霖等九員帶兵在東鄉奮勇殺賊同時捐軀陣亡事聞奉部議在卹廕給全葬銀一百兩一次致祭銀六兩飭查籍貫事蹟交翰林院

立傳製造牌位入昭忠祠廕一子雲騎尉世職俟襲次完時
給與恩騎尉世襲罔替子四森榮棠棻棠嫡出現請承襲世
職祀忠義祠

吳英玉字玉泉嫻習幕務以例授湖南凌零縣典史乾隆六十
年苗疆不靖委辦軍書局文案又委齋

御賜福公相隆安物件至貴州留軍營差遣出力卽陞湘鄉縣
縣丞艱辛積勞始終罔懈以致染瘴病故湖督奏請賞卹奉
旨交部議准給減半祭葬銀五十兩一次致祭銀三兩續又補
給二十五兩加贈國子監學錄祀忠義祠

